

Va sen sinaale-so lawiing-ato

Yesu nêêl nambe navu biing Vavi Vaambuung naam

¹ + o 1:1 Luk 1:1-4*O Tiopilas, vakasin sen sa kaavu neep munggin-ato * Luk 1:1-4* ond gale gangge naambe Luk kaavu banye nivasaa-ju la vu Tiopilas, om yik Luk-anju sen kaavu sinaale-sote kaapiyaa-jo having. ond sa kaavu lak va pin sen Yesu wiing osin tatekin tanasin vu hil-ato,

² + o 1:2 Mak 16:19; Luk 24:49-51*vu munggin-ambe hato busin sen Anutu hako yi laah baandonii-to. Ond naahen nando yoon-ande vu kul vu yite sinaale-so sen böôy holin sil-ato, ond vu kul lak Vavi Vaambuung-ate niwêêk.

³ + o 1:3 Luk 24:36-49; Sin 10:41*Böôy hako nivaane be yimb, de kandi lak atombe nando voon lohvü busin doo-yuuuh, be navu taato yi vu yite sinaale-so in nambe lanjak ni naambe nando metumin, tombe nêêl vakasin sen Anutu nanggin yite hil-ato vu sil.

⁴ + o 1:4 Luk 24:49; Jon 14:16-17; Sin 2:33*De yoo naahen nando having sil-ato ond nêêlin sil nambe, “Ham-ame gavuuh Yelusalem e, ham oo mando ganggin va sen saanêêl vu ham böôy nambe Aamangg nêêl nambe le bu naam-ato.

⁵ + o 1:5 Mat 3:11*De Jon lipis hil-ato ond lipis sil lak bel, de ngaaho lak in Anutu navu biing Vavi Vaambuung naas mando gaving ham.”

* **1:1:** Gangge

6 + o 1:6 Luk 24:21*Tombe sinaale-so lasupin dando lavuh ti le mem lalingin yi nambe, “Omaaho Bop, mak peey e onavu gambiing-ambe yiyy Islel oo ganggin yiyy naah a?”

7 + o 1:7 Mak 13:32*Le nêêl vu sil nambe, “Hamame hamate va in nambe ham anjak ta osin busin sen Mangg oo hatung-ato ni le, yik Mangg timu yoo nanggin vaa-jo.

8 + o 1:8 Mat 28:19; Luk 24:48; Sin 2:32; 3:15; 5:32; Ep 3:16*Lemu Vavi Vaambuung e jakana ham-ambe bu niwêek vu ham, tombe mem ham e naanêêl sa haalengg vu Yelusalem de vu Yudia pin osin vu Samaalia be na nohvu taaku nanyendangga pin.”

*Yesu lakalaah baandoni
(Maak 16:19-20; Luk 24:50-53)*

9 + o 1:9 Jon 6:62*Yesu nêêl vakasin-anjo lung la, tonde layi de valu-nala baandoni, tombe bayiimb ti hako yi be la, tonde me-layi yi yesin laah e.

10 + o 1:10 Luk 24:4*Naahen nalak-ande sil oo mondalaah mend ak in, tombe omaaho yuuuh lato daale having sil pavis, ond yuuuh lalop lolop anivalôôy,

11 + o 1:11 Mat 26:64; Luk 21:27; Taato 1:7*tonde yuuuh lanêêl nambe, “Ham Galili, nambe vaati sen ham naale mem nangget baandoni? Yesuu-ju sen Anutu vu vêêl in ham-ande hako be la baandoni, ond yik le nom naambe sen ham ahe la baandoni gêêñ-anju.”

Laholin Matias lukalaah Yudas ahembaan

12 + o 1:12 Luk 24:50-53*Sil vu kandu Oliv-ambe lalaah Yelusalem. Kanduu-ju ngaaho daka vu Yelusalem lohvu 1 kilomita mu.

¹³ + o 1:13 Mat 10:2-4*Lala lato Yelusalem-ambe lalakala bayêen alopayo baandoni ti sen sil oo dando hôök-ato. Hil-anju ond Pita yuuuh Jon, de Jems ayuuuh Endru, de Pilip ayuuuh Tomas, de Batolomai yuuuh Matai, de Jems sen Alpias noow-ato yuuuh Simon sen naanjiihin hil Yuda in nambe gatiiy hil Lom lanaa-to, de Yudas sen Jems noow-ato.

¹⁴ + o 1:14 Jon 7:5*Hil-anju pin laving vêêh heey, de Malia sen Yesu tangganaan-ato osin Yesu halindin, ond sil alondpayo lavuh ti de mondalo-hak dando.

¹⁵ De busin ti tombe hil 120 dando lavuh ti, tombe Pita kandi naale hôök sil amend-ambe nêêl nambe,

¹⁶ + o 1:16 Saam 41:9*“Halingg-aso-e, bôôy ond Vavi Vaambuung wiing-ambe Devit nêêl vakasin munggin lak Yudas sen gêen taato mopaatôôv vu hil-ambe lalôôh Yesuu-to, ond vakasin-anjo nôôn ak lung la.

¹⁷ Yudas-anju ond hey ti sen hey ahondoos naawiing kul timuu-to,

¹⁸ + o 1:18 Mat 27:3-10*tombe mone sen hako lak yite nipayaa-to lala laanggo ngaanggis ti lak, ond Yudas-anju lupake be ninaavi vapuuuh-ande ahe kaasêêh.

¹⁹ Tombe hil pin vu Yelusalem langoyin-ambe lanêêl taaku tii-ju hôök sil lavand nambe Akeldama, dangga nambe ngaanggis ngaamong nihees-ate.

²⁰ + o 1:20 Saam 69:25; 109:8*Vakasin-anjo neep hôök kaapiya Saam nambe,
‘Yite bayêen e mando malis,
de omaaho ti me-le mando jak e.’

De Saam ango nêêl nambe,
 'Omaaho ango le biing yite kul.'

²¹ Om hil sen hey ahondoos having Omaaho
 Bop Yesu hey ala de aalom, de sil dando having
 hey lôôt,

²² + o 1:22 Jon 15:27*vu busin sen Jon lipis hil-
 ambe tok laam busin sen Anutu hako Yesu laah
 in yiyy-atô, ond hil-anja ti kandi jak gaving hey
 in naanêêl Yesu-te vakasin sen kandi lak-atô
 langaah gaving e.”

²³ Pita nêêl nambêênu tombe sil lanêêl omaaho
 yuuh haalend, ango Yusep sen danêêl nambe
 Basabas, de haale ango nambe Jastas, ond yuuh
 Matias.

²⁴ + o 1:24 Jon 2:25*Tonde lalohak nambe,
 “Omaaho Bop, goo galak hil pin alondpayo ni, om
 otaato naambe gaholin omaaho yuuh-anjo ango
 tana

²⁵ in nambe gako kul sinaale sen Yudas havuuuh
 neep-ande la valok-atêêto.”

²⁶ Lalohak lung la tonde sil kaavu yuuh haalend
 ak tatuuh-ande sil kalo, tombe Matias-ate tatuuh
 kalov hato sil amend, om lawiing Matias la hav-
 ing sinaale-so nomaayuuuh-ambe laam tii-to.

2

Vavi Vaambuung lukalaam voon

¹ + o 2:1 Lev 23:15-21; Diu 16:9-11*Hôôk busin
 Pentikos tombe sil pin lavuh ti be dando,

² de pavis atombe daandun ti laam vu baandoni
 nambe sen vavi jambaa-to be lohvu bayêen alo
 sen dando hôôk-ato.

³ + o 2:3 Mat 3:11*Tonde layi vati nambe kin dalaan-ato laam-ambe nando lak sil ti ti pin,

⁴ + o 2:4 Sin 4:31; 10:44-46; Sin 19:6; Mak 16:17*tonde Vavi Vaambuung lukala sil alond-payo lôôt, be lakaas bayêen bu ti ti lavand lohvu Vavi Vaambuung oo wiing-ambe sil lakaas-ato.

⁵ De hil Yuda vu taaku pin sen kand navu sapa Anutu be lala dando Yelusalem-ato,

⁶ ond lango daandun-anju tombe sil pin lasupin lalaam-ambe daale dang de sinaale-so dakaas sil sen daalêê-jôôto lavand ti ti, om lavindis lôôt.

⁷ + o 2:7 Sin 1:11*Sil pin lavindis-ande kand yuuuh lôôt-ambe lanêêl nambe, “Ham gango. Hil pin sen dakaas-anjo sil vu Galili me malis?

⁸ Nambe vaati om yiij nango de dakaas yiij lavangg sen ataak-aso lako yiij-ambe yiij nakaas-ato?

⁹ + o 2:9 2Ti 1:15*Yiij vu taaku Patia, de Midia de Ilam, osin yiij vu Mesopotemia de vu Yudia, de vu Kapadosia yuuuh Pontas de Esia,

¹⁰ de vu Plisia, Pampilia, osin Ijip, de vu Libia vahaan sen ngaaho vu Sailinii-to, de yiij vu Lom sen yalaam nandôô-jo.

¹¹ Yiij Yuda de hil vaalu sen lako Yuda-te gambum-ato, de yiij vu Klit osin Alebia, yiij pin hango de danêêl va bopaata sen Anutu wiing-ato langaah hôôk yiij lavangg ti ti.”

¹² Om sil pin lavindis lôôt-ambe kand yu-yuuuh, tombe yoo lanêêl vu sil nambe, “Vaa-jo dangga nambe vaati?”

¹³ Lemu vaalu danêêl sil pale nambe, “Ma-o, lanum wain moos ngeeyaata lôôt.”

Pita nêêl vakasin

¹⁴ De Pita naale having sil nomaayuuh-ambe laam tii-to tombe nêêl bopaata vu hil pin nambe, “Ham Yelusalem de ham Yuda pin, sa tatekin vaa-jo vu ham-ambe ham gango le.

¹⁵ Hamambe hil-anjo lanum wain ngeeyaata? Malis lôôt. Manyinjo naahen samiinaanôôn-anjo,

¹⁶ lemu Joel-ate vakasin bôôy-ato nôôn ak nambe,

¹⁷ + o 2:17-21 Joel 2:28-32*“Anutu nêêl nambe, “Vu busin taamusin e mem sale aambiing-ambe sate Vavi Vaambuung jakana hil pin, be noom-aso nomaavêêh-aso le daanêêl vakasin langaah, de hamate himbop-aso le lanji mavin, tonde hamate maanggêêm-aso le lanji taahu taahu.

¹⁸ Keen, hôôk busin-anju sale aambiing sate Vavi Vaambuung jakana sate hil moow osin vêêh in daanêêl vakasin langaah.

¹⁹ Tonde sale aambiing taahu taahu bopaata vu yendak osin saambiing taahu taahu niwêêk vu voon. Nihees de kin osin ahelu,

²⁰ de taaku mekaalus e mekanu dôôk, tonde kwaav e nihees dôôk vêêl e mem Omaaho Bop-ate busin bopaataa-to naatok naam.

²¹ + o 2:21 Lom 10:13*Tombe hil pin sen lavand nahôôk Omaaho Bop haalêê-to ond le dôôvu sil.’ ”

²² + o 2:22 Jon 3:2*“Ham Islel, ham gango sate vakasin-anjo le, naambe Yesu Nasaaleet ond ham alak ni nambe Anutu taato yi vu ham lak taahu taahu bopaata osin niwêêk vaha vaha, de kaandu yi be wiing vu ham ambaam-ato.

²³ + o 2:23 Sin 4:28; 1Pi 1:20*Vu bôôy ond Anutu yoo ka vu be samu vakasin lung la le mem vu Yesuu-jo lukala ham namam, tombe sim ham avu yi lukala hil sen me-lawii-having tanasin-ato namand-ambe layiis ak haah pako be yimb.

²⁴ + o 2:24 Sin 3:15*Le sim Anutu vu vêêl yi in nivaane yimbin-ate de wiing-ambe kandi lak laah, de yimbin-ame lohvu nambe naapuvu yi lôôt e,

²⁵ + o 2:25-28 Saam 16:8-11*in Devit néêl vakasin lak yi nambe,

‘Saahe Omaaho Bop naale sa mengg osin sa namangg vasa lak busin pin in nambe vati me-le biing-ambe saandupake le.

²⁶ Om nambêêñja sa longgpayo nivasa de sa dalaangg naapêélis vu Anutu, de sa ningg naavi mando mongganggin va nivasa,

²⁷ + o 2:27 Sin 13:35*in game le gavuuh sa kanungg na mando hil yimbin-ate taaku lôôt e, de game le gambiing-ambe gate Omaaho Vaambuung naavi panyek e.

²⁸ Otaato mopaatôôv sen sa mando metumin-ate lung la vu sa, de gale mando gaving sa om sale naapêélis lôôt.’

²⁹ + o 2:29 1King 2:10; Sin 13:36*“Halingg-aso, sa naanêêl langaah vu ham naambe yate himbop Devit yimb bôôy-ambe lahaav, de yite bandumb neep hôôk yiyl lavuun-ambe gêêñ-anjo.

³⁰ + o 2:30 2Sml 7:12; Saam 89:3-4; 132:11*Devit-anjo yi omaaho sen nanêêl Anutu-te vakasin langaah-ato be yoo lak ni nambe Anutu néêl vu keen baandoni nambe, ‘Sa navu aambiing-ambe

gate hil vu taamusin-ato ti le gako haale lulemak dukanaah gahembaan.’

³¹ + o 2:31 Saam 16:10*Ond Devit oo lak ni munggin ondeey nêêl vakasin lak omaaho sen Anutu yoo holin yi vulôôt in nambe dôôvu yiiy-ato nambe le kandi jak naah, om nêêl nambe, ‘Anutu me-havuu yi la nando hil yimbin-ate taaku lôôt osin ninaavi me-panyek e.’

³² + o 2:32 Sin 1:8*Ond Yesuu-ja, Anutu wiing-ambe kandi lak-ambe hey pin aahe yi lung la ondeey hey naanêêl langaah-anjo.

³³ + o 2:33 Mak 16:19; Sin 1:4; 7:55-56; 1Pi 3:22*Om gêen Anutu hako lakalaah baandoni be la nando nama vasa lung la, de wiing Vavi Vaambuung sen Mangganaan nêêl vu yii-to lom-ambe Vavi Vaambuung yoo wiing va sen ham nahe osin ham nangôô-to.

³⁴ + o 2:34-35 Saam 110:1*Devit-ame la baandoni le, lemu Devit nêêl nambe,

‘Omaaho Bop nêêl vu sate Omaaho Bop nambe,
“Omando sa namangg vasa,

³⁵ de sale aambiing-ambe hil sen dayi hong payaa-to le langgulis hong vaalu kambi.”’

³⁶ + o 2:36 Sin 5:30-31*“Om ham Islel pin ond yanjak ni vanuh naambe Yesuu-jo sen ham ayiis ak haah pakôô-to, ond Anutu wiing-ambe tu Omaaho Bop osin omaaho sen Anutu yoo holin yi vulôôt in nambe dôôvu yiiy-ato.”

Hil ngeeyaata lahelin londpayo de lalipis bel

³⁷ + o 2:37 Luk 3:10,12; Sin 16:30*Hil lango vakasin-anjo be la hanggwang sil alondpayo,

tombe lanêêl vu Pita having sinaale-so nambe, “Halingg-aso, hey aambiing vaati peey?”

³⁸ + o 2:38 Luk 24:47; Sin 3:19*Le Pita nêêl vu sil nambe, “Ham anggilin ham alompayo de ham pin anjipis bel jak Yesu Kalisi haale in kawiiy hamate nipaya na, le mem Anutu le biing Vavi Vaambuung naas vu ham.

³⁹ + o 2:39 Ais 57:19*Yik Anutu yoo nêêl nambe bu vu ham o noom-aso osin omaahonôôn pin vu taaku diin. Keen, yate Omaaho Bop Anutu nêêl lung la nambe le bu vu hil pin sen teey sil-ato.”

⁴⁰ + o 2:40 Diu 32:5; Pil 2:15*De Pita nêêl tanasin ngeeyaata lôôt vu sil, osin vu kôôvu sil nambe, “Ham ganggin ham in hil anipayaa-ja.”

⁴¹ + o 2:41 Sin 2:47; 4:4; 5:14*Tombe hil sen lawii-having Pita-te vakasin-ambe lalipis bel-ato ond sil ngeeyaata lôôt lohvu 3 taosen lalukalaam having Omaaho Bop-ate hil hôôk busin tii-ju.

Kalisi-te hil

⁴² + o 2:42 Sin 20:7*Hil-anju yoo dangoyin sinaale-sote tanasin, de sil alondpayo lavuh ti be daya vanôôn hôôk ti osin dalohak navuh ti.

⁴³ + o 2:43 Sin 5:11-12; 6:8*Tombe yik hil pin layêênin lôôt in sinaale-so lawiing taahu taahu ngeeyaata lak Anutu-te niwêêk.

⁴⁴ + o 2:44-45 Sin 4:32-35*Tonde hil pin sen lawii-having Yesuu-to dando lavuh ti, de va sen silate vaa-to ond sil pin-ate va.

⁴⁵ Tonde lavu silate ngaanggis ayuuah kupak-ambe hil laanggo de lako mone be lala latiyy vu hil sen dativak in va yuuh amêê-to.

⁴⁶ + o 2:46 Luk 24:53*De sil lavuh ti be dala Anutu-te dumb bop alo lak busin pin, tonde daya vanôôn hôök sil ambaand ond daya osin ahend anivasa be dapêêlis,

⁴⁷ + o 2:47 Sin 2:41; 6:7; 11:21,24*de sil lavand nahôök Anutu tombe hil pin dayi sil anivasa, de Omaaho Bop oo nahilin hil vaalu londpayo nalak busin pin-ambe dalukalaam having sil.

3

Omaaho vaha paaya ti nivasa lak

¹ + o 3:1 Sin 10:3,9,30*Busin ti Pita yuuh Jon lala Anutu-te dumb bop hôök soosin lohvu taaku me yaal in nambe lanohak, nohvu sen hil pin oo dalohak-ato.

² + o 3:2 Jon 9:1; Sin 14:8*Tombe omaaho ti tangganaan hako yi vaha nipaya be nando, ond lohvu busin pin daaku be lala datung nando ngaaho vu dumb avi sen danêêl haale nambe Mengalii-to, in nambe kataangg va vu hil sen dalukala dumb alôô-to.

³ Ond omaahôô-ju yi de Pita yuuh Jon lalup in nambe landukana dumb alo, tombe kataangg yuuh in nambe yuuh lambu vati vu yi.

⁴ + o 3:4 Sin 14:9*Le Pita yuuh Jon amend la vu yi, tombe Pita nêêl vu nambe, “Gangge haay e.”

⁵ Tombe omaahôô-ju ka vu nambe yuuh davu lambu vati vu yi om nayi yuuh,

⁶ + o 3:6 Sin 3:16; 4:10; 16:18*le ma de Pita nêêl vu nambe, “Sak mone ma, lemu va sen nando vu saa-to ond sa navu aambu vu hog. Lak Yesu Kalisi Nasaaleet haale sa naanêêl vu hong naambe okandi jak-ambe gana.”

⁷ Tombe Pita laandiiy hôök nama vasa be kandi naale, tombe sim omaahôô-juuto vaha tambaat osin vaha dambi niwêek ak pavis,

⁸ + o 3:8 Sin 14:10; Jon 5:14*tonde mem pasong-ambe la naale be la, tombe lukala dumb alo having yuuh-ambe kalov baando baando osin hako Anutu haale lak-ambe la.

⁹ Hil pin layi nambe nako Anutu haale lak-ambe nala,

¹⁰ tombe lalak ni nambe omaaho sen nando mokataangg va hôök dumb avi sen danêêl nambe Mengalii-to, ond yik yii-ju, om layi de nivasa hôök atombe lavindis-ambe kanund la lôôt.

Pita nêêl tanasin hôök Anutu-te dumb bop alo

¹¹ Omaahôô-ju puvu Pita yuuh Jon tatin, tombe hil pin latup-ambe lasupin lala vu yaal vu dumb alo ti sen danêêl haale nambe Solomon-atêêto, tombe sil lavindis in lôôt.

¹² Pita yi hil-anju tombe nêêl vu sil nambe, “Ham Islel, ham avindis in? De ham amem laam vu haay lôôt in? Hamambe haay oote niwêek osin nivasa wiing-ambe laa-jo?

¹³ + o 3:13 Eks 3:6,15; Mat 22:32; Sin 2:23; 7:32; Luk 23:13-25*Anutu sen tu Abalaam ayuuh Isak-ande Yaakop osin yate himbop-aso bôôy pin silate Anutuu-to, ond hako yite kul vaha Yesu haale lak. Yesuu-ja sen ham avu lukala Pilata nama be wiingin nambe kavaayin vu ham, le ma de ham haluuh damim vu yi hôök Pilata me,

¹⁴ + o 3:14 Mak 15:6-15*lemu ham haluuh damim vu omaaho vaambuung osin nivalok, de ham kataangg Pilata nambe kavaayin omaaho sen nayiis hil-ato vu ham.

15 + o 3:15 Sin 1:8; 2:32; 4:10; 5:30*De sim omaaho metumin danggakook ond ham ayiis-ambe yimb, lemu Anutu wiing-ambe kandi lak laah vu hil yimbin-ate, tombe haay aahe ondeey haay naanêêl tatekin-anjo.

16 De omaaho sen ham ahe osin ham alak nii-to, ond yik wii-having Yesu haale, ondeey haalêê-ju wiing-ambe vaha nivasa lak. Yik Yesu yoo kaandu yi be wii-having, ondeey wiing-ambe naale nala nivasa hôôk ham amem-anjo.

17 + o 3:17 Luk 23:34; 1Ti 1:13*“Halingg-aso, sa lak ni nambe ham doosin ondeey ham ayiis Yesu be yimb, de hamate yêêv bop-aso doosin having nambêenja.

18 + o 3:18 Luk 24:27,44,46*Lemu Anutu wiing-ambe hil sen danêêl yite vakasin langaah bôôy-ato ond sil pin lanêêl nambe yite omaaho sen yoo holin yi vulôôt in nambe dôôvu yiyl-ato ond le gako nivaane. Om gêen Anutu wiing-ambe silate vakasin-anju nôôn ak, lak va sen ham awiing vu Yesuu-to.

19 + o 3:19 Sin 2:38*Om nambêenja ham anggilin ham alompayo naah vu Anutu in nambe kawiyy hamate nipaya na valok-ate,

20 de Omaaho Bop-ate samu samu naam naakuuh vu ham, de biing Kalisi sen yoo holin yi vu ham lung la bôôy-ato be naas vu ham, ond yik Yesuu-ju.

21 Lemu yoo le mando baandoni vêêl e in ganggin busin sen Anutu wiing-ambe yite hil vaambuung-aso lanêêl langaah bôôy-ato nambe Anutu le samu va pin naatu nivasa naah.

22 + o 3:22 Diu 18:15,18-19; Sin 7:37*De Mose

nêêl nambe, ‘Omaaho Bop Anutu yoo le golin ham o halim-aso ti naatu hamate omaaho ti in naanêêl Anutu-te vakasin langaaah naambe sen holin saato, de vakasin pin sen naanêêl vu ham-ato ond ham gambe nanyem in.

²³ Tombe hil pin sen me-gambe nanyend in omaahôô-ju yite vakasin-ato, ond Anutu le kawiiy sil, de sil-ame le mando gaving Islel naah e.’

²⁴ De hil pin sen danêêl Anutu-te vakasin langaaah bôôy-ato, ond Samuel having hil vaalu vu taamusin-ato, ond sil pin lanêêl vakasin lak busin gêen-anjo.

²⁵ + o 3:25 Jen 22:18; Gal 3:8*Vakasin sen Anutu nêêl lung la lak yate himbop-aso bôôy, de lak hil sen danêêl Anutu-te vakasin langaaah-ato ond silate hil vu taamusin ham-ato, ond vakasin-anja nêêl vu Abalaam nambe, ‘Saambiing gate hil vu taamusin ti yite samu samu na dôôvu omaahonôôn nohvu taaku pin.’

²⁶ + o 3:26 Sin 13:46*Om Anutu holin yite kul vaha be wiing laam nyendoos vu ham in nambe samu ham-ande biing-ambe ham

anggilin ham alompayo ti ti be ham gavuuh hamate nipaya vaha vaha na.”

4

Pita yuu Jon daale kaansol-aso mend

¹ + o 4:1 Luk 22:4,52*Ngaaho lak in taaku naambus na tombe Pita yuu Jon daahen mon-danêêl vakasin vu hil, tonde kul vaha sen datung salivangin-ato laving yêêv sen nanggin Anutu-te dumb bop-ato osin hil Sadusi lala lalup vu yuu.

² + o 4:2 Sin 23:8*Hil-anju ahend kalin vu yuuh in nambe yuuh davu taahu hil osin yuuh danêêl vakasin sen Yesu kandi lak laah om hil yimbin pin e kandi jak naah-ato,

³ + o 4:3 Sin 5:18*tombe lalôôh yuuh-ambe lala laayiiy vinavi in yuuh in nambe yuuh mando be samiinaanôôn e mem.

⁴ + o 4:4 Sin 2:41; 5:14*Lemu hil sen lango Pitate vakasin-ambe lawii-having-ato, ond hil-anju moow ngeeyaata lôôt lohvu 5 taosen.

⁵ Samiinaanôôn atombe silate yêêv bop-aso lav-
ing himbop-aso de tanasin dangga-so be lasupin
vu Yelusalem,

⁶ ond sil lasupin having kul vaha sen datung
salivangin-ato silate yêêv bop Anas, de Kaiapas
ayuuh Jon, de Aleksanda, tonde yêêv bop Anas-
ate hil pin.

⁷ + o 4:7 Mat 21:23*Tombe lalaah sinaale yuuh-
anjuuto daale sil amend, le mem lalingin yuuh
nambe, “Muuh nawiing vaa-jo lak lati-te niwêêk
osin haale?”

⁸ + o 4:8 Mat 10:19-20; Sin 7:55*Tombe Vavi
Vaambuung hôôvu Pita, om nêêl vu sil nambe,
“Ham sen ham atu hil-ate yêêv bop-ato osin
himbop-aso pin,

⁹ gêen-anjo haay samu vakasin vu ham in samu
samu sen haay aawiing vaha paaya ti nivasa
hôôk-ato, de haay tatekin danggakook vu ham.

¹⁰ + o 4:10 Sin 3:6,13-16*Om nambêenja ham
pin-ande Islel pin, ond ham oo anjak ni naambe
omaahôô-jo nivasa lak-ambe gêen naale hôôk
ham amem lak Yesu Kalisi Nasalet haale, sen
ham ayiis ak haah pako, lemu Anutu wiing-ambe

kandi lak laah vu hil yimbin-atêêto.

¹¹ + o 4:11 Saam 118:22; Mat 21:42; 1Pi 2:4,7*Ond Yesuu-ju ‘tatuuh sen ham hil kul-aso yoo nimbaya lôôt nambe ham-ame andaav bayêen ak-ato, lemu gêen tu bayêen ahelasu-te kook aniwêek.’

¹² + o 4:12 Mat 1:21; Sin 5:34-35*Omaaho ti me-lukalaah nambe dôôvu yiay e, de vu taaku pin ond Anutu me-taato omaaho ti haale vu yiay nambêenja in nambe dôôvu

yiay e, yik Yesu timu.”

¹³ Tombe kaansol-aso lavindis lôôt in Pita yuuh Jon danêêl tanasin osin niwêek de yuuh-ame dayêenin e, tombe lalak ni nambe yuuh-ame vu hil tanasin-ate le, yuuh vu hil malis-ate, lemu lalak ni having nambe

bôôy yuuh dando having Yesu.

¹⁴ Tombe layi de omaaho vaha paayaa-to nivasa lak lung la be naale having yuuh, om silanêend vakasin sen daanêêl naah vu yuuh-ato ma.

¹⁵ Yik lanêêl vu yuuh amu nambe yuuh gavuuh kaansol-aso de lana voon, om yuuh lala de sil oo mondakaas in nambe,

¹⁶ + o 4:16 Jon 11:47*“Yale aambiing naambe vaati vu omaaho yuuh-anju? In hil Yelusalem pin layi nambe yuuh lawiing taahu taahu bopaata osin niwêek tii-ju, om yame aalohvu nambe yan-jak alungg in e.

¹⁷ + o 4:17-19 Sin 5:28-29,40*Lemu vakasin-anjo le na nohvu hil pin, om yaambu kôôvu yuuh naambe yuuh-ame daanêêl vakasin vu omaaho ti jak Yesu haale jesin

naah e.”

18 Tombe lateey yuuuh lalom-ambe lavu kôôvu yuuuh nambe yuuuh-ame daanêêl Yesu haale osin yuuuh-ame taahu hil jak Yesu haale jesin naah e.

19 Le Pita yuuuh Jon lanêêl laah vu sil nambe, “Ham akam oo bu vêêl e, naambe haay gangoyin ham lavam ond haay nanyengg doos vu Anutu, tombe naambêêrjo Anutu me-le ji nivasa le.”

20 Va sen haay aahe osin haay hango ond melohvu nambe haay anjak alunngg in e, haay oo aawiingin nambe naanêêl vakasin-anjo lôôt.”

21 Tombe kaansol-aso salo mopaatôôv in nambe lambu nivaane vu yuuuh, lemu layi de hil pin lako Anutu haale lak in va sen yuuuh lawiing-ato, om lavu kôôvu yuuuh yesin laah, de lanêêl-ambe yuuuh lala.

22 De omaaho sen yuuuh lawiing-ambe nivasa lak-ato ond yite ta doo-yuuuh lung la.

Kalisi-te hil lalohak in nambe daanêêl Anutu-te vakasin niwêêk

23 Pita yuuuh Jon lalaah lato vu yuuuhate hil, tombe yuuuh lanêêl vakasin pin sen kul vaha sen datung salivangin-ato silate yêêv-aso osin himbop-aso lanêêl vu yuuuh-ato vu sil.

24 + o 4:24 Eks 20:11; Nie 9:6; Saam 146:6*Tombe sil lango lung la, tonde sil pin alondpayo lavuh ti be lalohak vu Anutu nambe, “O Omaaho Bop, hong sen ohatung yendak osin ngaanggis, de lôôy osin va pin sen nando lohvu taaku pin-ato,

25 + o 4:25-26 Saam 2:1-2*de gate Vavi Vaambuung wiing vakasin ti la vu heyate himbop bôôy Devit sen tu gate kul vahaa-to, ond Vavi Vaambuung nêêl nambe,

‘Nambe vaati om hil vaalu sen sil-ame Yudaa-to ond ahend kalin-ambe davu daandun bopaata, de yate hil Islel ond kand navu vakasin malis amu?

²⁶ De hil lulemak-aso vu taaku pin osin yêêv bopaso pin lasupin lalaam in nambe lanyiis ngaamong ak Omaaho Bop gaving yite omaaho sen yoo holin yi vulôôt in nambe dôôvu yiyy-ato.’

²⁷ + o 4:27 Mat 27:1-2; Luk 23:7-11; Sin 3:13*“Keen lôôt, Helot ayuuh Pontias Pilata lav-ing hil vaalu osin hil Islel ond hil-anjo lasupin lalaam taakuu-jo in nambe lanyiis ngaamong vu gate kul vaha omaaho vaambuung Yesu sen goo gaholin yii-to,

²⁸ + o 4:28 Sin 2:23*ond sil lasupin in nambe lanyiis Yesu nohvu goo gakam vu niwêêk-ambe osamu lung la nambe nôôn jak-ato.

²⁹ + o 4:29 Ep 6:19*“O Omaaho Bop, gêên-anjo gakam bu vakasin sen lavu kôôvu hey-ato, be gandôôvu gate hil hey in hey naanêêl gate vakasin niwêêk lôôt, de hey-ame aanjêênin e.

³⁰ Otalo namam in biing-ambe hil anilakin nind vasa jak, de gandôôvu hey in hey aambiing taahu taahu osin niwêêk jak gate kul vaha omaaho vaambuung Yesu haale.”

³¹ + o 4:31 Sin 2:4*Lalohak lung la tonde bayêen sen lasupin-ambe dando hôôk-ato yêêy, tombe Vavi Vaambuung hôôvu sil pin, om sil lanêêl Anutu-te tanasin niwêêk lôôt de me-layêênin e.

Kalisi-te hil pin alondpayo lavuh ti

³² + o 4:32 Sin 2:44*Hil ngeeyaata sen lawii-having osin ahend having sil-ato ond londpayo

lavuh ti pin, de va sen sil ti ti yoote vaa-to ond ti me-nêêlin yite vati nambe yoo yite va nivalok e, malis, va sen silate vaa-to ond yik sil pin-ate va.

³³ + o 4:33 Sin 2:47*Anutu vu niwêêk bopaata vu sinaale-so be sil tatekin va sen Omaaho Bop Yesu kandi lak laah-ato langaah lôôt, tombe hil pin layi nambe Anutu-te samu samu bopaata nando having sil.

³⁴ + o 4:34 Sin 2:45*Tombe silate omaaho ti me-nativak in vati le, in dangga nambe lavu ngaanggis osin bayêen-ambe hil laanggo, de lako mone be

³⁵ lala lavu vu sinaale-so, tombe latiyy monêêjo vu omaahonôôn vaalu sen silanêênd va yuuh ame ma de dativak-ato.

³⁶ + o 4:36 Sin 11:22-26; 13:2-3*De Liwi-te hil vu taamusin-ato ti baan Saiplas, haale nambe Yusep, de sinaale-so lanêêl haale ango nambe Banabas, haalêê-jo dangga nambe omaaho sen navu niwêêk,

³⁷ ond vu yite kul ti vu omaaho ti vaanggo de hako mone pin-ambe la vu vu sinaale-so.

5

Ananaias ayuuh Saapila-te vakasin

¹ De omaaho ti haale nambe Ananaias, de vane haale nambe Saapila, ond yuuh lavu yuuhathe ngaanggis boow ti be hil laanggo,

² + o 5:2 Sin 4:34-35*tombe sim Ananaias vun mone sen yuuh lako lak ngaanggis-ato vaalu be vane yi, de hako vaalu be la vu vu sinaale-so.

³ + o 5:3 Jon 13:2*Tombe Pita nêêl vu nambe, “Ananaias, nambe vaati sen Saalang lukala galompayo be gavun mone vaalu? Gawiingin nambe tatuhin Vavi Vaambuung a?

⁴ Om naambe bôôy-ato gate ngaanggis oo nanjip, le ma de gavu be hil laanggo lung la, om naambe gate mone yoo mando. Le sim nambe vaati sen gakam oo vu vakasin nambêenja hôôk galompayo? Gambe otatuhin omaahonôôn a? Malis, manyinja otatuhin Anutu.”

⁵ + o 5:5 Sin 2:43*Ananaias hangoyin vakasin-anju tombe lupake be yimb meta, tombe sim hil pin sen lango banyêê-to layêenin lôôt,

⁶ tombe maanggêêm-aso kandi be layum hôôk tôômbs, de laaku be lala lahaav.

⁷ De taaku mekaalus yaal lung la le mem Ananaias vane valup, le doosin va sen tovu layaa-jôôto,

⁸ tombe yik Pita lingin nambe, “Onaanêêl vu sa le, naambe mone sen muuh hako lak ngaanggisato ond yik lung laa-jo?” Tombe Saapila liingga nambe, “Êê-e, yik lung laa-ja.”

⁹ + o 5:9 1Ko 10:9*Om Pita nêêl vu nambe, “Nambe vaati sen malompayo lavuh tii-jo? Mawisingin nambe sahi Omaaho Bop-ate Vavi Vaambuung a? Om gangge le, hil sen lahaav layamato ond lalu-daale vinavii-ja in davu baaku hongambe lana.”

¹⁰ Om pavis atombe vêêh-anjôôto lupake be la yimb meta neep hôôk Pita vaha, tombe hil sen lahaav layaa-to layi nambe yimb, om lalukala laaku be lala lahaav having laya.

¹¹ De hil bel-ate pin osin hil vaalu sen lango vakasin-anjo banyêê-to ond layêenin lôôt.

Sinaale-so dawiing taahu taahu ngeeyaata osin niwêêk bopaata

¹² + o 5:12 Sin 2:43; 14:3* Sinaale-so yoo mondawiing taahu taahu ngeeyaata osin niwêêk hôôk hil lavuun, de hil pin sen lawii-having-ato ond londpayo lavuh ti be dasupin dala Anutu-te dumb bop alo ti sen danêêl haale nambe Solomon-atêeto.

¹³ Tombe hil vaalu dayêenin-ande me-dasupin having sil e, lemu hil dako sil haalend ak,

¹⁴ + o 5:14 Sin 2:41; 21:20* tombe moow ayuuh vêêh ngeeyaata lôôt dawii-having Omaaho Bop-ambe dalukala having yite hil.

¹⁵ Om hil daaku hil anilakin-ambe lala dambe sil deep ak kaanye yuuu ame hôôk mopaatôôv nanyendangga, in nambe Pita balu-na de taaku naambiiy jak yi be kanu mu jêês sil e mem nind vasa jak.

¹⁶ + o 5:16 Mak 6:56; Sin 19:11-12* De hil ngeeyaata vu taaku bo-bop sen neep ngaaho vu Yelusalem-ato, ond lako hil anilakin osin hil sen mamu nipaya nahôôvu sil-ato be lasupin lalaam timu vu sinaale-so be dawiing-ambe sil anind vasa nahôôk pin.

Angela vu vêêl sinaale-so in bayêen kalaambus

¹⁷ + o 5:17-18 Sin 4:1-3,6* Tombe sim kul vaha sen datung salivangin-ato silate yêêv bop osin hil pin sen dando having yii-to ond sil vu hil tanasin vaha ti sen danêêl sil nambe Sadusii-to, ond ahend anipaya vu sinaale-so lôôt,

¹⁸ om lalôôh sil-ambe latung sil lalukala kalaambus-ate bayêen bop.

¹⁹ + o 5:19 Sin 12:7-10*Lemu busin atombe Omaaho Bop-ate angela ti hato hataahin vinavi de giiy sil-ambe lala voon, de nêêl nambe,

²⁰ “Ham ana baale Anutu-te dumb bop alo be ham naanêêl tanasin sen ham mando metumin-atêeto langaah pin vu hil.”

²¹ Sinaale-so lango vakasin-anju tombe sami-inaanôôn lalukala dumb alo pavis-ambe lanêêl tanasin vu hil. Tombe yêêv bop salivangin-ate having yite hil, ond lateey Islel-ate kaansol-aso osin himbop-aso be lasupin lavuh ti pin, le mem lanêêl-ambe hil lala in nambe gako sinaale-so vu bayêen kalaambus naam.

²² Om ahevaavu-so lala bayêen kalaambus-ambe layi sinaale-so, le ma de taaku malis. Tombe lalaah-ambe lanêêl nambe,

²³ “Hey ala hato bayêen kalaambus e laayiiy vinavi be niwêêk lôôt, de ahevaavu-so yoo daale danggin vinavi ti ti, tombe hey hataahin vinavi le omaaho ti me-nando hôôk bayêen alo le.”

²⁴ Tombe yêêv sen nanggin Anutu-te dumb bop-ato having yêêv salivangin-ate lango vakasin-anju be kand yu-yuu lôôt nambe vaa-jo le naambe vaati.

²⁵ Le omaaho ti valup-ambe nêêl vu sil nambe, “Ham angge, hil sen ham hatung sil hôôk kalaambus-ato ond lala daale danêêl tanasin vu hil hôôk dumb alo ni.”

²⁶ + o 5:26 Mat 14:5*Tombe yêêv sen nanggin Anutu-te dumb bop-ato osin ahevaavu-so lala lako sinaale-so, lemu me-layiis sil e, malis, in yêêv-aso layêenin hil nambe le lanyiis sil lak tatuuh.

Sinaale-so me-layêenin kaansol-aso le, lanêel vakasin langaah

²⁷ Lako sinaale-so lalaam-ambe lalaah sil daale kaansol-aso mend, de yêêv bop salivangin-ate nêêl vu sil nambe,

²⁸ + o 5:28 Sin 4:18; Mat 27:25*“Hey aavu kôôvu ham bôôy nambe ham-ame taahu hil jak omaahôô-ju haale le, le ma de hamate tanasin lohvu taaku Yelusalem pin, de ham awiingin tatuhin vakasin jak hey naambe hey oo aayiis omaahôô-ju.”

²⁹ + o 5:29 Sin 4:19*Lemu Pita having sinaale-so lanêel laah vu sil nambe, “Yik hey oo gango Anutu lava mu kaluuh omaahonôôn lavand.

³⁰ + o 5:30 Sin 3:15*Yesu sen ham ayiis ak haah-ambe yimb-ato, ond yate himbop-aso bôôy silate Anutu wiing-ambe kandi lak.

³¹ + o 5:31 Sin 2:33-34; Ep 1:20; Hiblu 2:10; 12:2*Tombe Anutu hako yi lak-ambe la nando nama vasa, be tu yate yêêv bop in nambe dôôvu yiil osin biing-ambe yiil Islel yaanggilin yalong-gpayo na vu yi be mem kawiiy yate va nipaya na.

³² + o 5:32 Sin 1:8*Vakasin-anjo hey aahe osin hey hango, de Vavi Vaambuung sen Anutu navu vu hil sen nanyend vuun-ato hôôvu hey having, ondeey hey oo monaanêel tatekin.”

Gamaaliel vu kôôvu kaansol-aso

³³ + o 5:33 Sin 7:54*Kaansol-aso lango vakasin sen Pita nêêl-anjo tombe kund sil alondpayo in nambe lanyiis sinaale-so be lanjimb pavis.

³⁴ + o 5:34 Sin 22:3*Lemu kaansol-asôônjôôto ti haale nambe Gamaaliel, yi Palisai ti ond tu kaputung tanasin dangga ti sen omaahonôôn pin

dako yii-ju haale lak, ond kandi naale de nêêl-
 ambe hil lako sinaale-so be lato lala voon vêêl e
³⁵ mem nêêl vu kaansol-aso nambe, “Ham Islel,
 ham awiingin nambe ambiing vati vu hil-anja,
 ond halingg-aso, ham akam bu nivasa le mem.

³⁶ + o 5:36 Sin 21:38*In bôôy ond Tiudas hatee
 yi lak in nambe naatu omaaho osin haale bop,
 tombe moow ngeeyaata lohvu 400 lawii-having
 yi, lemu gaaman layiis-ambe yimb, de hil pin sen
 lawii-having yii-to lavuuuh taale, de silanêênd kul
 nôôn ma.

³⁷ + o 5:37 Luk 2:1-2*De vu taamusin hôôk busin
 sen yêêv-aso navu kaavu hil haalend-ato, ond
 Yudas vu Galili hatee yi lak, om hako hil vaalu be
 lala in nambe lambiing ngaamong vu gaaman, le
 ma de layiis-ambe yimb having, de yite hil pin sen
 lawii-having yii-to lavuuuh taale.

³⁸ Om gêên-anjo sa naanêêl vu ham naambe
 ham gavuuuh hil-anja be lana, in naambe silate
 kul-anjo vu omaahonôôn akand ond le na paya,

³⁹ le naambe kul-anjo danggakook vu Anutu
 ond ham-ame alohvü nambe kawiyy e, in ham e
 naambe hil sen dayiis ngaamong vu Anutuu-to.”

Sinaale-so lapêêlis in lako nivaane lak Yesu haale

⁴⁰ + o 5:40 Sin 4:18*Tombe kaansol-asôônju
 lawii-having Gamaaliel-ate vakasin om lateey
 sinaale-so lalom-ambe laveek sil, de lavu kôôvu
 sil niwêêk lôôt nambe me-daanêêl tanasin jak
 Yesu haale jesin naah e, tonde lanêêl-ambe lato
 lala voon.

⁴¹ + o 5:41 Mat 5:10-12; 1Pi 4:13*Tombe sinaale-
 so lavuuuh kaansol-aso de lala osin kand vasa lôôt,

in Anutu yi nambe sil lalohvu om lienggis-ambe hil lawiing nindanjeen vu sil lak Yesu haale.

⁴² + o 5:42 Sin 9:22; 17:3*Tombe lak busin pin vu Anutu-te dumb bop alo de vu sil ambaand ond sil oo motaahu hil osin sil oo mondaneel Yesu Kaliste banye nivasa langaah.

6

Laholin hil namaavaalu be vindak yuuh in landôôvu sinaale-so

¹ + o 6:1 Sin 4:35*Yesu-te hil latu ngeeyaata lak, tombe vaalu sen dakaas lavand Glik-ato dayi vaalu sen dakaas lavand Hibluu-to paya lak busin pin sen datiyy va yuuh amêê-to nambe, “Ham akam nalingin heyaneeng vehaahôôv-aso.”

² Om sinaale-so nomaayuuuh-ambe laam yuuhatato lateey Yesu-te hil pin lalaam, le mem lanêel vu sil nambe, “Me-lohvu nambe hey oo monggatiyy vanôôn-ande hey gavuuh Anutu-te vakasin e.

³ + o 6:3 1Ti 3:7*Om halingg-aso, ham anggolin hamate hil sen hil pin dayi sil anivasaa-to namaavaalu be vindak yuuh, ond hil sen Vavi Vaambuung hôôvu sil osin sil alundkook anivasa, be yiyy gatung sil oo ganggin kul sil gatiyy va yuuh ame nivalok,

⁴ de hey-anjo yoo monaanohak osin hey monaanêel Anutu-te vakasin.”

⁵ + o 6:5 Sin 8:5*Tombe hil pin sen lasupinanjôoto lango vakasin-anjo be nivasa, om laholin Stiven in yoo wii-having niwêek-ambe Vavi Vaambuung hôôvu yi, de laholin Pilip ayuuh Plokolas, de Naikena yuuh Timon, de Pamemas ayuuh

Nikolas. Nikolas-anjo yi vu Antiok ond bôôy hilin lopayo be lukalaam having Yuda-so.

⁶ + o 6:6 Sin 13:3; 14:23*Tombe lalaah hil-anjo lala daale sinaale-so mend-ambe sinaale-so lalohak lung la, tonde lambe namand ak sil.

⁷ + o 6:7 Sin 2:41; 16:5*Ke, om Anutu-te tanasin tu ahepataas ak, tombe hil Yelusalem ngeeyaata latu Yesu-te hil, tonde yik kul vaha sen datung salivangin-ato ngeeyaata lawii-having.

Yuda lalôôh Stiven

⁸ + o 6:8 Sin 2:43*Stiven-anjo omaaho niwêêk bopaata osin samu samu danggakook, de nawiing taahu taahu bopaata osin niwêêk-ambe hil dayi,

⁹ tombe hil vaalu kandi be sil o Stiven-aso lanêêl sil in tanasin. Sil vaalu vu Sailini osin Aleksandlia, de sil danêêl silate dumb nambe hil sen lavu vêêl sil vêêl in omaaho ango namand lung laa-to silate dumb. De sil vaalu vu Silisia osin Esia having.

¹⁰ + o 6:10 Luk 21:15*Om sil o Stiven-aso lanêêl sil, le ma de Vavi Vaambuung vu kakook anivasa vu Stiven om hil-ame lalohvu yite vakasin e.

¹¹ + o 6:11 Mat 26:59-61*Tombe lala lanêêl hôôk hil vaalu ahend nambe daanêêl vakasin tatuhin jak yi naambe, “Hey hango de nêêl Mose yuuuh Anutu pale.”

¹² Mondanêêl atombe vakasin-anju kund hil pin alondpayo, om himbop-aso tanasin dangga-so lala lalôôh Stiven, de sil laandiyy-ambe lala vu kaansol-aso,

¹³ + o 6:13 Jer 26:11*tombe lanêêl vu tatuhin ambu-so vaalu om lalaam-ambe lanêêl nambe,

“Omaahôô-jo yoo monanêêl vakasin anipaya lak taaku vaambuung-anjo osin Mose-te tanasin,

¹⁴ de hey hangoyin nêêl nambe Yesu Nasaal e kawiyy dumb-anjo de gilin tanasin sen Mose vu vu yiyy-ato.”

¹⁵ Tombe kaansol-aso hil pin sen dandôô-juuto ond sil amend la vu Stiven niwêek lôôt e layi de mekaalus lohvu angela me.

7

Stiven nêêl yite vakasin vu kaansol-aso

¹ Kul vaha sen datung salivangin-ato silate yêêv bop lingin Stiven nambe, “Vakasin-anju keen a?”

² + o 7:2-5 Jen 11:31-12:7*Tombe Stiven nêêl vu sil nambe, “Halingg-aso mangg-aso, ham gango sate vakasin e. Vu bôôy yate himbop Abalaam naahen nando Mesopotemia de me-la nando Halan e, tombe melangaah danggakook Anutu taato yi vu,

³ be nêêl vu yi nambe, ‘Onggavuuuh gate taaku nanjip osin gate hil mando, de gana taaku ti soo le taato vu hong.’

⁴ Tombe Abalaam havuuuh hil Kaldia-te taaku de la nando Halan, tonde mangganaan yimb lung la le mem Anutu hakoseey yi vuu-ju be lom nando taaku sen gêen ham nandôô-jo.

⁵ + o 7:5 Jen 15:18; 17:8*De Anutu me-vu ngaanggis daka vu Abalaam in nambe yoo yinêên nivalok e, malis lôôt, lemu Anutu nêêl nambe taamusin e mem, le bu ngaanggis-anjo vu yi osin yite hil vu taamusin in naatu silate ngaanggis.

Busin-anju Abalaam noow ma, de Anutu nêêl vakasin-anjo,

⁶ + o 7:6 Jen 15:13-14; Eks 12:40*ond nêêl nambe, ‘Gate hil vu taamusin le lana mando hil bamaan-ate taaku, be daatu silate hil kul vaha malis amu, de lambiing nindanjeen vu sil lôôt nohvu

ta 400.’

⁷ + o 7:7 Eks 3:12*De Anutu nêêl having nambe, ‘Hil sen lambiing nindanjeen vu sil-ato, ond sale aambu nyevahaan naatovu sil jung na le mem gate hil e lanom-anjo be lanohak vu sa vu taakuujo.’

⁸ + o 7:8 Jen 17:9-14; 21:4*Tonde Anutu nêêl vu Abalaam nambe galaah unoopasiv anind naavi in taato naambe latu Anutu-te hil, om vu taamusin sen Abalaam hako noow Isak, tombe busin namaavaalu be vindak yaal lung la le mem halaah ninaavi. Isak-anju noow Yaakop, de Yaakop noow-aso ond yate danggakook-aso nomaayuuhambe laam yuuh,

⁹ + o 7:9 Jen 37:11,28; 39:1-3,21-23*tombe yate danggakook-asôônju londpayo nipaya vu Yusep om lala lavu be hil laanggo de lako be lala Ijip. Lemu Anutu nando having yi

¹⁰ + o 7:10 Jen 41:37-44; Saam 105:21*om vu vêêl yi in va nimeen pin, de samu yi tombe Ijip-ate omaaho lulemak Pelo yi nambe omaaho osin lukook anivasa, om holin yi be tu Ijip-ate yêêv bop osin hanggin Pelo-te bayêên ayuuh va pin.

¹¹ + o 7:11 Jen 41:54*“Tonde meep bopaata tovu Ijip osin taaku Kanaan pin, tombe yate himbop-asôônju dando meep-ande vanôôn ma, om latovu

nimeen bopaata.

¹² + o 7:12 Jen 42:1-5*Lemu Yaakop hango banye nambe vanôôn nando Ijip, om nêêl-ambe yate himbop-asôônju lala nyendoos.

¹³ + o 7:13 Jen 45:1-4,16*Tonde lalaah balon ango yesin atombe Yusep nêêl yi langaaah vu halindin, tombe mem Pelo lak Yusep-ate halindin anind.

¹⁴ + o 7:14 Jen 45:9-11; 46:27*De Yusep nêêl vakasin la vu mangganaan Yaakop nambe gaving yite hil pin-ambe lanaam vu yi, ond hil-anju pin lohvu 75.

¹⁵ + o 7:15 Jen 46:1-7; 49:33*Yaakop la hato nando Ijip vêêl e mem yimb, de yate himbop-asôônju layimb having,

¹⁶ + o 7:16 Jen 23:2-20; 33:19; Jos 24:32*tombe laaku sil anind naavi be lalaah lambe neep hôôk lavandangga vu Sekem sen bôôy Abalaam vaanggo lak mone vu Hemo noondin-aso vu Sekem-ato.

¹⁷ + o 7:17-18 Eks 1:7-8*“Tonde busin sen Anutu navu biing vakasin sen nêêl vu Abalaam bôôy-ato nôôn jak nambe, ‘Gate hil vu taamusin le lanomanjo be lanohak vu sa vu taakuu-jo’ ond ngaaho lak, de hil Islel datu ngeeyaata nalak vu taaku Ijip-ambe

¹⁸ tok laam busin sen lulemak ti yoo nindoos lukalaah-ambe hanggin taaku Ijip-ato. Lulemak tii-ju doosin Yusep-ate dangga,

¹⁹ + o 7:19 Eks 1:10-22*om tatuhin yate hil-ande nawiing nindanjeen vu sil nambe sil gaate noondin kaangêêndak na taavêêt alo be lanjimb.

²⁰ + o 7:20 Hiblu 11:23; Eks 2:2*De Mose tang-

ganaan hako yi, tombe yi nambe yoo nivasa lôôt, om yoo mondanggin hôök bayêen alo lohvu kwaav yaal,

²¹ + o 7:21 Eks 2:3-10*tonde mem lala lambe neep hôök bel nanyendangga, tombe sim Pelo nowaavêh hako yi be la vaat tu noow-ambe bop ak.

²² Tombe sil taahu Mose hôök hil Ijip-ate kakook anivasa pin, be tu omaaho nanêel vakasin osin nawiing kul aniwêek.

²³ “Mose-te ta doo-yuuuh lung la, tombe ka vu nambe na ji yite halindin-aso Islel.

²⁴ + o 7:24-29 Eks 2:11-15,21-22*Tombe sim yi de Ijip ti nawiing nindanjeen vu Islel ti, om hôôvu Islel-ambe vu nyevahaan vu Ijip tii-ju de yiis-ambe yimb.

²⁵ Tombe ka vu nambe yite hil lalak ni nambe Anutu holin yi lung la in dôôvu sil, le ma de sil doosin.

²⁶ Tonde samiinaanôôn atombe Mose laah valup e yi de omaaho yuuuh mondayiis yuuuh, tombe wiingin nambe bu mamaal vu yuuuh om nêel vu yuuuh nambe, ‘Maayuuuh, muuh halim dangga timu, le nambe tana mawiingin ambiing muuh paya?’

²⁷ Lemu omaaho sen yoo wiing ngaamong munggin vu halii-to, ond vakôôh Mose la de nêel vu nambe, ‘Lati hatung hong in nambe onaatu yêêv-ambe ongganggin hey?’

²⁸ Mak gawiingin nambe ganyiis sa naambe vasêen gayiis Ijip tii-to?’

²⁹ + o 7:29 Eks 18:3-4*Nêel nambêênu tombe Mose pak-ambe la tu bamaan nando hil Midian-

ate taaku, tombe hako vêêh-ambe hako noow moow yuuuh vuuh-ju.

³⁰ + o 7:30-35 Eks 3:1-10*“Nando ta doo-yuuuh vu Midian lung la, tombe sim busin ti la taaku lum-balaamb ngaaho vu kandu Sinai, tombe angela ti la hato vu hôök kin mala, ond kin-anju natum hôök haah aniyin ti.

³¹ Mose yi kin-anju tombe vindis lôôt, om la ngaaho in nambe ji nivasa, le sim Omaaho Bop lava laam vu yi nambe,

³² ‘Gate himbop-aso bôôy silate Anutu sa. Abalaam ayuuuh Isak-ande Yaakop yaalate Anutu sa.’ Tombe Mose hees-ande yêênin lôôt nambe me-ji le,

³³ le Omaaho Bop nêêl vu nambe, ‘Okavaayin suul na in taaku sen onaalêê-ja ond taaku vaambuung.

³⁴ Saahe davu nivaane lôôt vu sate hil sen dando Ijip-ato, de sa hango silate susin lung la, om saalukalaam in saambu vêêl sil in nimeen-anju, om saambe gana Ijip.’

³⁵ “Mosêê-jo ond bôôy sil mahôôh yi nambe, ‘Lati hatung hong in nambe onaatu yêêv-ambe ongganggin hey?’ Ond omaahôô-ju Anutu wiing angela la hato vu yi hôök haah aniyin alôô-to, tombe angela wiing-ambe la lohvu yêêv bop osin omaaho sen dôôvu hil-ato.

³⁶ + o 7:36 Eks 7:3; 14:21; Nam 14:33* Mose giiy sil-ambe lala de wiing taahu taahu bopaata osin niwêêk vaha vaha vu Ijip de vu Lôôy Hees, tonde vu taaku lum-balaamb lohvu ta doo-yuuuh.

³⁷ + o 7:37 Sin 3:22* Mosêê-ju ond yik nêêl vu hil Islel nambe, ‘Anutu yoo le golin ham o halim-aso

ti naatu hamate omaaho ti in naanêél Anutu-te
vakasin langaah naambe sen holin saa-to.'

³⁸ + o 7:38 Eks 19:3; Diu 5:5; 9:10; Sin
7:53*Mosêê-ju ond yik nando having hil Islel vu
taaku lumbalaamb. Nando having yate himbop-
aso bôôy de angela sen nêél vakasin vu yi
vu kandu Sinaii-to, ond hako Anutu-te vakasin
metumin-ate be vu vu yi.

³⁹ + o 7:39 Nam 14:3*Lemu yate himbop-aso
bôôy nind bay a nambe sil-ame gango lava le,
malis. Sil kalêêh lava de lahilin londpayo laah vu
Ijip,

⁴⁰ + o 7:40-41 Eks 32:1-6,23*de lanêél vu Aalon
nambe, 'Osamu heyate anutu heey in daanggiy
hey, in Mose sen giy hey vu Ijip-ambe hey alaam-
anjôôto, ond hey doosin mak vaati wiing.'

⁴¹ Om lanêél atombe sil samu kao noow ti
kanu, be latung salivangin osin lapêêlis vu silate
anutu tatuhi vaha sen sil oo samu lak namand-
anjuuto.

⁴² + o 7:42 Jer 19:13; Emo 5:25-27*Tombe Anutu
haluuh dami vu sil, de hilin sil alondpayo la vu
taaku mekaalus ayuu kwaav-ande matam-ambe
mondalohak vu, lohvu Anutu-te vakasin sen hil
lanêél langaah bôôy-ambe neep hôôk kaapiya
nambe,

'Ham Islel, vu bôôy ham nando taaku lumbala-
aamb lohvu ta doo-yuuh, de ham ayiis kao
osin bik sipsip-ambe ham hatung salivan-
gin. Mak ham awiing vaa-ju vu sa? Malis.

⁴³ De anutu tatuhi vaha sen haale nambe
Molok-ato ond ham vaaku yite dumb sel having
anutu tatuhi vaha Lepan-ate matam kanu be va
kanuu-ju ham samu be ham alohak vu, om sale

gakoseey ham ana mando dinaandiin na Babilon vaalu.'

⁴⁴ + o 7:44 Eks 25:40*“De Anutu-te dumb sel sen nando hôök yate himbop-aso lavuun bôôy vu taaku lumbalaamb-ato, ond taato nambe Anutu nando having sil. Dumb-anjo Anutu nêêl vu Mose, tombe yik sil samu lohvu sen Mose yi kanuu-to.

⁴⁵ + o 7:45 Jos 3:14-17; 18:1; 23:9*Dumb sel-anju yate himbop-aso vu taamusin lako lak-ambe lala having Yosua be lala lako hil bamaan-ate taaku, de Anutu hatiyy hil bamaan-anju lala vêêl in sil, de latung dumb sel-anju nando be tok laam Devit-ate busin having.

⁴⁶ + o 7:46 2Sml 7:1-16; Saam 132:1-5*Tombe Anutu yi Devit anivasa, om Devit kataangg Anutu in nambe jiinggaas e mem le daav bayêêl ti vu Yaakop-ate Anutuu-ju,

⁴⁷ + o 7:47 1King 6:1,14*le ma de Solomon haav.

⁴⁸ “Lemu Anutu baandoni me-nando hôök bayêêl sen omaahonôôn dahaav ak namand-ato le, lohvu omaaho ti nêêl Anutu-te vakasin langaah nambe,

⁴⁹ + o 7:49-50 Ais 66:1-2*‘Omaaho Bop nêêl nambe,
“Baandoni ond sate sia, de ngaanggis ond sa vahangg-ate in jambaale. Ham awiingin nambe andaav bayêêl nambe vaati vu sa?
De sa baangg sen sa sawaah-ato nando tana?

⁵⁰ Mak sa namangg-ame yoo samu va pin-anja le?”,

⁵¹ + o 7:51 Eks 32:9; Jer 9:26; Ais 63:10*“Ham alumkook aniwêêk, de ham alompayo mekanu osin ham nanyem doos. Ham oo monatiiy Vavi

Vaambuung nalak busin pin, om ham alohvu
hamate himbop-aso bôôy.

⁵² + o 7:52 2Kro 36:16; Mat 23:31*Hil sen danêêl Anutu-te vakasin langaah-ato ond ti tana nando bôôy-ambe hamate himbop-aso me-lawiing nin-danjeen vu le? Malis. Hil sen danêêl vakasin langaah nambe Omaaho Nivalok e naam-ato ond hamate himbop-aso bôôy layiis sil-ambe layimb, om

gêen ham oo anêêl yi langaah vu hil-ambe layiis-ambe yimb.

⁵³ + o 7:53 Sin 7:38; Gal 3:19; Hiblu 2:2*De ham-anjo ham hako tanasin vu angela-so, le ma de ham-ame samu le.”

Layiis Stiven ak tatuuh-ambe yimb

⁵⁴ + o 7:54 Sin 5:33*Lango vakasin-anju be kund sil alondpayo, tombe sil langa navund vu Stiven.

⁵⁵ + o 7:55 Mat 22:44; Sin 2:33-34; 5:31*Le Vavi Vaambuung hôôvu Stiven om valaah me lak baandoni, tombe yi Anutu-te nikaapulis osin yi Yesu naale Anutu nama vasa.

⁵⁶ + o 7:56 Kol 3:1*Tombe Stiven nêêl nambe, “Ham hil-e, saahe baandoni hataahin-ande Omaahonôôn Noow naale Anutu nama vasa.”

⁵⁷ Tombe lawiing lavand bopaata lôôt osin sil lavu jeen sil nanyend, de sil pavis-ambe lambuuh Stiven tatup,

⁵⁸ + o 7:58 Sin 22:20*de lakôôh-ambe la taaku nanyendangga in nambe lanyiis ak tatuuh-ambe jimb. De hil sen tatuuhin vakasin lak yii-to, ond lakaah silate lolop-ambe lala latung hôôk maang-gêêm ti haale nambe Saul vaha.

⁵⁹ + o 7:59 Saam 31:5; Luk 23:46*Tonde sil tanga Stiven lak tatuuh lôôt, de Stiven kataangg nambe, “Omaaho Bop Yesu, onggako sa kanungg naas.”

⁶⁰ + o 7:60 Luk 23:34*Tonde hatung kaatu be nêêl bopaata lôôt nambe, “Omaaho Bop, game gambu hôök silate nipaya nyevahaan e.” Nêêl nambêêñju tonde yimb la.

8

Saul nawiing nindanjeen vu hil bel-ate

¹ + o 8:1 Sin 7:58; 8:4; 11:19*Saul yi nivasa in layiis Stiven-ambe yimb. Tombe hôök busin-anju hil mondawiing nindanjeen vu hil bel-ate sen dando Yelusalem-ato, om hil bel pin lapak-ambe lavuuh taale lohvü Yudia osin Samaalia-te taaku pin, de sinaale-so yoo daahen dando Yelusalem.

² Hil anivasa vaalu sen kand navu sapa Anutuuto ond lahaav Stiven-ande lasu bopaata lak yi,

³ + o 8:3 Sin 9:1,13; 22:4; 26:9-11*tonde Saul monawiing nindanjeen vu hil bel-ate pin. Nalukala bayêen alo pin-ambe naandiiy moow ayuuuh vêêh danjeen-ambe la natung sil hôök kalaambus.

Lanêêl banye nivasa vu Samaalia

⁴ Hil pin sen lapak-ambe lavuuh taalêê-to ond latup hôök-ambe lanêêl banye nivasa langaah.

⁵ + o 8:5 Sin 6:5*Tombe Pilip la hato Samaalia-te taaku ti be nêêl Kalisi haale langaah vu sil.

⁶ Tombe hil ngeeyaata lôôt lango Pilip-ate vakasin, de layi taahu taahu niwêêk vaha vaha sen wiing-ato, be lawii-having yite vakasin osin londpayo timu.

⁷ + o 8:7 Mat 10:1; Mak 16:17*Tonde hil ngeeyaata sen mamu nipaya nahôôvu sil-ato, ond mamuu-ju dawiing lavand bopaata be lato dala, de hil ngeeyaata sen kook navu tasiis osin vahand anipayaa-to sil anind vasa nahôôk laah,

⁸ tombe hil sen dando taakuu-juuto londpayo nivasa lôôt.

⁹ De omaaho lôômb ti nando taaku Samaalia haale nambe Simon, ond yoo nako yi lak nambe yi omaaho bopaata. Tombe hil pin lavindis in yite kul,

¹⁰ hil malis osin hil yêêv pin lawii-having Simon-ate vakasin-ambe lanêêl nambe, “Omaahôô-jo Anutu-te niwêêk, danêêl nambe niwêêk bopaata.”

¹¹ Ond lavindis in yite kul mamu lôômb sen yoo nawiing boyambôôy-ato ondeey lawii-having lava.

¹² Lemu Pilip nêêl va sen Anutu nanggin yite hil-ato osin Yesu Kalisi banye langaah vu sil, tombe moow ayuuuh vêêh lawii-having-ambe lalipis bel.

¹³ Tonde yik Simon wii-having-ambe lipis bel lung la le mem taamuyin Pilip. Om Simon yi de Pilip wiing taahu taahu vaha vaha osin niwêêk bopaata, tombe vindis lôôt.

¹⁴ De sinaale-so vu Yelusalem ond lango banye nambe hil Samaalia lako Anutu-te tanasin ak, om lawiing Pita yuuuh Jon lala vu sil.

¹⁵ Yuuh latok lala be yuuuh lalohak in hil-anju nambe Vavi Vaambuung jakana sil,

¹⁶ in Vavi Vaambuung-ame lakala sil e, de lalipis bel lak Omaaho Bop Yesu haale mu.

¹⁷ + o 8:17 Sin 19:6*Om sinaale yuuh lambe namand ak sil atombe mem Vavi Vaambuung lakala sil.

¹⁸ Tombe Simon yi de sinaale yuuh lambe namand ak sil-ambe Vavi Vaambuung lakala sil, om hako mone be la vu yuuh

¹⁹ be nêêl nambe, “Mambu va niwêêk-anja vu sa gaving in naambe sa gambe namangg jak hil ond Vavi Vaambuung jakana sil.”

²⁰ Le Pita nêêl vu nambe, “Gambe omбаanggo Anutu-te samu samuu-jo jak mone, om gana menama osin gate mone.

²¹ + o 8:21 Saam 78:37*Vaa-jo game gate va le, malis lôôt. Anutu yi nambe galompayo menivalok e,

²² om ganggilin galompayo de onggaluuh damim vu gate va nipaya, de okataangg vu Omaaho Bop in kawiiy va sen galompayo yoo wiingin-ato na.

²³ + o 8:23 Hiblu 12:15*Saahe de galompayo nikalin lôôt de gate va nipaya duuh hong tatin.”

²⁴ Tombe Simon nêêl laah nambe, “Manohak na vu Omaaho Bop naambe va sen manêêl-anjaato me-naatovu sa le.”

²⁵ Sinaale yuuh lanêêl Omaaho Bop-ate vakasin langaah lung la, tonde yuuh lala in nambe lanaah Yelusalem, tombe sim yuuh lanêêl banye nivasa langaah vu Samaalia-te taaku ngeeyaata vu mopaatôôv.

Pilip nêêl tanasin vu yêêv Itiopia ti

²⁶ Omaaho Bop-ate angela ti nêêl vu Pilip nambe, “Okandi lak-ambe gana gato mop

lavuun sen vu Yelusalem-ambe la hato Gasaa-to.” Mopaatôôv-anju ond taaku lumbalaamb.

²⁷ + o 8:27 Ais 56:3-7*Om Pilip kandi lak-ambe la, tombe yi de Itiopia ti hato, ond hil Itiopiate kwin Kandesi yite yêêv bop sen nanggin yite kupak pin-ato, ond la lohak vu Yelusalem lung la,

²⁸ tonde hato laah in na, tombe monasevin omaaho sen nanêêl Anutu-te vakasin langaah-ato Yesaia-te vakasin lakando pêêt sen hôôs

naandiyy-ato.

²⁹ Om Vavi Vaambuung nêêl vu Pilip nambe, “Gana ngaaho vu omaahôô-ju be mana.”

³⁰ Tombe Pilip hatup-ambe la ngaaho vu, le hango de nasevin Yesaia-te vakasin, om lingin nambe, “Vakasin sen onasevin-anja, ond galak danggakook ani me malis?”

³¹ + o 8:31 Jon 16:13*Le omaahôô-ju nêêl laah vu nambe, “Sa jak ni in lati naanêêl vu sa? Omaaho ti naanêêl tatekin vu sa ond mem.” Om nêêl nambe Pilip jakana mando gaving yi.

³² + o 8:32 Ais 53:7-8*Ke, omaahôô-ju nasevin Anutu-te vakasin boow ti neep hôôk kaapiya nambe,

“Langgiyy yi be lala lohvu bik sipsip sen davu lanyiis-ambe jimb-ato, de lohvu bik sipsip noow sen daving nivalus-ande me-nasuuto, ond omaahôô-ju me-vakaas e.

³³ Tombe laanggôôl yi lôôt de me-lanêêl vakasin anivasa ti lak yi le. De yite hil moos dando tana in nambe yiyy naanêêl sil langaah? Malis, in havuuuh ngaanggis voon-anjo de la.”

³⁴ Tombe yêêv tii-jôôto lingin Pilip nambe, “Otakekin vu sa le, naambe Yesaia nêêl vakasin-

anjo ond yoo nêêl lak yi me nêêl lak omaaho
ango?”

³⁵ Om Pilip nêêl vakasin-anju be tatekin Yesu-te
banye nivasa langaah vu yi,

³⁶ + o 8:36 Sin 10:47*de yuuuh mondala be
lala lato bel ti, tombe yêêv tii-jôôto nêêl nambe,
“Angge, bel neep-anjo. Lohvu nambe ganjipis sa
pavis me malis?”

³⁷ [Tombe Pilip nêêl vu nambe, “Galompayo
wii-having keen lôôt ond hoow-o.” Le nêêl laah
vu nambe, “Saawii-having nambe Yesu Kalisi yi
Anutu Noow.”]

³⁸ Tonde nêêl vu yite omaaho sen nando having
yii-to be puvu hees tatin-ande hôôs naale, tonde
yuuuh Pilip laluus-ambe lalukala daale hôôk bel,
tombe mem Pilip lipis yi.

³⁹ + o 8:39 1King 18:12*Tonde yuuuh vu belalu be
lalakalaah atombe Omaaho Bop-ate Vavi Vaam-
buung vu vêêl Pilip la pavis, de yêêv-anjôôto me-
yi Pilip yesin laah e, om la osin lopayo nivasa lôôt.

⁴⁰ + o 8:40 Sin 21:8*Tonde Pilip yi nambe la hato
Asdot, tombe nêêl banye nivasa langaah lohvu
taaku pin-ambe tok la Sisalia.

9

Yesu hilin Saul alopayo (Sinaale 22:4-16; 26:9-18)

¹ + o 9:1 Sin 8:3*Saul nêêl niwêêk lôôt nambe
biing nindanjeen vu Omaaho Bop-ate hil de nyiis
sil-ambe lanjimb, om la vu kul vaha sen datung
salivangin-ato silate yêêv bop,

² be nêêl vu nambe kaavu kaapiya na nohvu hil Yuda-te dumb ti ti vu Damaskas naambe, “Saul naatovu moow ayuuh vêêh sen lawii-having Yesu-te tanasin-ato, ond talu sil-ambe gako na Yelusalem.”

³ Om Saul monala be la valup ngaaho vu Damaskas, tombe sim pavis atombe kin ti tum vu baandoni be têêlang ak yi,

⁴ tombe Saul lupake be la neep voon, tonde hango lava ti laam vu yi nambe, “Saul, nambe vaati sen goo monawiing nindanjeen vu saa-jo?”

⁵ + o 9:5 Sin 5:39; 1Ko 15:8*Tombe Saul lingin nambe, “Omaaho Bop, olati?” Le nêêl nambe, “Sa Yesu sen goo monawiing nindanjeen vu saa-jo.

⁶ Om okandi be gana bayêen e mem le daanêêl va sen gambiing-ato langaah vu hong.”

⁷ Hil sen laving Saul-ato, ond lango lavaa-ju lemu me-layi omaaho ti le, om lavand ma de yoo daale.

⁸ Tombe Saul kandi naale le ma de mekanu hôôk lôôt, om sil laliv namand hôôk-ambe lala Damaskas,

⁹ tombe nandôô-ju lohvu busin yaal osin mekanu, de me-ya vanôôn ayuuh me-num bel e.

¹⁰ Tonde Yesu-te omaaho ti nando Damaskas haale nambe Ananaias, ond nando le yi taahu taahu ti, de Omaaho Bop nêêl vu nambe, “Ananaias.” Tombe lienggis nambe, “Omaaho Bop, saa-jo.”

¹¹ + o 9:11 Sin 21:39*Tombe Omaaho Bop nêêl vu nambe, “Okandi jak-ambe gana mopaatôôv sen danêêl nambe Nivalok-ato, tombe onaatovu hil Taasas ti haale nambe Saul, ond monalohak

nando hôôk Yudas-ate bayêên,

¹² de yi taahu taahu ti de omaaho ti haale nambe Ananaias lukalaam umakalo be hambe nama lak yi in nambe me naatum naah.”

¹³ + o 9:13 Sin 8:3*Le Ananaias nêêl nambe, “Omaaho Bop, sa hango de hil ngeeyaata danêêl nambe omaahôô-ju nawiing nindanjeen lôôt vu gate hil vu Yelusalem,

¹⁴ + o 9:14 Sin 9:1-2,21; 1Ko 1:2*tonde yêêv-aso salivangin-ate lanêêl lung la nambe yoo talu hil pin sen lavand nahôôk ohaalem vuu-jôôto.”

¹⁵ + o 9:15 Sin 25:13,23; 27:24; Lom 1:5*Lemu Omaaho Bop nêêl vu nambe, “Gana. Saaholin yi be tu sate hil kul vaha lung la in gako sa haalengg na vu omaahonôôn pin, de vu lulemak-aso osin hil Islel gaving.

¹⁶ + o 9:16 2Ko 11:23-28*De nimeen pin sen naatovu yi jak sa haalengg-ato ond soo le naanêêl taato vu yi.”

¹⁷ Om Ananaias kandi be la hato lukala bayêên alo, tombe hambe nama lak Saul de nêêl vu nambe, “Hali Saul-e, Omaaho Bop Yesu sen taato yi langaah vu hong vu mop lavuun-ato, ond nêêl-ambe sa laam in nambe gamem naatum naah, de Vavi Vaambuung e naam dôôvu hong.”

¹⁸ Om pavis atombe va sen nando hôôk Saul amêê-to lumbin nambe paahuung anikapis-ato, tonde

Saul ame tum laah, tombe kandi lak-ambe lipis bel lak Yesu haale,

¹⁹ de ya vanôôn-ambe sake lukalaah.

Saul nêêl banye nivasa langaah vu Damaskas

Saul nando having Yesu-te hil vu Damaskas-anju busin heey,

²⁰ ond pavis-ambe nêêl Yesu-te banye nivasa langaaah hatup hôôk hil Yuda-te dumb ti ti nambe, "Yesuu-ju ond Anutu Noow yi."

²¹ + o 9:21 Sin 8:3; 26:10*Tombe hil vaalu sen lango yite vakasin-anjuuto sil pin lavindis lôôt, de lanêêl nambe, "Ayêê, omaahôô-ja nayiis hil sen lavand nahôôk Yesu haale vu Yelusalem-ato, ond laam in naanduuuh hil vuu-jo de gako sil lana vu yêêv-aso salivangin-ate, le mak nambe vaatii-jo?"

²² + o 9:22 Sin 17:3; 18:5,28*Lemu Saul-ate niwêêk tu bopaata lak, om nêêl taato vu sil nambe Yesuu-ju yi omaaho sen Anutu yoo holin yi vulôôt-ato keen, tombe hil Yuda sen dando Damaskas-ato lango yite vakasin-anju, tombe silanêênd vakasin sen daanêêl naah vuu-to ma.

Hil Yuda ahend kalin vu Saul om pak

²³ + o 9:23 Sin 23:12*Tombe busin ngeeyaata la lung la, le mem hil Yuda lasupin-ambe lanjôôy vakasin nambe lanyiis Saul-ambe jimb.

²⁴ Saul hango silate vakasin-anju banye nambe hil Yuda dambuuuh mop avi lohvü taaku pin hôôk busin-ande langaaah in nambe lanyiis-ambe jimb,

²⁵ + o 9:25 2Ko 11:32-33*om Saul-ate hil sen dando having yii-to lako yi hôôk busin-ambe lalakala kaatum alu baandoni, tombe latung lukala nando hôôk jaambang bopaata ti, le mem sil taaluuhin yi la voon-ambe la.

Saul la nando Yelusalem

²⁶ + o 9:26 Gal 1:17-19*Saul la hato Yelusalem-ambe wiingin nambe na mando gaving Yesu-te

hil, le sil pin layêénin Saul lôôt in me-lawii-having nambe Yesu-te omaaho yi le.

²⁷ + o 9:27 Sin 9:4,20; 1Ko 9:1; 15:8*Lemu Banabas giiy-ambe yuuh lala vu sinaale-so, de hatulin vakasin sen Saul yi Omaaho Bop vu mop laviun-ambe Omaaho Bop vakaas vu yîi-to, osin nêél vakasin sen Saul nêél Yesu haale langaah vu hil vu Damaskas-ande me-yêénin-ato le.

²⁸ Saul nando having sil vu Yelusalem, ond yoo nêél tanasin lak Omaaho Bop haale niwêék lôôt de me-yêénin e.

²⁹ Tonde having Yuda vaalu sen dakaas Glik lavand-ato, ond sil papenggin sil in tanasin, tombe sim hil-anju lawiingin nambe lanyiis Saul-ambe jimb.

³⁰ + o 9:30 Sin 11:25; Gal 1:21*Le sim Omaaho Bop-ate hil langoyin banye tombe langgiy Saul-ambe lala Sisalia, le mem lawiing yi vuu-ju be la Taasas.

³¹ Tombe mem hil bel-ate vu Yudia yuuh Galili, de taaku Samaalia pin, dando nivasa de ngaa-mong ayuuh ame ma. Layêénin sil vu Omaaho Bop de Vavi Vaambuung vu niwêék vu sil, tombe mem hil bel-ate latu ngeeyaata lak lôôt.

Pita wiing-ambe Inias anivasa lak

³² Pita monatup hôök lohvü taaku pin-ambe la hato vu Omaaho Bop-ate hil sen dando Lidaa-to,

³³ tombe sim tovu omaaho ti haale nambe Inias vuu-ju, ond kook tasiis-ande yoo neep hôök bayêén alo lohvü ta namaavaalu be vindak yaal lung la.

³⁴ Tombe Pita nêêl vu nambe, “Inias, gêên Yesu Kalisi wiing-ambe ganim vasa lak, om okandi jak-ambe goo gatongin gate kaanye.” Tombe kandi lak pavi-vasa.

³⁵ Tombe hil Lida osin hil vu Salon pin layi be lahilin londpayo la vu Omaaho Bop.

Pita wiing-ambe Tabita kandi lak laah

³⁶ Vêêh ti wii-having Yesu nando Jopa haale nambe Tabita, Glik lavand nambe Dokas, ond lak busin pin yoo navu samu hil, de nahôôvu hil sen dativak in va yuuuh amêê-to.

³⁷ Tombe sim busin ti tombe nilak-ambe yimb, om lalipis ninaavi de lambe lakala neep ak bayêen alo ango baandonii-to.

³⁸ Tonde Yesu-te hil langoyin nambe Pita nando Lida sen neep ngaaho vu taaku Jopaa-to, om lawiing omaaho yuuuh lala vu be yuuuh kataangg yi nambe, “Ganaam pavis vu hey e.”

³⁹ Om Pita kandi lak-ambe la having yuuuh. La hato tombe lako yi be lalakala bayêen alo baandoni, tombe veahaahôôv-aso pin lako lolop ayuuuh ame sen Dokas nando having sil bôôy-ambe duuh-ato, ond sil taato vu Pita de lasu lak yi.

⁴⁰ + o 9:40 Mak 5:40-41*Tombe Pita hatiiy hil pin lala voon, de hatung kaatu be lohak, tonde hilin laah vu omaahonôôn yimbin-ato be nêêl nambe, “Tabita, okandi.” Tombe vêêh-anjuuto me tum-ambe yi Pita de kandi nando,

⁴¹ tombe Pita laandiiy hôôk nama be kandi naale, de teey veahaahôôv-aso osin Omaaho Bop-

ate hil pin lalaam-ambe taato vu sil nambe Dokas
ame tum laah.

⁴² Tombe hil Jopa pin lango vakasin-anjôôto
banye, om hil ngeeyaata lawii-having Omaaho
Bop.

⁴³ + o 9:43 Sin 10:6*Tonde Pita nando Jopa busin
ngeeyaata having omaaho ti haale nambe Simon
sen nawiing kul bik naavii-to.

10

Angela nêêl vakasin vu Koniliias

¹ + o 10:1 Mat 8:5; Sin 27:1,3*Hil Lom ti nando
Sisalia haale nambe Koniliias, ond tu hil ngaa-
mong vaha doo-nomaayuuh-ate yêêv sen danêêl
sil nambe Itaalii-to.

² Ond omaahôô-ju having yite hil-ambe
dayêênin Anutu, tonde yoo ka navu Anutu be
nalahak lak busin pin, de nahôôvu hil Yuda sen
dativak in va yuuh amêê-to.

³ + o 10:3 Sin 3:1*Tombe busin ti hôôk taaku
me yaal, ond omaahôô-ju nando le yi taahu taahu
ti, de Anutu-te angela ti lukalaam-ambe taato yi
langaah, be nêêl vu nambe, “Koniliias.”

⁴ Tombe Koniliias yi be yêênin lôôt tombe nêêl
nambe, “Omaaho Bop, nambe vaati?” Tombe
angela nêêl nambe, “Gate lohakin osin samu
samu sen onahôôvu hil sen dativak in va yuuh
amêê-to, ond vaa-ju banye tok laam-ambe Anutu
ka navu nando.

⁵ Om peey gambiing-ambe hil lana gako
omaaho ti haale nambe Simon, de haale ango
nambe Pita, vu Jopa be naam.

⁶ + o 10:6 Sin 9:43*Omaahôô-ju la nando having lengo Simon sen nawiing kul bik naavii-to, ond yite bayêen nando ngaaho vu lôôy nanyendangga.”

⁷ Angela nêêl vakasin vu Konilias lung la de la, le mem Konilias teey yite kul vaha yuuh laving hil ngaamong vaha ti sen yoo ka navu Anutu be nando having Konilias lak busin pin-ato,

⁸ tombe Konilias nêêl vakasin-anju tatekin vu yaal lung la le mem wiing yaal lala Jopa.

Pita yi taahu taahu ti

⁹ Tombe omaaho yaal-anjuuto mondala be lala deep mop lavuun, de langaah ak e mem yaal lala be latok lala bayêen Jopa. De taaku me laam naale lavuun, tombe Pita lakala bayêen alu baandoni in nohak.

¹⁰ Tombe yimb ahe be wiingin nambe ja vanôôn, le daahen dayêeh yite vanôôn, tonde sim Pita yi taahu taahu ti,

¹¹ + o 10:11 Sin 11:5-17*ond yi de baandoni hataahin-ande vati nambe sen tôômb bopaata ti luus-ambe nalaam, ond landuuuh hôôk nanyendangga yumbeyuuuh de sil taaluuhin-ambe nalaam voon,

¹² tombe vahivak vaha vaha sen naale nala de nahaavak osin manak pin nando hôôk tôômb-anju lopayo.

¹³ Tombe lava ti laam nambe, “Pita, okandi be ganyiis vahivak-anja be gangga.”

¹⁴ + o 10:14 Lev 11:1-47; Esi 4:14*Lemu Pita nêêl laah nambe, “Omaaho Bop, malis lôôt. Va nipaya osin va bamaan nambêenja ond same naha bôôye.”

¹⁵ + o 10:15 Mak 7:15,19*Tombe lava ango lo-hato balon ango having nambe, “Va sen Anutu samu be nivasa lak-ato, ond game ganjêénin naambe nipaya le.”

¹⁶ Omaaho Bop nêêl vakasin nambêénju balon yuuh having tu balon yaal, le mem tôômb-anjuuto lak-ambe laah baandoni pavis,

¹⁷ tombe Pita nando ka monavu va sen yii-to nambe, “Mak peey e vaa-ju danggakook nambe va?”

Ka monavu nambêénju tonde Koniliás-ate omaaho yaal sen wiing yaal lalaam-ato, ond lato be lalingin hil, de mondalaam-ambe lato daale Simon-ate bayêén vinavi,

¹⁸ tombe lateey-ambe lalingin nambe, “Simon sen haale ango nambe Pitaa-to ond laas nandôôja me malis?”

¹⁹ + o 10:19 Sin 11:12; 13:2*Tombe Pita yoo nando ka monavu taahu taahuu-ju, le Vavi Vaambuung nêêl vu nambe, “Onggango omaaho yaal lato davu salo hong ani,

²⁰ om okandi jak-ambe ganduus-ambe gana gaving yaal, de game gakam yu-yuuh e, in soo aawiing yaal lalaam.”

²¹ Om Pita luus-ambe laah hato vu yaal-ambe nêêl nambe, “Omaaho sen ham navu salo yii-to ond yik saa-jo. De ham alaam in vakasin va?”

²² + o 10:22 Sin 10:1-2*Le yaal lanêêl laah vu nambe, “Koniliás sen hil Lom ngaamong vaha doo-nomaayuuh-ate yêêv-ato, ond wiing waay alaam. Omaahôô-ju omaaho nivalok yoo nayêénin Anutu, de hil Yuda pin layi yi nivasa, ond angela vaambuung ti nêêl taato vu nambe

biing hil lanaam in gako hong-ambe gana baan,
in gango vakasin vu hong.”

²³ + o 10:23 Sin 10:45; 11:12*Om Pita nêêl-ambe
yaal lalukala deep having yi, de samiinaanôôn
atombe sil pin kandi be lalaah, tombe Omaaho
Bop-ate hil vaalu vu Jopa lala having.

Pita la Koniliyas ambaan

²⁴ Sil mondala be lala deep busin ti vu mop
lavuun, le mem sil latok lala Sisalia. Tonde
Koniliyas teey yite hil sen sil dangga timuu-to osin
yite nipaapu vaalu sen ahe naving sil-ato, be sil
lasupin-ambe dando mondanggin Pita.

²⁵ Tonde Pita lukala umakalo tombe Koniliyas
laam-ambe hato pataav baambu neep voon hôôk
Pita vaha in nambe gako haale jak,

²⁶ + o 10:26 Sin 14:13-15; Taato 19:10*le ma
de Pita laandiiy hôôk nama de nêêl vu nambe,
“Okandi jak, yik sa omaahonôôn nambe hong-
anja.”

²⁷ Pita monakaas vu be yuuuh lalukala umakalo,
tombe sim yi de hil ngeeyaata lasupin-ambe
dando.

²⁸ Tombe Pita nêêl vu sil nambe, “Ham oo
alak ni nambe hil Yuda danêêlin nambe sil-ame
mando gaving hil vaalu osin me-lana vu sil e,
malis lôôt. Lemu sak Anutu nêêl taato vu sa
nambe same naanêêl omaaho ti naambe nipaya
me nindanjeen e, malis lôôt.

²⁹ Om gêen ham ateey sa be sa laam-anjo ond
same aayêênin e, om saanjingin ham naambe
ham ateey sa laam in vakasin vaati?”

³⁰ + o 10:30 Sin 1:10; 3:1*Tombe Koniliyas nêêl
nambe, “Gêen busin yumbe yuuuh lung la, ond

busin ti nyendoos-ato hôök taaku me yaal nambe sen gêen-anjo, tombe sa monaalohak hôök sate bayêen alo, le sim saahe omaaho ti osin yite tôomb ayuuuh ame nivalôôy lôôt, ond hato naale hôök sa mengg,

³¹ be nêêl nambe, ‘Koniliyas, Anutu hango gate lohakin, de ka navu gate samu samu sen on-ahôôvu hil in dativak in vaa-to,

³² om gambiing hil lana Jopa in gako Simon sen haale ango nambe Pitaa-to, ond la nando having lengo Simon sen nawiing kul bik naavii-to, ond yite bayêen nando ngaaho vu lôôy nanyendangga.’

³³ Om saanêêl pavis-ambe hil lalaas in hong, le gawiing nivasa be galaam, om gêen hey pin sen hey alaam nandôô-jo lak Anutu haale, hey aawiingin nambe gango vakasin pin sen Omaaho Bop nêêl vu hong nambe onaanêêl-ato.”

Pita wiing tanasin hôök Koniliyas ambaan

³⁴ + o 10:34 1Sml 16:7; Lom 2:11; Gal 2:6*Tombe Pita nêêl nambe, “Gêen-anjo sa lak ni keen lôôt nambe Anutu me-yoo ka navu hil dangga timu le, ma.

³⁵ + o 10:35 Jon 9:31*Yik omaahonôôn pin, ti nambe jêenin Anutu de biing va na nivalok, ond le ji yi nivasa.

³⁶ + o 10:36 Saam 107:20; Ais 52:7; Taato 17:14*De Anutu wiing-ambe Yesu Kalisi sen tu yiil pin-ate Omaaho Bop-ato, ond nêêl banye nivasa osin vakasin melaas langaah vu hey Islel.

³⁷ + o 10:37 Mat 4:12-17*De ham oo alak ni nambe Jon nêêl tanasin lak belipisin vêêl e, mem

Yesu Kalisi-te vakasin-anju hil lanêêl vu Galili be la lohvu taaku Yudia pin.

³⁸ + o 10:38 Mat 3:16; Luk 4:17-20*In Yesu Nasalet ond Anutu yoo holin yi be vu Vavi Vaambuung osin niwêêk vu yi, tombe la lohvu taaku pin-ambe nahôôvu hil, de navu samu hil sen Saalang navu nimeen vu sil-ato be nind vasa nalak laah, in Anutu nando having yi.

³⁹ De va pin sen wiing vu hey Yuda-te taaku de vu Yelusalem, osin layiis yi lakala haah-ambe yimb-ato, ond hey aahe, ondeey hey naanêêl tatekin-anjo.

⁴⁰ + o 10:40 1Ko 15:4-7*Lemu busin yaal lung la le mem Anutu wiing-ambe kandi lak laah-ambe taato yi langaah,

⁴¹ + o 10:41 Jon 14:19,22-24; 15:27; Sin 1:8; Luk 24:42-43*ond me-taato yi vu hil Yuda pin e, malis, yoo taato yi vu hey sen bôôy Anutu holin hey nambe hey naanêêl yite vakasin-ato. De sen kandi lak laah vu hil yimbin-atêêto ond hey aha vanôôn osin hey aanum having yi.

⁴² + o 10:42 Sin 17:31; 2Ti 4:1; 1Pi 4:5*De nêêl vu hey nambe hey naanêêl tatekin osin hey naanêêl langaah vu hil naambe Anutu holin yi lung la in gangoyin hil yimbin osin metumin-ate vakasin, be golin nivasa osin nipaya.

⁴³ + o 10:43 Ais 33:24; 53:5-6; Jer 31:34; Dan 9:24*Ond hil lanêêl Anutu-te vakasin langaah lak omaahôô-ju nambe hil pin sen londpayo la timu vu yii-to, ond haalêê-ju le kawiiy silate nipaya na.”

Vavi Vaambuung lakala hil vaalu sen sil-ame

Yudaa-to

⁴⁴ + o 10:44 Sin 11:15; 15:8*Pita naahen monanêél vakasin atonde Vavi Vaambuung lakala hil pin sen dando mondango vakasin-anjuuto.

⁴⁵ Tombe hil Yuda sen lawii-having Yesu be sil ahondoos Pita-so lalaam-ato, ond lavindis lôôt in Anutu vu Vavi Vaambuung lakala hil vaalu sen sil-ame Yudaa-to having.

⁴⁶ + o 10:46 Sin 2:4; 19:6*Tombe lango de hil-anjuuto lakaas bayêén bu ti ti lavand-ambe dako Anutu haale lak, om Pita nêél nambe,

⁴⁷ + o 10:47 Sin 8:36*“Lati le naanêélin hil-anjo naambe me-lanjipis bel e, in lako Vavi Vaambuung lung la, yik nambe sen yiyy hakôô-to.”

⁴⁸ + o 10:48 Sin 2:38*Om nêél-ambe lalipis bel lak Yesu Kalisi haale, tombe sil kataangg Pita be nando busin heey having sil vêêl e mem laah.

11***Pita hatulin vakasin vu hil bel-ate vu Yelusalem***

¹ Sinaale-so osin Omaaho Bop-ate hil vaalu sen dando Yudiaa-to lango banye nambe hil vaalu sen sil-ame Yudaa-to lako Anutu-te tanasin lak,

² om Pita laah valup Yelusalem atombe Yuda pin lanêél yi.

³ + o 11:3 Sin 10:28; Gal 2:12*Lanêél nambe, “Gala vu hil sen sil-ame Yudaa-to be gaha vanôôn having sil.”

⁴ Lemu Pita hatulin va pin sen hango de yii-to vu sil nambe,

⁵ + o 11:5-15 Sin 10:9-48*“Sa nando monaalohak vu taaku Jopa, tonde saahe taahu taahu ti, ond saahe de vati nambe tôôm bopaata ti luus-ambe

laam, ond landuuuh hôôk nanyendangga yum-beyuuuh, de sil taaluuhin vu baandoni be laam voon vu sa.

⁶ Tombe saawiingin nambe anjak vaa-ju ni om saangget lôôt, le vahivak vaha vaha sen naale nala de naavaak osin manak pin nando hôôk lopayo.

⁷ Tombe sa hango lava ti laam vu sa nambe, ‘Pita, okandi ganyiis vahivak-anja be gangga.’

⁸ Lemu saanêîl nambe, ‘Omaaho Bop, malis lôôt. Va nipaya osin va bamaan nambêêñja ond same naha böôy e.’

⁹ Tonde lava ango lom vu baandoni tu balon yuuh vu sa nambe, ‘Va sen Anutu samu be nivasa lak-ato, ond game ganjêêñin naambe nipaya le.’

¹⁰ Omaaho Bop nêîl vakasin nambêêñju balon yuuh having tu balon yaal, le mem va pin-anju lak-ambe laah baandoni.

¹¹ Tonde pavis atombe saahe omaaho yaal lato daale bayêen sen hey nando hôôk-ato vinavi, ond omaaho ti nando Sisalia nêîl-ambe yaal lalaam in sa.

¹² Tombe Vavi Vaambuung nêîl vu sa nambe, ‘Gana gaving yaal de game gakam yu-yuuh e.’ Tombe halingg-aso namaavaalu vindak ti nganjo laving sa be hey ala hato omaaho sen wiing omaaho yaal lalaam in saa-to baan,

¹³ le mem hatulin vu hey nambe yi de angela ti hato naale yite bayêen alo be nêîl vu nambe, ‘Gambiing hil lana gako Simon sen haale ango nambe Pitaa-to vu Jopa be lanom

¹⁴ + o 11:14 Sin 16:31*in naanêîl vakasin ti vu hong, ond vakasin e dôôvu hong gaving gate hil

pin.'

¹⁵ + o 11:15 Sin 2:4*Tombe sa naahen naanêêl vakasin lakala, tonde Vavi Vaambuung lakala sil, yik nambe sen lakala yiyy bôôy-ato,

¹⁶ + o 11:16 Sin 1:5*tombe sa kangg vu Omaaho Bop-ate vakasin sen nêêl-ato nambe, 'Jon lipis hilato ond lipis sil lak bel, lemu Anutu navu biing Vavi Vaambuung naas mando gaving ham.'

¹⁷ Om sen Anutu vu Vavi Vaambuung vu sil-anju, ond yik timu sen vu vu yiyy bôôy sen yaawii-having Omaaho Bop Yesu Kalisii-to, om sa vaati sen saanggilin Anutu-te mop jeen in sil?"

¹⁸ + o 11:18 Sin 13:48; 14:27*Om hil pin sen dandôô-juuto lango Pita-te vakasin-anju be lavand ma, de lako Anutu haale lak nambe, "Om Anutu hilin hil sen sil-ame Yudaa-to londpayo in nambe sil mando metumin gaving."

Hil bel-ate vu Antio

¹⁹ + o 11:19 Sin 8:1-4*Hil sen lavuuh taale hôôk busin sen layiis Stiven-ande lawiing nindanjeen vu sil vaaluu-to, ond hil sen lavuuh taalêê-juuto vaalu lala taaku dinaandiin heey, taaku Pinisia yuuuh Saiplas, de Antio, tombe lanêêl tanasin vu hil Yuda malis, de me-lanêêl vu hil vaalu le.

²⁰ Lemu hil vaalu vu Saiplas de vu Sailini ond sil latok lala Antio, be lanêêl Omaaho Bop Yesu-te banye nivasa vu hil Glik having,

²¹ + o 11:21 Sin 2:41*tombe Omaaho Bop-ate niwêêk nando having sil, om hil ngeeyaata lahilih londpayo be lawii-having Omaaho Bop.

²² + o 11:22 Sin 4:36*Lawii-having atombe hil bel-ate vu Yelusalem lango banye, tombe lawiing Banabas la Antio.

²³ + o 11:23 Sin 13:43; 14:22*La hato le yi nambe Anutu samu sil nivasa, tombe pêélis de kaandu sil pin lak tanasin nambe yoo londpayo niwêék, de sil oo mosapa Omaaho Bop timu jak busin pin.

²⁴ + o 11:24 Sin 2:41; 6:5*Banabas-anju omaaho nivasa, wii-having niwêék lôôt, de Vavi Vaambuong hôôvu yi, tombe hil ngeeyaata latu Omaaho Bop-ate hil.

²⁵ + o 11:25 Sin 9:30*Tombe sim Banabas la Taasas in nambe salo Saul,

²⁶ + o 11:26 1Pi 4:16*tombe tovu yi om giyyambe yuuh lalaah Antiok, be yuuh dando having hil bel-ate vu Antiok ta ti lôôt, in yuuh davu taahu hil ngeeyaata hôök Anutu-te tanasin. Tombe lanêél Yesu-te hil vu Antiok nyendoos nambe hil Kalisten.

²⁷ + o 11:27 Sin 13:1; 15:32*Tombe hil sen danêél Anutu-te vakasin langaah-ato heey vu Yelusalem-ambe lala lato Antiok,

²⁸ + o 11:28 Sin 21:10*ond sil ti haale nambe Agabas, ond Vavi Vaambuong vêél lu lak om kandi be néél vakasin langaah nambe, “Meep bopaata navu naam nohvu taaku pin.” Tombe vakasin-anjo nôôn ak hôök busin sen Klodias tu Lom-ate omaaho lulemak-ato.

²⁹ Om Yesu-te hil lanjôôy vakasin munggin nambe sil pin daasupin mone yuuh ame sen nando vu sil-ato nohvu sil namand pin, be lambu na in dôôvu Omaaho Bop-ate hil vu Yudia hôök busin sen meep naam-ato.

³⁰ + o 11:30 Sin 12:25*Tombe lasupin lung la, le mem lawiing Banabas ayuuh Saul lako be lala vu himbop-aso vu Yudia.

12

Layiis Jems-ambe yimb de lalôôh Pita

¹ Busin-anju omaaho lulemak Helot nawiing nindanjeen vu hil bel-ate vaalu,

² de nêêl-ambe layiis Jems sen Jon halii-to lak yipak-ambe yimb.

³ + o 12:3 Sin 4:3*Tonde Helot yi de hil Yuda layi nivasa om nêêl-ambe hil lalôôh Pita having. Vaa-ju lawiing hôôk busin bop busin haluusin sen hil akand navu sen Anutu haluuh hil Islel hôôk vu Ijip bôôy-ato.

⁴ Lako Pita be lala latung lukala kalaambus, de lavu lukala hil ngaamong vaha-sote ahevaavu nomaayuuuh-ambe laam namaavaalu vindak tii-to namand in sil ganggin, ond sil yumbeyu-beyuuuh danggin-ambe davu taveyin. Helot aka vu nambe busin bop busin haluusin jung na le mem gako Pita naam baale hil Yuda mend in biing vakasin.

⁵ + o 12:5 Jem 5:16*Om ahevaavu-so yoo mondanggin Pita hôôk kalaambus, lemu hil bel-ate lalohak niwêêk lôôt vu Anutu in yi.

Angela lôôh Pita vêêl hôôk kalaambus

⁶ + o 12:6 Sin 5:23*Tombe busin ti sen Helot hatung in nambe samiinaanôôn Pita na baale hil amend-ato, ond landuuh Pita lak hees aniwêêk yuuh-ambe neep hôôk ahevaavu yuuh lavuun hôôk busin, de ahevaavu vaalu daale mondanggin vinavi.

⁷ Tonde sim Omaaho Bop-ate angela ti hato naale tombe bayêen alo melangaah lôôt. Angela patap Pita baanggesak-ande yêêvu nambe,

“Okandi pavis.” Tombe hees yuuuh-anjôôto yêêhin hôôk Pita nama be tok la,

⁸ tombe angela nêêl vu nambe, “Onggavêêh let osin onggatung gate suul naah.” Om Pita havêêh let-ande hatung suul laah, tonde angela nêêl vu laah nambe, “Ganjop gate lolop-ambe mem otaamuyin sa.”

⁹ Tombe Pita kandi lak-ambe taamuyin angela be yuuuh lala, lemu me-lak va sen angela wiing-anjôôto ni le, de ka vu nambe yoo yi taahu taahu.

¹⁰ + o 12:10 Sin 5:19*Yuuuh lala lato kaluuh ahevaavu ti sen nanggin vinavi nyendoos-ato, de yuuuh lala lato kaluuh vinavi ango having, tonde mem yuuuh lala lato vinavi bop voon sen daayiiy ak aen-ato, tombe vinavi tii-ju yoo hataahin malis amu in yuuuh, de yuuuh lato voon-ambe yuuuh laloh mop pasiv ti be latok lala bayêêن bop, tonde angela la mema pavis.

¹¹ Tombe Pita kanu lukalaah-ambe nêêl nambe, “Gêên salak ni keen nambe Omaaho Bop wiing yite angela hato vu vêêl sa vu Helot nama, osin vu va pin sen hil Yuda kand navu in nambe lambiing ak

saa-to.”

¹² + o 12:12 Sin 12:25; 15:37*Lak ni lung la le mem la Jon sen haale ango nambe Maak-ato tang-ganaan Malia baan. Bayêêن-anju hil ngeeyaata lasupin-ambe dando mondalohek.

¹³ Pita valup-ambe monayiis ak vinavi vu voon, tombe vêêh kul ti haale nambe Loda laam in nambe gataahin vinavi,

¹⁴ le hango Pita lava be lak ni tombe lopayo nivasa lôôt, om me-hataahin vinavi le, de hatup-

ambe laah umakalo be nêêl vu sil nambe, “Pita valu-naale vinavi.”

¹⁵ + o 12:15 Sin 26:24; Mat 18:10*Le lanêêl vu nambe, “Galumkook wiing paya.” Le ma de nêêl niwêêk lôôt nambe, “Malis, Pita keen lôôt.” Tombe lanêêl nambe, “Ôye, manyinju yite angelaa-ju.”

¹⁶ Tonde Pita monayiis ak vinavi lôôt, om lataahin vinavi le

layi Pita tombe sim sil lavindis lôôt.

¹⁷ + o 12:17 Sin 13:16; 19:33; 21:40*Tombe Pita valaah nama vu sil in nambe lavand nama, tonde mem hatulin va sen Omaaho Bop giiy yi vu bayêen kalaambus alo be hato laam voon-ato, tonde nêêl having nambe, “Ham naanêêl vaa-jo banye vu Jems, de vu halingg-aso pin.” Tonde Pita hato la voon-ambe la taaku ango.

¹⁸ + o 12:18 Sin 5:22-24*Tonde sim sami-inaanôôn e ahevaavu-so kandi layi le ma, om sil nahand nalak lôôt-ambe danêêl nambe,

“Peey e Pita la tana?”

¹⁹ Tombe Helot nêêl-ambe hil lala salo Pita le me-latovu le, om lingin ahevaavu-so sen danggin vinavii-to lôôt e ma, om nêêl atombe layiis sil-ambe layimb. Tonde Helot vu Yudia be la hato Sisalia be nando.

Helot yimb

²⁰ + o 12:20 1King 5:11; Esi 27:17*Helot ahekalin bopaata vu hil Taia yuuuh Saidon, om sil pin lavuh ti be lasupin lala vu, tombe sil samu vakasin vu Helot-ate yêêv bop Blastas sen nanggin yite bayêen-ato vêêl e, mem sil kataangg nambe omaaho lulemak Helot nyiis silanêênd vakasin

jimb, in sil oo daanggo vanôôn vu omaaho lulemak-ate hil.

²¹ Om Helot hatung busin ti in nambe naanêêl vakasin vu hil, tombe busin-anju vunak ak lolop lulemak-ate be lakala nando lak sia lulemak-ate, tonde mem monanêêl vakasin vu sil pin,

²² tombe hil pin lateey bopaata nambe, “Ham hil-e, manyinju anutu ti nakaas, de omaahonôôn o ma.”

²³ + o 12:23 Dan 5:20*Lemu Helot-ame hako Anutu haale lak e, om Omaaho Bop-ate angela ti yiis pavis lukalaah nyevahaan, de wiing-ambe male ya omaaho lulemak Helot-ambe yimb.

²⁴ + o 12:24 Ais 55:11; Sin 6:7; Sin 19:20*Tonde Omaaho Bop-ate tanasin tu ahepataas-ambe la lohvü taaku pin.

²⁵ + o 12:25 Sin 11:29-30; 12:12; 15:37*Banabas ayuuuh Saul lako mone yuuuh ame la Yelusalem lung la, tonde yuuuh lako Jon sen haale ango nambe Maak-ato having-ambe yaal lalaah.

13

Saul ayuuuh Banabas lala kul sinaale nyendoos

¹ + o 13:1 Sin 11:27*Hil sen danêêl Anutute vakasin langaah-ato osin kaputung-aso dando having hil bel vu Antiok ond sil haalend-anjo, Banabas ayuuuh Simon sen danêêl nambe Valiis-ato, de Lusias vu Sailini, de Manayen sen yuuuh yêêv bop Helot unoopasiv-ande yuuuh oo dando hôök ti bôôy-ato, de Saul.

² + o 13:2 Sin 9:15; Gal 1:15-16*Ond busin ti me-laya vanôôn e de mondalahak vu Omaaho Bop, tombe Vavi Vaambuung nêêl nambe, “Ham

anggolin Banabas ayuuh Saul lana kul sen saateey yuuuh bôôy in nambe yuuuh lambiing-ato.”

³ + o 13:3 Sin 6:6*Om lalakin sil in vanôôn-ande me-laya le, de lalohak yesin laah, le mem lambe namand ak yuuuh atonde lawiing yuuuh lala.

Banabas ayuuh Pol lanêêl tanasin vu hil Saiplas

⁴ + o 13:4 Sin 15:39*Tombe Vavi Vaambuung nêêl-ambe yuuuh lala. Yuuh lala lato Selusia le mem yuuuh lalak sip vuu-ju be yuuuh lala nalu lavuun Saiplas.

⁵ + o 13:5 Sin 12:12; 13:13*Tombe mem yuuuh latok lala Saiplas-ate bayêen ti haale nambe Salamis, tombe yuuuh lanêêl Anutu-te tanasin-ambe yuuuh latup hôôk hil Yuda-te dumb pin de Jon nahôôvu yuuuh.

⁶ Yaal latup hôôk-ambe lalohvu nalu lavuun Saiplas-anju pin, be yaal latok lala bayêen Peplos. Tombe vu manyinju yaal latokak Yuda-te omaaho tatuhin vaha ti haale nambe Baayesu, ond omaahôô-ju lôômb osin yaavak dangga yi,

⁷ yoo nando having yêêv Lom ti Sesias Polas. Yêêv-anju lukook anivasa be wiingin nambe gango Anutu-te tanasin, om teey Banabas ayuuh Saul lala vu,

⁸ + o 13:8 2Ti 3:8*le omaaho palaas Baayesuu-ju danêêl haale hôôk Glik lavand nambe Elimas, ond navu mahôôh Banabas ayuuh Saul in nawiingin nambe gilin yêêv alo be me-biing gaving tanasin e.

⁹ Lemu Saul sen danêêl haale ango nambe Polato, ond Vavi Vaambuung hôôvu yi be me la vu Elimas lôôt,

¹⁰ tombe nêêl nambe, “Hong Saalang noow. Vakasin tatuhiin osin va nindanje-danjeen pup hôôk galompayo, om onawiing nindanjeen vu va nivasa pin. Naangelis e onggavuuuh gate vakasin sen onavu tatuhiin ak Omaaho Bop-ato na?

¹¹ + o 13:11 Sin 9:8*Om onggango le, gêen-anjo Omaaho Bop nama navu nyiis hong-ambe gamem kanu dôôk, om peey-anjo game le gangge taaku le, de omando busin heey vêêl e mem.” Pol nêêl nambêêñju tonde Elimas amekanu hôôk pavis-ambe navu kaatuuh hôôk, de navu salo hil in nambe sil daandiiy yi.

¹² Yêêv yi vaa-ju tombe vindis lôôt in Omaaho Bop-ate tanasin be wii-having.

Pol ayuuuh Banabas lala Antiok Pisidia

¹³ + o 13:13 Sin 12:12; 13:5; 15:38*Pol ayaal lalak sip vu Pepos-ambe lalakala taaku Pega sen neep Pampilia-te taakuu-to, tombe Jon havuuh yuuhande laah Yelusalem.

¹⁴ De yuuuh vu Pega be lala lalup Antiok sen neep Pisidia-te taakuu-to, tonde busin sawaasin atombe lahuli-lala dando hôôk dumb alo be dando.

¹⁵ + o 13:15 Sin 15:21*Tombe lango de lasevin Mose-te tanasin osin Anutu-te vakasin sen yite hil vaalu kaavuu-to lung la, le mem yêêv-aso sen danggin dumb tii-ju lanêêl vakasin la vu Pol ayuuuh nambe, “Halingg ayuuuh, mawiingin nambe kaandu hil jak tanasin heey ond muuh-o.”

¹⁶ + o 13:16 Sin 12:17*Tombe Pol kandi naale be valaah nama de nêêl nambe, “Ham Islel osin ham vaalu sen ham nayêêñin Anutuu-to, ham gango le.

¹⁷ + o 13:17 Eks 1:7; 6:6; 12:51*Yiiy Islel-anjo, yate Anutu holin yate himbop-aso bôôy, be sil lala dando bamaan vu Ijip-ato ond wiing-ambe sil latu ngeeyaata, lemu vu taamusin ond yite nama niwêêk giiy sil vuu-ju be lalaah.

¹⁸ + o 13:18 Eks 16:35; Nam 14:34; Diu 1:31*Lala latup hôôk taaku lumbalaamb lohvu ta doo-yuuuh atombe Anutu lopayo nimeen in davu kalêêh lava lak busin pin, le ma de me-haluuh dami vu sil e.

¹⁹ + o 13:19 Diu 7:1; Jos 14:1*Nganjo yiis Kanaan-ate hil lulemak namaavaalu be vindak yuuuh osin silate hil pin, de vu silate ngaanggis vu hil Islel-aso be tu silate va, tombe dando ta ngeeyaata lohvu 450 vêêl e mem.

²⁰ + o 13:20 Yêêv 2:16; 1Sml 3:20*Anutu holin Islel-ate yêêv atombe langgin sil-ambe tok laam Samuel-ate busin,

²¹ + o 13:21 1Sml 8:5,19; 1Sml 10:20-24*tonde mem sil kataangg nambe Anutu golin silate omaaho lulemak ti, om Anutu holin Kis sen pumak Benyaamin-ato ond noow Saul, be tu omaaho lulemak-ambe hanggin hil lohvu ta doo-yuuuh,

²² + o 13:22 1Sml 13:14; 16:13; Saam 89:20*le sim Anutu lôôh yi vêêl-ande wiing-ambe Devit tu silate omaaho lulemak. Omaahôô-ja ond Anutu nêêl vakasin lak yi nambe, ‘Saahe de Jesi noow Devit lopayo having sa om le biing sate vakasin pin nôôn jak.’

²³ + o 13:23 2Sml 7:12-16; Ais 11:1*Tombe Anutu yoo wiing lohvu sen nêêl bôôy-ato, om vu Devit-ate hil vu taamusin-ato ti Yesu laam in nambe dôôvu iiy Islel pin.

²⁴ + o 13:24 Mat 3:1-2*De bôôy Yesu me-laamato, ond Jon nêêl vakasin vu hil Islel pin nambe langgilin londpayo be lanjipis bel.

²⁵ + o 13:25 Jon 1:20,27*Tonde ngaaho lak in Jon-ate kul jung na om nêêl nambe, ‘Ham akam navu nambe sa lati? Same omaaho sen ham nanggin yii-to le, ma. Omaaho sen navu taa-muyin saa-to, ond mem. Same sa ningg vasa in nambe sa kavaayin suul na vêêl in omaahôô-ju vaha le, osin saambiing kul vaalu naambe hil kul-aso dawiing vu silate yêêv-asôôto le.’

²⁶ “Om halingg-aso sen Abalaam-ate hil vu taamusin ham-ato, de ham vaalu sen ham nayêênin Anutu having-ato, ham gango le. Vakasin sen Anutu nêêl nambe dôôvu yiii-ato, ond wiing laam lung la vu yiii,

²⁷ + o 13:27 Jon 16:3; Sin 3:17*lemu hil sen dando Yelusalem osin silate yêêv bop-aso melalak Yesuu-ju dangga ni vanuh e, de yoo dasevin Anutu-te vakasin sen hil lanêêl langaah bôôy-ato nalak busin sawaasin pin, le ma de me-kand vu le. De lawiing vakasin ak yii-to, ond lawiing Anutute vakasin sen hil lanêêl langaah bôôy-ato nôôn ak,

²⁸ + o 13:28 Mat 27:22-23*de me-latokak yite vakasin keen ti in nambe lanyiis-ambe jimb e, malis, lemu yoo lanêêl niwêêk lôôt atombe Pilata yiis-ambe yimb malis amu.

²⁹ + o 13:29 Mat 27:59-60*Om lawiing Anutu-te vakasin pin sen hil lanêêl langaah bôôy-ato nôôn ak lung la, le mem lalôôh ninaavi vêêl vu haah pako be lala lambe neep hôôk lavandangga,

³⁰ + o 13:30 Sin 2:24*lemu Anutu wiing-ambe kandi lak laah vu hil yimbin-ate.

³¹ + o 13:31 Sin 1:3,8*Kandi lak lung la, le mem hil vaalu layi mend ak yi lohvu busin ngeeyaata, ond hil-anju sen sil laving yi vu Galili be sil ahondoosin lala lalup Yelusalem munggin-ato, ond hil-anju sen gêen danêêl yite banye nalohvu hil Yuda.

³² De hey naanêêl banye nivasa vu ham naambe vakasin sen Anutu nêêl vu yate himbop-aso bôôy-ato,

³³ + o 13:33 Saam 2:7*ond gêen wiing nôôn ak vu silate hil vu taamusin-ato yiyy, om wiing Yesu laam vu yiyy lohvu vakasin neep hôôk kaapiya Saam Lukook 2 nambe,

‘Sa noongg hong in gêen soo hako hong.’

³⁴ + o 13:34 Ais 55:3*Tonde Anutu wiing-ambe kandi lak vu hil yimbin-ate lung la, de me-le ninaavi panyek naah e, ond Anutu nêêl langaah hôôk vakasin-anjo nambe,

‘Vakasin keen sen saanêêl vu Devit-ato ond sale aambiing nôôn jak vu ham.’

³⁵ + o 13:35 Saam 16:10; Sin 2:27*Tonde vakasin boow ango neep hôôk Saam ango having nambe, ‘Game le gavuuuh gate omaaho vaambuung-ambe ninaavi nanjip panyek hôôk lavandangga le.’

³⁶ + o 13:36 Sin 2:29*De Devit ond wiing va lohvu Anutu nêêl vu yi hôôk yite busin sen yi osin yite hil dando memoos vu voon-ato, tonde yimb atombe lambe neep having maandin-ande bundin-ambe ninaavi panyek,

³⁷ lemu omaaho sen Anutu wiing-ambe kandi lak-ato, ond ninaavi me-panyek e.

³⁸ + o 13:38 Sin 10:43*“Om halingg-aso, ham anjak ni naambe tanasin sen hey naanêêl langaah vu ham nambe Anutu le kawiyy hamate nipaya naa-to, ond tanasin-anjo danggakook Yesu.

³⁹ + o 13:39 Lom 10:4*“Om hamate nipaya pin sen Mose-te tanasin-ame lohvü nambe kawiyy naa-to, ond ti nambe lopayo na timu vu Yesuu-ju, ond Anutu le kawiyy yite nipaya pin na de ji yi nivasa.

⁴⁰ Om ham ganggin ham in Anutu-te vakasin sen hil lanêêl langaah bôôy-ato me-naatovu ham e. Nambe,

⁴¹ + o 13:41 Hab 1:5*“Ham kalêêsin ambu-so, ham angge be ham ambindis, lemu ham e ana mem nama. In kul ti sa naawiing hôôk busin sen ham nando voon-ato, naambe sil tatekin vu ham ond ham-ame le ambiing gaving e.”

⁴² Pol nêêl vakasin lung la tonde yuuh Banabas lawiingin nambe gato lana voon, tombe hil lalaam-ambe kataangg yuuh nambe, “Yik muuh naanêêl vakasin-anjo jesin naah dôôk busin sawaasin ango taamusin vu hey.”

⁴³ + o 13:43 Sin 11:23; 14:22*Tonde hil pin lato lala voon, tombe hil Yuda osin hil vaalu sen dayêênin Anutu de lako Yuda-te gambum-ato, ond sil ngeeyaaata sapa Pol ayuuh Banabas, tombe yuuh lanêêl tanasin osin yuuh kaandu sil niwêêk nambe yoo daapuvu Anutu-te samu samu lôôt.

⁴⁴ Tonde busin sawaasin ango tombe hil taakuu-ju pin lasupin lalaam timu lôôt in gango

Anutu-te tanasin.

⁴⁵ + o 13:45 Sin 14:2*Lemu hil Yuda layi hil ngeeyaata lasupin lôôt atombe ahend anipaya vu yuuuh, de sil mahôôh Pol-ambe lanêêl yi pale.

⁴⁶ + o 13:46 Sin 3:26; 18:6; Luk 7:30*Le Pol ayuuh Banabas-ame layêênin e, de yuuuh lanêêl nambe, “Haay aanêêl Anutu-te tanasin vu ham Yuda munggin, le ma de ham haluuh damim vu, om manyinja ham anêêl nambe ham-ame alohvü nambe mando metumin danggata le, om ham angge, gêen haay haluuh damping vu ham-ande haay nala vu hil vaalu.

⁴⁷ + o 13:47 Ais 49:6*In Omaaho Bop nêêl vu haay nambe,

‘Saambiing-ambe gana naatu hil vaalu sen sil-ame Yudaa-to silate kin tumin in otaato mop metumin-ate vu hil-ambe na nohvu taaku pin.’

⁴⁸ + o 13:48 Sin 11:18*Om hil vaalu sen sil-ame Yudaa-to lango vakasin-anju tombe londpayo nivasa lôôt, de lavand hôôk Anutu-te tanasin, tonde sil vaalu sen Anutu holin sil lung la in nambe sil mando metumin danggataa-to, ond lawii-having.

⁴⁹ Tombe lanêêl Omaaho Bop-ate tanasin la lohvü taakuu-ju pin.

⁵⁰ + o 13:50 Sin 17:4,12*Lemu hil Yuda laan-jiihin vêêh-aso sen haalend bop-ambe dayêênin Anutuu-to, osin yêêv bop-aso vu taakuu-jôôto, be lawiing nindanjeen vu Pol ayuuh Banabas, de latiyy yuuuh in silate taaku be yuuuh lala.

⁵¹ + o 13:51 Mat 10:14; Sin 18:6*Tombe yuuuh tatehin kambus sen nando lak yuuuh vahand-ato

in taato naambe nipaya neep vu sil, tonde mem yuuuh lala Ikoniam,

⁵² de Yesu-te hil vu Antiok ond yoo dando osin londpayo nivasa lôôt de Vavi Vaambuung nando having sil.

14

Pol ayuuh Banabas dawiing kul vu Ikoniam

¹ Tombe yik vu Ikoniam ond Pol ayuuh Banabas lalukala Yuda-te dumb alo be yuuuh lawiing tanasin osin niwêêk, tombe Yuda yuuuh Glik ngeeyaata lôôt lawii-having.

² + o 14:2 Sin 13:45*Lemu Yuda vaalu sen me-lawiihaving-ato ond laanjiihin hil vaalu sen silame Yudaa-to, be sil ahend kalin lôôt vu Omaaho Bop-ate hil,

³ + o 14:3 Mak 16:20; Sin 19:11; Hiblu 2:4*lemu Pol ayuuh Banabas dandôô-ju lôôt, be yuuuh oo mondanêêl Omaaho Bop-ate tanasin de yuuuhame layêênin e. Tonde

Omaaho Bop hôôvu yuuuh-ambe yuuuh lawiing taahu taahu vaha vaha osin niwêêk, in nambe hil lanjak ni naambe Omaaho Bop kaandu yuuuhate vakasin sen yuuuh tatekin yite samu samuu-to.

⁴ Tombe hil vu taakuu-ju me-londpayo lavuh tile, om vaalu lawii-having Yuda de vaalu lawii-having sinaale yuuuh.

⁵ + o 14:5 Sin 14:19; 2Ti 3:11*Tombe hil vaalu sen sil-ame Yudaa-to osin hil Yuda laving silate yêêv-aso be lawiingin nambe lambiing nindanjeen vu Pol ayuuh Banabas, de lanyiis yuuuh ak tatuuh-ambe yuuuh lanjimb.

⁶ + o 14:6 Mat 10:23*Le yuuuh lango banye om yuuuh lapak-ambe lala taaku Listla yuuuh Debi sen neep hôôk Likonia-te taakuu-to, de taaku vaalu sen neep ngaahôô-to having,

⁷ tombe yuuuh lala mondanêêl banye nivasa langaah vu taakuu-ju pin.

Yuuuh lawiing kul vu taaku Listla yuuuh Debi

⁸ + o 14:8 Jon 9:1; Sin 3:2*Omaaho ti nando Listla ond tangganaan hako osin vaha nipaya, tombe vaha me-niwêek e, de me-nala mop daka le,

⁹ + o 14:9 Sin 3:4; Mat 9:28*ond yoo monambe nanye in vakasin sen Pol nanêêl-ato. Tombe Pol nayi lôôt e mem lak ni nambe wii-having lohvu le nivasa dôôk,

¹⁰ om Pol néêl la osin lava bopaata nambe, “Ombalaah ovaham-ande okandi baale nivasa.” Tombe sim kandi naale pavis-ambe la.

¹¹ + o 14:11 Sin 28:6*Hil ngeeyaata layi va sen Pol wiing-anjo tombe lateey hôôk hil Likonia lavand nambe, “Anutu heey latu omaahonôôn ak-ambe lalukalaam vu yiyy.”

¹² Tombe lanêêl silate anutu voon-ate yuuuh lak Banabas ayuuuh Pol, ango haale nambe Sus lak Banabas, de ango haale nambe Hemis lak Pol in nambe yoo nakaas lôôt.

¹³ Tombe kul vaha sen natung salivangin vu Sus hôôk yite dumb sen naale taakuu-ju nanyendanggaa-to, ond hako kao moow heey osin ngaaoala be hato vinavi in nambe na gaving hil-ambe lana gatung salivangin vu yuuuh.

¹⁴ Sinaale Banabas ayuu Pol langoyin atombe yuuh lakweek yuuhaté lolop in yuuh alondpayo nimeen lôôt, de yuuh latup-ambe lala daale dateey bopaata hôök hil lavuunaatôôv nambe,

¹⁵ + o 14:15 Sin 10:26; Saam 146:6*“Ham hile, ham navu ambiing vaatii-ja? Yik haay omaahonôôn nambe ham-anja. Lemu haay naanêêl banye nivasa vu ham in nambe ham gavuuh va malis nambêenja na, de ham anggilin ham nom vu Anutu metumin-ate sen hatung baandoni osin ngaanggis de lôôy having va pin sen nando hôök-atô.

¹⁶ + o 14:16 Sin 17:30*Keen, vu bôôy ond hil pin oo mondawiing va lohvu sil akand de Anutu menêêlin e,

¹⁷ + o 14:17 Saam 147:8; Jer 5:24*lemu Anutu-te samu samu taato yi nambe nando keen, in navu luk vu baandoni natolak-ambe vanôôn pin nalup nivasa, osin navu vanôôn-ambe nalohvu ham pin, de nawiing-ambe ham nando osin ham alompayo nivasa.”

¹⁸ Yuuh lanêêl vakasin-anju lemu hil aniwêêk lôôt nambe gatung salivangin vu yuuh, le ma de yuuh lanêêl lôôt atombe hil-ame latung salivangin e.

Layiis Pol ak tatuuh

¹⁹ + o 14:19 Sin 17:13; 2Ko 11:25; 2Ti 3:11*Lung laa tonde hil Yuda vaalu vu Antioch osin Ikoniam lalup-ambe laanjiihin hil atombe layiis Pol ak tatuuh, tombe laandiyy la taaku nanyendangga in kand vu nambe yimb lung la.

²⁰ Le sim Yesu-te hil lalaam-ambe lambuuhi yî tatup atombe kandi vasa hôök-ambe laah

bayêén, de samiinaanôôn atombe yuuuh Banabas lala Debi.

²¹ + o 14:21 Mat 28:19*Yuuuh lanêél banye nivasa langaah vu taakuuu-ju, tombe hil ngeeyaata latu Yesu-te hil vuu-ju vêêl e, mem yuuuh lahulin vahand-ambe lalaah Listla yuuuh Ikoniam-ande Antiock.

²² + o 14:22 Sin 11:23; 15:32; 18:23; Mat 7:14; 1Tes 3:3*Tombe yuuuh kaandu Yesu-te hil niwêék lôôt nambe, “Ham awii-having om ham oo baale niwêék, in yaawiingin nambe yana Anutu-te taaku ond yiyy baaku nimeen pin naamunggin e mem.”

²³ + o 14:23 Sin 13:3*Tonde yuuuh laholin yêêv lohvu taaku pin in ganggin hil bel-ate, de yuuuh lalakin yuuuh in vanôôn-ande me-laya le de yuuuh lalohak in sil, be yuuuh lavu yêêv-âsôônju lukala Omaaho Bop nama in londpayo la timu vu yi.

Yuuuh lalaah taaku Antiock Silia yesin

²⁴ Yuuh lato Pisidia lavuunaatôôv-ambe latok lala Pampilia,

²⁵ tombe yuuuh lanêél tanasin vu Pampilia-te taaku bop Pega vêêl e mem yuuuh lala lato Atelia.

²⁶ + o 14:26 Sin 13:1-2; 15:40*Tombe yuuuh lalak sip vu Atelia be yuuuh lalaah Antiock, taakuuu-ju sen bôôy sil lavu yuuuh lukala Anutu nama be sil kataangg Anutu in nambe dôôvu yuuuh-ambe yuuuh lambiing kul-ato. Om gêén yuuuh lala lawiing kul lung la de yuuuh latok lalaah taakuuu-ju yesin laah.

²⁷ + o 14:27 Sin 11:18; 15:4,12*Tombe yuuuh lasupin hil bel-ate pin, le mem yuuuh latulin va pin sen Anutu hôôvu yuuuh-ambe yuuuh lawiing-ato vu

sil, de yuuh lanêêl having nambe, “Gêên Anutu wiing-ambe hil vaalu sen sil-ame Yudaa-to lango yite tanasin-ambe lawii-having.”

²⁸ Tonde Pol ayuuh Banabas dando having sil vuu-ju lôôt.

15

Supin bop vu Yelusalem

¹ + o 15:1 Gal 5:2*Omaaheey vu Yudia lato be lanêêl tanasin vu Omaaho Bop-ate hil vu Antiock nambe, “Ham anjiinggaambe sil galaah ham anim naavi nohvu Mose-te gambum, le naambe nama, ond Anutu me-le gako ham jak e.”

² + o 15:2 Sin 11:30; Gal 2:1*Lanêêl nambêênu tombe Pol ayuuh Banabas ahend kalin vu sil om sil lanêêl sil lôôt. Tombe hil bel-ate lawiing Pol ayuuh Banabas, osin sil oote hil vaalu laving-ambe lala in samu vakasin sen lanêêl sil in-anjôôto gaving sinaale-so osin himbop-aso vu Yelusalem.

³ Hil bel-ate lawiing sil lala, be laloh taaku Pinisia yuuh Samaalia laruun in danêêl banye vu sil nambe hil vaalu sen sil-ame Yudaa-to lahilin sil alondpayo, om Omaaho Bop-ate hil lango tombe londpayo nivasa lôôt.

⁴ + o 15:4 Sin 14:27*Tonde latok lala Yelusalem atombe hil bel-ate vuu-ju laving sinaale-so de himbop-aso lako sil lak, tonde mem Pol ayuuh Banabas latulin va pin sen Anutu hôôvu yuuhambe yuuh lawiing-ato vu sil.

⁵ Lemu Palisai vaalu sen lawii-having Yesu-te tanasin-ato kandi be lanêêl nambe, “Sil galaah nind naavi de ham naanêêl vu sil naambe sil oo

sapa Mose-te tanasin, ond mem Anutu gako sil jak.”

⁶ Sinaale-so laving himbop-aso lasupin in nambe sil bakaas in vakasin-anju.

⁷ + o 15:7 Sin 10:1-43*Om sil lakaas ngeeyaata lôôt in vakasin-anjo, tombe Pita kandi naale be nêêl vu sil nambe, “Halingg-aso-e, bôôy ond ham alak ni nambe Anutu holin sa hôôk ham lavuun in nambe sa naanêêl banye nivasaa-to langaah vu hil vaalu sen sil-ame Yudaa-to, in sil gango be lambiing gaving.

⁸ + o 15:8 Sin 10:44; 11:15*De Anutu yoo lak omaahonôôn pin alondpayo ni, om vu Vavi Vaambuung vu sil, yik nambe sen vu vu yiyy-ato in taato naambe yi sil anivasa,

⁹ + o 15:9 Sin 10:34-35*de me-samu yiyy-ande wiing nipaya vu sil e, malis. Yik sil alondpayo la timu vu Anutu tombe kawiiy silate nipaya la, de wiing-ambe sil alondpayo nikaapulis ak.

¹⁰ + o 15:10 Mat 11:30; Gal 3:10; 5:1*Le nambe tana sen gêen ham awiingin sahi Anutu? Mose-te tanasin nimeen bopaata sen yiyy o yate himbop-aso bôôy-ato yame aalohvu nambe baakuu-to, ond nambe tana sen ham awiingin danjingin ak Yesu-te hil?

¹¹ + o 15:11 Gal 2:16; Ep 2:5-8*Yaawii-having lak Omaaho Bop Yesu-te samu samu nambe Anutu le gako yiyy ana mando metumin, de hil-anju ond yik va timu.”

¹² + o 15:12 Sin 14:27; Gal 2:9*Pita nêêl nambêênu tombe hil pin sen lasupin-anjôôto lavand ma lôôt, de mondambe nanyend in Banabas ayuuuh Pol-ate vakasin, de yuuuh datulin sen Anutu

hôôvu yuuuh-ambe yuuuh lawiing taahu taahu osin niwêek vaha vaha vu hil vaalu sen sil-ame Yudaa-to.

¹³ Yuuh lanêêl lung la tonde Jems nêêl nambe, “Halingg-aso, ham gango sate vakasin e.

¹⁴ + o 15:14 Sin 15:7-9*Simon nêêl vu ham lung la nambe hil vaalu sen sil-ame Yudaa-to, ond Anutu yoo ka vu munggin-ambe holin sil vaalu in daatu yite hil.

¹⁵ Tonde Anutu-te vakasin sen sil lanêêl langaah bôôy-ato ond yik dangga timu nambe,

¹⁶ + o 15:16-18 Emo 9:11-12*‘Omaaho Bop nêêl nambe, “Vu taamusin sale aanom in saambu dôôk Devit-ate bayêen sen matelak-ambe la neep-ato, om sa daav va sen wiing payaa-to dukanaah, de sa samu be nivasa jak naah,

¹⁷ in nambe omaahonôôn vaalu dando ond hil vaalu sen sil-ame Yudaa-to, lemu soo haalengg lak sil lung la, om sil e mosalo Omaaho Bop.”

¹⁸ Omaaho Bop sen yoo ka vu nyendoos-ambe nêêl langaah-ato ond nêêl nambêenja.’

¹⁹ “Ke, om sa kangg vu nambe hil vaalu sen sil-ame Yudaa-to langgilin londpayo na vu Anutu ond yame aambu nimeen vu sil e.

²⁰ + o 15:20 Eks 34:15-17; Jen 9:4; Lev 17:10-16*Nganjok yiyy kaavu kaapiya na vu sil naambe sil gavuuh va sen hil datung vu anutu tatuhin vaha-sôônju na, osin vêêh ayuuuh moow-ame gako sil danjeen e, de me-lanja vahivak sen danggingg ka be nayimb-ato le, osin me-lanja va pin anihees e. Va yumbeyuuuh-anjo sil gavuuh na in nambe Yuda lanji sil nivasa,

21 + o 15:21 Sin 13:15*in Mose-te tanasin ond hil dasevin vu dumb alo hôök busin sawaasin pin, de yoo daneêl lohvu taaku pin vu bôoy-ambe tok laam gêen-anjo.”

Sinaale-so lawiing kaapiya la vu Kalisi-te hil vu taaku vaalu

22 Jems nêêl vakasin-anju lung la, tonde sinaale-so de himbop-aso osin hil bel-ate pin layi nivasa, om laholin silate yêev Yudas de haale ango nambe Basabas yuuuh Silas in nambe lambiing yuuuh lana Antiok gaving Pol ayuuh Banabas.

23 De sil kaavu kaapiya ti be lavu hôök Yudas ayuuh Silas namand, tombe kaapiyaa-ju nêêl nambe, “O halingg-aso, hey sinaale-so osin himbop-aso ond hey kaavu kaapiyaa-ja laas vu ham vaalu sen ham-ame Yudaa-to, ham vu Antiok de vu Silia pin de vu Silisia.

24 + o 15:24 Sin 15:1*Ond hey hango banye nambe heyate hil vaalu lalaas-ambe lanêêl silate vakasin heey, tombe wiing-ambe ham akam yuuuh de ham alompayo nimeen ak, lemu hey-ame aanêêl-ambe sil lalaas e.

25 Om sen hey hango banye ond hey pin aanjôôy vakasin lung la, le mem hey aaholin omaaho yuuuh-ambe hey aawiing yuuuh lalaas having Banabas ayuuh Pol sen hey ahengg having yuuuh lôôt-atô,

26 ond yuuuh-ame kand navu yuuuh daka le, yuuuh oo kand navu Omaaho Bop Yesu Kalisi.

27 De hey aawiing Yudas ayuuh Silas lalaas-anja ond vakasin sen hey kaavu laas-anjaato yuuuh oo le daanêêl gaving vu ham,

²⁸ + o 15:28 Mat 23:4*in Vavi Vaambuung vêël hey alungg ak-ambe hey aanêël lung laa-ja, de hey-ame aambu nimeen vu ham lôôt e. Yik vakasin lung laa-ja, de va sen-anjo ond yik ham samu nivasa

²⁹ + o 15:29 Sin 15:20*naambe, ham-ame angga va sen datung salivangin vu anutu tatuhiin vaha-sôoto le, osin ham-ame angga va pin anihees e, de ham-ame angga vahivak sen danggingg ka be nayimb-ato le, de vêêh ayuuuh moow-ame gako sil danjeen e. Ham galuuuh damim vu vaa-ja ond mem nivasa. Yik heyanêêngg vakasin lung laa-ja. Ham mando nivasa.”

³⁰ Sil kaavu kaapiya lung la le mem lawiing-ambe sil lako be lala Antiok. Latok lala be lasupin hil bel-ate le mem lavu kaapiya vu sil,

³¹ tombe lasevin kaapiyaa-ju be mem lapêêlis in vakasin anivasa sen lukaneep kaapiyaa-to.

³² + o 15:32 Sin 11:27; 13:1; 14:22*De Yudas ayuuuh Silas-anju ond yuuuh danêël Anutute vakasin ngeeyaata lôôt langaah-ambe kaandu Omaaho Bop-ate hil,

³³ tonde yuuuh dando Antiok busin ngeeyaata having sil vêël e mem londpayo nivasa de lawiing yuuuh lalaah vu hil Yelusalem sen lawiing yuuuh lalaam-ato.

³⁴ [Lemu Silas oo ka vu nambe mando Antiok om nando.]

³⁵ De Pol ayuuuh Banabas dando Antiok, tombe yuuuh laving hil vaalu be sil davu taahu hil osin danêël Omaaho Bop-ate banye nivasa langaah.

Pol ayuuuh Banabas lavuuh yuuuh

³⁶ Busin heey la vêêl e mem Pol nêêl vu Banabas nambe, “Wanaah gatup hôôk taaku pin sen wala aanêêl Omaaho Bop-ate tanasin vu sîl bôôy-ato, be waangge naambe hil sen lawii-having-ato dando nivasa me malis.”

³⁷ + o 15:37 Sin 12:12,25*Tombe Banabas wiingin nambe Jon sen haale ango nambe Maak-ato na gaving yuuh,

³⁸ + o 15:38 Sin 13:13; Kol 4:10*le Pol nêêl nambe, “Me-lohvü le, in omaahôô-ja ond bôôy havuuh hoow vu Pampilia de me-la wiing kul having hoow e, om wame gako yi le.”

³⁹ + o 15:39 Sin 4:36; 13:4*Tombe yuuh kalêêh yuuh lôôt om ango yoo la de ango yoo la, tombe Banabas hako Maak-ambe yuuh lalak sip-ambe lala Saiplas,

⁴⁰ + o 15:40 Sin 14:26*de Pol hako Silas-ambe yuuh lala, tombe Yesu-te hil lanêêl nambe, “Omaaho Bop-ate samu samu na gaving muuh.”

⁴¹ Tombe yuuh datup hôôk taaku Silisia yuuh Silia be davu kaandu hil bel-ate lak tanasin.

16

Pol hatup hôôk kul tu balon yuuh

¹ + o 16:1 Sin 14:6; 2Ti 1:5*Pol ayuuuh Silas latok lala Debi osin Listla, tombe sim yuuh latokak Yesu-te omaaho ti vuu-ju haale nambe Timoti, ond tangganaan vêêh Yuda ti wii-having Yesu de mangganaan vu Glik.

² + o 16:2 Pil 2:19-22*Tombe Omaaho Bop-ate hil vu Listla osin Ikoniam lanêêl vu Pol nambe, “Timotii-ju omaaho nivasa.”

³ + o 16:3 Gal 2:3-5*Tombe Pol wiingin nambe Timoti na gaving yi, om hako be la halaah ninaavi in nambe hil Yuda sen dandôô-juuto lanji Timoti naambe Yuda keen ti, in sil pin lalak ni nambe mangganaaname Yuda ti le.

⁴ + o 16:4 Sin 15:23-29*Tonde mem yaal latup hôôk bayêen ti ti be yaal lanêêl tanasin sen sinaale-so himbop-aso lanjôôy lung la vu Yelusalem-ato vu Yesu-te hil pin nambe, “Yik ham oo taamuyin-anja.”

⁵ + o 16:5 Sin 2:47*Tombe mem hil bel-ate lawii-having niwêek lôôt-ambe datu ngeeyaata nalak busin pin.

Poly omaaho ti vu Makedonia

⁶ + o 16:6 Sin 18:23*Vavi Vaambuung nêêlin yaal nambe yaal-ame daanêêl tanasin vu hil Esia le, om yaal lala taaku Plisia yuu Galata.

⁷ Yaal lato ngaaho vu Misia be yaal lawiingin nambe lana Bitinia, le sim Yesu-te Vavi Vaambuung nêêlin yaal,

⁸ om yaal laloh mop Misia be latok lala Toloas.

⁹ Tonde busin atombe Pol yi taahu taahu ti, ond yi de omaaho ti vu Makedonia naale be kataangg yi nambe, “Ganjakanam lôôy vaalu in gandôôvu hey vu Makedonia.”

¹⁰ Pol yi taahu taahuu-ju lung la, tonde sa having yaal-ambe hey salo mop in nambe hey ana Makedonia pavis, in hey alak ni nambe Anutu teey hey in nambe hey ana naanêêl banye nivasa vu sil.

Lidia hilin lopayo

¹¹ Om sip hako hey vu Toloas-ambe la nivalok vu Samotles, tombe hey naahop-anju be heendiyy e mem hey aatok ala Niapolis,

¹² tombe sim hey hatup voon vuu-ju be hey aatok ala hil Lom-ate taaku Pilipai sen tu Makedonia-te taaku bopaataa-to, be hey nando busin heey vuu-ju.

¹³ De busin sawaasin atombe hey aaloh taaku nanyendangga be hey ala hato bel ti, in heyaambe mak taaku sen Yuda dasupin osin dalohak hôôk-ato neep-anju, tombe sim hey aatokak vêêh heey lasupin-ambe dando, om hey hato nando having sil-ambe hey vakaas vu sil.

¹⁴ Tombe vêêh ti vu taaku bop Taiataila haale nambe Lidia, de yite kul nambe navu tôomb amembu be hil daanggo vu yi, ond vêêh-anju nalohak vu Anutu lak busin pin, om Omaaho Bop wiing-ambe lopayo ahelavis ak, de yoo wii-having vakasin sen Pol nanêêl-ato.

¹⁵ + o 16:15 Sin 16:33; 18:8*Om lipis bel having yite hil, tonde kataangg hey-ambe nêêl ni-wêek nambe, “Ham sahi nambe saawii-having Omaaho Bop keen ond ham andukanaam mando dôôk sate bayêen.” Om hey ala nando having yi.

Latung Pol ayuuh Silas hôôk kalaambus vu Pilipai

¹⁶ + o 16:16 Sin 19:24*Busin ti hey ala in nambe ana taaku sen dalohak nandôô-to, tombe vêêh kul vaha malis ti tovu hey vu mop. Vêêh-anju mamu nando having yi, om nanêêl vakasin sen nôôn jak vu taamusin-ato langaah, tombe hil daanggo yi om yite yêêv-aso daluh mone bopaata.

17 + o 16:17 Mak 1:24,34*Ond vêêh-anju laam-ambe navu taamuyin hey o Pol-aso, tombe nateeey lôôt nambe, “Hil-anja latu Anutu baandoni-te hil kul vaha-so om danêêl Anutu-te samu samu sen gako ham jak-ato vu ham-anja.”

18 + o 16:18 Mak 16:17*Vêêh-anju yoo monateey nambêênju lak busin pin tombe Pol ahekalin ak, om hilin-ambe nêêl vu mamu sen lukando vêêh-ato nambe, “Sa naanêêl vu hong jak Yesu Kalisi haale naambe onggavuuh vêêh-anja de gana.” Tombe mamu hato la in vêêh-anjuuto pavis.

19 Tombe sim vêêh-anjute yêêv-aso layi nambe me-datovu mone laah e, om lalôôh Pol ayuuh Silas-ambe laandiiy yuuuh lala talind vu yêêv bop-aso,

20 + o 16:20 Mak 13:9; Sin 17:6; Mat 5:11*tombe lako yuuuh lala vu yêêv-aso be lanêêl nambe, “Omaaho yuuuh-anja yuuuh Yuda om yuuuh lawiing-ambe hil-ame dando nivasa le,

21 yuuuh danêêl vakasin lak gambum sen melohvu in nambe yiyy Lom sapa hôôk-ato le.”

22 + o 16:22 2Ko 11:25; Pil 1:30; 1Tes 2:2*De yik hil bayêen-anju lanêêl vakasin ak yuuuh having, om yêêv-aso lakaah yuuuhate lolop, tonde lanêêl nambe hil gaveek yuuuh.

23 Om laveek yuuuh lôôt, le mem latung yuuuh lukala kalaambus, de lanêêl niwêêk vu omaaho sen nanggin kalaambus-ato nambe yoo ganggin nivasa.

24 Tombe yêêv kalaambus hango de lanêêl niwêêk nambêenju vu yi, om la hatung yuuuh la bayêen alo sen neep lavuun-ato, le mem having yuuuh vahand lak haah.

²⁵ Tonde la busin laruun atombe Pol ayuuh Silas lalohak-ambe lawiing laalo vu Anutu, be kalaambus-aso pin deep dangoyin.

²⁶ Tonde jemaapi bopaata ti valup pavis-ambe taapinin ak bayêen kalaambus lôôt, tombe sim pavis atombe vinavi pin hataahin osin hees ani-wêek sen sil talu kalaambus-aso lak-ato kavaayin pin.

²⁷ + o 16:27 Sin 12:18-19*Tombe yêev kalaambus kandi le yi nambe vinavi pin hataahin, tombe sim ka vu nambe mak kalaambus-aso pin lapak-ambe lala, om hatul yite yipak in nambe yoo nyiis yi be jimb,

²⁸ lemu Pol teey bopaata lôôt nambe, “Êê, game ganyiis hong e, hey pin oo nando.”

²⁹ Tombe yêev-anjuuto teey-ambe sil taalungg kin la, tonde hatup-ambe lukala bayêen kalaambus alo be la hato pataav baambu neep voon-ambe monahees hôök Pol ayuuh Silas vahand.

³⁰ + o 16:30 Sin 2:37*Tonde hako yuuh-ambe la voon, le mem lingin yuuh nambe, “Himbop ayuuh, saambiing vaati in nambe Anutu gako sa jak?”

³¹ Le yuuh lanêêl nambe, “Galompayo na timu vu Omaaho Bop Yesu ond mem Anutu le gako hong jak gaving vanem o noom-aso.”

³² Tonde yuuh lanêêl Omaaho Bop-ate tanasin vu omaahôô-ju osin hil pin sen dando having yito.

³³ + o 16:33 Sin 16:15*Tombe yik hôök busin-anju omaahôô-ju hako yuuh-ambe la lipis payêês sen laveek yuuh-ato, tonde yuuh lalipis yi having yite hil pin pavis lak Yesu haale.

³⁴ Tonde hako Pol ayuu Silas-ambe lalakala yite bayêen, be vu vanôôn-ambe yuu laya, de having yite hil pin sen sil dando hôôk bayêen tii-to be lapêelis lôôt in lawii-having Anutu.

³⁵ Tonde langaah ak atombe yêev-aso lawiing ahevaavu heey lato be lanêel vu yêev kalaambus nambe, “Onggataahin vinavi in omaaho yuuhanjaato be yuu lana.”

³⁶ Tombe yêev kalaambus laah nêel vakasin-anju vu Pol ayuu Silas nambe, “Yêev bop-aso lawiing vakasin laam nambe sa gataahin vinavi de mana, om muuh gato ana osin malompayo melaas.”

³⁷ + o 16:37 Sin 22:25*Le Pol nêel vu ahevaavuso nambe, “Haay-anjo haay Lom” Sinaale 22:27-28*, le yoo laveek haay lak hil pin amend, de latung haay hôôk kalaambus malis amu, de me-latovu haayanêengg vakasin ti le, ma. Le nambe tana sen davu lambiing-ambe haay gato ana kaatokin-anjo, malis lôôt. Yoo lanaam-ambe gako haay ana ond mem.”

³⁸ Tombe ahevaavu-so lako vakasin-anjo be lalaah lanêel vu yêev bop-aso, tombe yêev-asôônju lango nambe yuu Lom, om layêenin lôôt.

³⁹ + o 16:39 Mat 8:34*Tombe sil lato be samu vakasin osin melaas vu yuu vêel e mem lako

* **16:37:** Hil Lom vaalu ond sil vu Lom nivalok, de vaalu ond sil-ame Lom nivalok e. In omaaho ti wiingin nambe gako haale Lom ond baanggo jak mone bop, tonde silate gambum ango neep nambe yêev Lom ji omaaho ti nivasa ond naanêel haale Lom jak yi. De Pol ond yi Yuda lemu mangganaan ayuu tangganaan lako haale Lom lung la, om Pol ond yi Lom having. Gangge

yuuuh-ambe lato lala voon, tonde sil kataangg yuuuh nambe yuuuh gavuuuh taakuu-ju de yuuuh lana.

⁴⁰ Om Pol ayuuuh Silas lavuuuh bayêen kalaambus-ande yuuuh lala Lidia baan, tombe yuuuh lakaas having Omaaho Bop-ate hil-ambe yuuuh kaandu sil lak tanasin vêel e mem yuuuh lala.

17

Hil Tesalonika lawiingin nambe lanyiis Pol ayuuuh Silas

¹ + o 17:1 1Tes 2:1-2*Yuuuh lala mop sen la taaku Ampipolis ayuuuh Apoloniaa-to be yuuuh latok lala Tesalonika sen hil Yuda-te dumb ti naalêe-to.

² Tombe yik Pol wiing nambe sen yoo nawiing-atо om lukala dumb alo having sil, be sil lakaas in Anutu-te vakasin sen lukaneep kaapiyaa-to hôôk busin sawaasin yaal.

³ + o 17:3 Luk 24:26; Sin 3:18; 9:22*Nêêl tatekin lôôt-ambe taato vu sil nambe omaaho sen Anutu yoo holin yi vulôôt in nambe dôôvu yiîy-ato ond Anutu-te vakasin neep nambe le gako nivaane be jimb de kandi jak vu hil yimbin-ate, tonde nêêl having nambe, “Yesu sen sa naanêêl vu ham-anjo ond yi omaaho sen Anutu yoo holin yi vulôôt-ato.”

⁴ + o 17:4 Sin 13:50*Tombe hil sen lango vakasin-anjuuto vaalu lawii-having-ambe sil sapa Pol ayuuuh Silas, de Glik sen kand navu Anutuu-to ond sil ngeeyaata lala sapa Pol ayuuuh Silas having, tonde vêeh osin banyend ngeeyaata laving.

⁵ + o 17:5 1Tes 2:14*Lemu hil Yuda ahend anipaya, om lako hil anipaya heey sen yoo dando talind ayuuah ameē-to, be lasupin sil lavuh ti, le mem lala laanjiihin hil taakuu-ju lôôt, tombe sil pin kandi osin ahend kalin-ambe lambuuah Jeson ambaan, be sil salo Pol ayuuah Silas in nambe lanôôh yuuh-ambe gako yuuh na vu himbop-aso.

⁶ + o 17:6 Sin 16:20*Le me-latovu yuuh e, om sil laandiiy Jeson having Omaaho Bop-ate hil vaalu be lala vu kaansol-aso be lateey nambe, “Hil-anja dawiing-ambe hil vu taaku pin-ame dando nivasa le, de gêen lalaam dandôô-jo,

⁷ + o 17:7 Luk 23:2; Jon 19:12*tombe Jeson hako sil-ambe lala dando having yi. Sil pin-anju davu kalêêh yêêv bop Sisa lava, de danêêl nambe silate omaaho lulemak ango nando, haale nambe Yesu.”

⁸ Tombe hil taakuu-ju pin laving kaansol-aso lango vakasin-anju, om kand yu-yuuh lôôt.

⁹ Tombe lanêêl-ambe Jeson-aso laanggo kot vêêl e mem lato lala.

Pol ayuuah Silas lala taaku Belia

¹⁰ Tonde busin hôôk atombe Omaaho Bop-ate hil lawiing Pol ayuuah Silas lala taaku Belia. Yuuh latok lala Belia tombe yuuh lahuli-lala hil Yuda-te dumb.

¹¹ + o 17:11 Jon 5:39*Tombe hil Yuda sen dando Beliaa-ju sil anind vasa savok hil Yuda vu Tesa-lonika, om lako tanasin ak pavis osin londpayo nivasa, de lak busin pin ond dasevin Anutu-te kaapiya lôôt in nambe lanjak ni naambe yuuhate vakasin la lohvu me malis.

¹² + o 17:12 Sin 13:50*Tombe Yuda ngeeyaata lawii-having, be vêêh bop Glik ngeeyaata osin moow ngeeyaata laving.

¹³ + o 17:13 Sin 14:19*Tonde hil Yuda vu Tesonika lango banye nambe Pol nêêl Anutu-te tanasin vu taaku Belia having, tombe sil lala laanjiihin hil ngeeyaata vu Belia, be sil kandi lak in nambe lambiing nindanjeen vu Pol-aso,

¹⁴ lemu Omaaho Bop-ate hil lango banye om lawiing Pol la hato lôôy pavis, de Silas ayuu Timoti yoo dando Belia.

¹⁵ De hil sen lako Pol-ambe lalaa-to ond lako yi be lala taaku Atens, tonde sil lalaah ond lako Pol-ate vakasin laah vu Silas ayuu Timoti nambe yuu lana vu yi pavis.

Pol nando Atens

¹⁶ Pol monanggin Silas ayuu Timoti vu Atens, tombe sim yi le hil taakuu-ju silate anutu tatuuhin vaha-so ngeeyaata lôôt, om yi vaa-ju le me-lohv lopayo le,

¹⁷ + o 17:17 Sin 18:19*om lukala dumb alo be vakaas having hil Yuda osin hil vaalu sen kand navu Anutuu-to, de lak busin pin la nakaas having hil sen dando talind-ato.

¹⁸ Tombe hil tanasin vaha ti danêêl sil nambe Epikulian, tonde hil tanasin vaha ango danêêl sil nambe Stoik, ond lakaas having Pol, de sil vaalu lanêêl nambe, “Omaaho nakaas nindanjeen-anjo wiwingin nambe naanêêl vaati?” De vaalu lanêêl nambe, “Mak nanêêl vakasin ak vaheey-ate Anutu.” In Pol nêêl Yesu-te banye nivasa osin nêêl Yesu kandi lak laah-ato vu sil ondeey lanêêl nambêêaju.

19 Om lako Pol-ambe

lala vu kaansol-aso be lanêêl nambe, “Hey aawiingin nambe otatekin vakasin anindoos sen onanêêl vu hil-anjaato be hey gango le,

20 in hey hango gate vakasin-anju tombe hey sahi le ango yoow, om hey aawiingin nambe anjak danggakook ani le.”

21 In hil Atens osin hil vaalu sen lalaam dando Atens-ato ond yoo lawiingin nambe gango vakasin mo-moos-ambe bakaas ak.

22 Om Pol la naale hôôk kaansol-aso lavuun, le mem nêêl nambe, “Ham Atens, saahe nambe ham oo nalohak vu anutu vaha vaha,

23 de sa hatup hôôk-ambe saalohvu hamate taaku pin, de saahe va sen ham nalohak vuu-to, tombe saatokak alata ti sil kaavu vakasin ti neep ak nambe, ‘Manyinjo Anutu sen yiyy doosin-ato yite.’ Ke, Anutu sen ham doosin-ande ham mon-alohak vuu-ja ond peey-anjo sa naanêêl langaah vu ham.

24 + o 17:24 1King 8:27; Sin 7:48*Anutu sen hatung ngaanggis osin va pin sen nando voon-anjôôto, yik Omaaho Bop sen nanggin baandoni osin voon-ato, ond Anutuu-ju me-nando hôôk dumb sen omaahonôôn dahaav-ato le.

25 + o 17:25 Saam 50:12; Ais 42:5*Anutuu-ju ond yoo navu metumin osin aviloos-ambe va pin vu omaahonôôn, om me-nativak in vati in nambe omaahonôôn namand biing kul vu yi le, malis.

26 + o 17:26 Diu 32:8*De Anutu hatung omaaho timu nyendoos le mem wiing-ambe yiyy omaahonôôn pin sen yiyy nando lohvu taaku pin-ato ond yaapumak omaaho timuu-ju, tombe Anutu

hatung busin sen yiyy mandôô-to osin holin yate taaku nalu ti ti sen yiyy mandôô-to vulôôt.

²⁷ + o 17:27 Ais 55:6; Saam 145:18; Jer 23:23*Yik Anutu wiingin nambe hil oo salo be palaahin, tombe daatovu yi, in me-nando diin in yiyy pin e.

²⁸ Ond yik yiijuu sen yiyy nando moos de yiyy nala de yiyy nando. Nambe sen hamate hil laalo dangga-so lanêêl nambe, ‘Yik yaatu yite noondin having.’

²⁹ + o 17:29 Jen 1:27; Ais 40:18-20; 44:10-17; Sin 19:26*Ke, yaatu Anutu-te noondin, om yame yakangg bu naambe Anutu ni nambe va kanu sen omaahonôôn oo kand navu be davu samu lak gool ayuuuh siliva osin tatuuh-ato le.

³⁰ + o 17:30 Sin 14:16*In bôôy ond omaahonôôn doosin Anutu, om va sen sil dawiiing-anjuuto ond Anutu yi mu, le sim gêen ond nêêl vu hil lohvu taaku pin nambe, ‘Ham anggilin ham alompayo.’

³¹ + o 17:31 Saam 9:8; 96:13; Sin 10:42*In yoo holin yite omaaho ango in nambe gangoyin hil pin-ate vakasin-ambe naanêêl nivalok dôôk busin sen hatung lung laa-to, om omaahôô-ju Anutu wiing-ambe kandi lak laah vu hil yimbin-ate in nambe hil pin lanjak ni naambe Anutu yoo holin yi in kul-anju keen.”

³² Sil lango vakasin sen kandi lak vu hil yimbin-atêêto, tombe sil vaalu lanêêl pale, de vaaluk lanêêl nambe, “Buti le onaanêêl vakasin-anjo be hey gango jesin naah e.”

³³ Lanêêl lung atonde Pol havuuh sil-ande hato be la,

³⁴ tonde hil vaalu lawii-having Pol-ambe sil

sapa yi, ond tik kaansol haale nambe Daionisias, de vêêh ango haale nambe Damalis, tonde yik hil vaalu having.

18

Pol la nando Kolint

¹ Pol nando Atens vêêl e mem la Kolint,

² + o 18:2 Lom 16:3*tombe tovu Yuda ti haale nambe Akwila, baan Pontas, ond yuuuh vane Plisila daahen vu Itaali be lalup, in omaaho lulemak Klodias nêêl vu hil Yuda pin nambe sil gavuuh taaku bop Lom sen neep Itaali-te taakuento de lana, om yuuuh lala dando Kolint. Om Pol la vu yuuuh,

³ + o 18:3 Sin 20:34; 1Ko 4:12*tombe yi nambe yaalate kul sen yaal danduuh sel bayêén-atêêto timu, om nando having yuuuh-ambe yaal mondawiing kul-anju.

⁴ De lohvu busin sawaasin pin ond Pol la vakaas having hil hôôk Yuda-te dumb alo, in nambe hil Yuda osin Glik lambiing gaving.

⁵ + o 18:5 Sin 17:14-15; 9:22*Tonde Silas ayuuuh Timoti vu Makedonia be lato, le mem Pol nêêl tanasin lôôt vu hil Yuda lak busin pin nambe Yesu ond omaaho sen Anutu yoo holin yi vulôôt-ato.

⁶ + o 18:6 Sin 13:46,51; 20:26; Luk 9:5*Lemu sil mahôôh Pol lôôt, osin lanêêl yi pale, om tatehin kambus sen nando lak yite lolop-ato in taato silate nipaya de nêêl vu sil nambe, “Nyevahaan naatovu ham ond yoo neep vu ham, de sak malis, de peey-anjo ond sim sana vu hil vaalu sen silame Yudaa-to.”

⁷ Tombe Pol vu dumb-anju be lakala omaaho ti haale nambe Tisias Jastas-ate bayêen, ond omaahôô-ju ka navu Anutu, de baan nando ngaaho vu hil Yuda-te dumb.

⁸ + o 18:8 1Ko 1:14*Tombe yêêv sen nanggin dumb-atô haale nambe Klispas, having vane be noondin pin lawii-having Omaaho Bop, de hil Kolint ngeeyaata lango Pol-ate tanasin, tombe yik lawii-having-ambe lalipis bel.

⁹ + o 18:9 1Ko 2:3*De busin ti tombe Pol yi taahu taahu ti, ond yi de Omaaho Bop nêêl vu nambe, “Game ganjêénin osin game mando lavam masin e, onaanêêl lôôt,

¹⁰ + o 18:10 Jos 1:9; Ais 41:10; Jer 1:8; Jon 10:16*in sa nando having hong om omaaho ti me-le biing nindanjeen vu hong e, in sate hil ngeeyaata dando taakuu-ja.”

¹¹ Tombe Pol nando having hil Kolint lohvü ta ti be vahaan, de yoo motaahu sil hôök Anutu-te tanasin lôôt.

¹² Lemu Galio tu hil Akaia-te yêêv bop, tombe hôök busin-anju hil Yuda sen dando Akaiaa-to pin ond londpayo lavuh ti in nambe lambiing nindanjeen vu Pol, om lako Pol la in biing vakasin.

¹³ Tombe lanêêl nambe, “Omaahôô-ja navu taahu hil nambe lanohak vu Anutu jak tanasin ti yoow, le me-lohvü Mose-te tanasin e.”

¹⁴ Tombe Pol wiingin nambe naanêêl vakasin naah, le Galio nêêl vu hil Yuda nambe, “Ham Yuda, naambe omaahôô-jo biing va nindanjeen osin biing va nipaya lôôt, ond mem lohvü nambe sa gango ham lavam,

¹⁵ + o 18:15 Sin 23:29; 25:18-19; Jon 18:31*le sen ham alaam vu sa in vakasin malis amu osin haale heey de ham oote tanasin, ond mam ham oo samu. Sak sa nimbaya nambe same gango vakasin jak va naambêenja le.”

¹⁶ Tonde luus sil-ambe lala.

¹⁷ Tombe lalôôh yêêv ti haale nambe Sotenis nanggin hil Yuda-te dumb, be layiis hôôk bayêen vinavi sen dawiing vakasin hôôk-ato, lemu yêêv bop Galio me-nêêl vakasin ti le.

Pol tok laah Antiok Silia

¹⁸ + o 18:18 Sin 21:24*Pol nando Kolint busin ngeeyaata having, le mem lôôh Omaaho Bop-ate hil namand-ande la, tombe Plisila yuuuh laya Akwila lala having. Tombe vu taaku Senkia ond Pol nêêl-ambe sil laving luvalus la in jôôy vakasin ti vu Anutu, tonde mem yaal lalak sip-ambe lala in lana Silia.

¹⁹ + o 18:19 Sin 17:17*Sil lala lato Epesas atombe Pol havuuuh Akwila yuuuh Plisila dandôô-ju, de yoo huli-la Yuda-te dumb alo be vakaas having hil Yuda.

²⁰ Tombe sim sil kataangg nambe mando busin heey gaving sil vêêl e, le Pol-ame wii-having sil lavand e,

²¹ + o 18:21 Lom 1:10; 1Ko 4:19; Jem 4:15*om lôôh sil namand-ande nêêl vu sil nambe, “Naambe Anutu wiingin ond sale aanom vu ham jesin naah.” Tonde lak sip vu Epesas-ambe la.

²² Latok lala Sisalia tombe Pol la valup-ambe vakaas having hil bel-ate vu Yelusalem vêêl e mem laah hato Antiok.

Pol hatup hôôk kul tu balon yaal

²³ Pol nando Antiok busin ngeeyaata le mem kandi lak vuu-ju be la hatup hôôk taaku Galata osin Plisia be navu kaandu Yesu-te hil pin.

Apolo nêêl tanasin vu Epesas

²⁴ Tombe Yuda ti vu Aleksandlia haale nambe Apolo, valu-nando Epesas ond omaaho yoo nakaas nivasa, de yoo lak Anutu-te tanasin sen neep hôôk yite kaapiyaa-to ni,

²⁵ + o 18:25 Lom 12:11; Sin 19:3*in sil taahu yi hôôk Omaaho Bop-ate mopaatôôv tombe lopayo naanjiihin yi lôôt, om yoo nanêêl osin navu taahu hil hôôk va sen Yesu wiing-ato nivalok, lemu Jon-ate belipisin timu ond lak ni.

²⁶ + o 18:26 Sin 19:8*De nanêêl tanasin hôôk hil Yuda-te dumb alo niwêek lôôt, tombe Plisila yuuuh laya Akwila lango, om yuuuh lako be la nando having yuuuh, be mem yuuuh tatekin Anutu-te tanasin nivasa lôôt vu yi yesin laah.

²⁷ + o 18:27 2Ko 3:1; Kol 4:10*Tombe Apolo wiingin nambe na Akaia, om Omaaho Bop-ate hil vu Epesas laliingga lung la le mem sil kaavu kaapiya la vu Yesu-te hil vu Akaia nambe sil gako Apolo jak nivasa. Om Apolo tok la Akaia tombe hil sen Anutu samu sil-ambe lawii-having yii-to ond Apolo hôôvu sil nivasa lôôt,

²⁸ + o 18:28 Sin 9:22; 17:3*tonde hil Yuda sen dando Akaiaa-juuto ond sil o Apolo-so lanêêl sil in tanasin hôôk hil pin amend, tombe Apolo-te vakasin anivasa lôôt om sil-ame lalohvu le, in yoo

tatekin Anutu-te vakasin sen neep hôôk kaapiyaa-to vu sil nambe Yesu yi omaaho sen Anutu yoo holin yi vulôôt-ato.

19

Pol la Epesas

¹ + o 19:1 1Ko 3:6*Busin sen Apolo nando Kolintato ond Pol yu taaku Plisia be la monaloh kandu vaalu be la hato Epesas, tombe tovu Yesu-te hil vaalu vuu-ju,

² + o 19:2 Sin 2:38; 8:16; Jon 7:39*tombe lingin sil nambe, “Ham awii-having-ambe Vavi Vaambuung lakala ham bôôy a?” Le lanêêl nambe, “Malis, hey-ame hango nambe Vavi Vaambuung ti nando le.”

³ Tombe Pol lingin sil nambe, “De ham alipis bel lak tanasin lati?” Tombe lanêêl laah vu nambe, “Hey aalipis ak Jon-ate belipisin.”

⁴ + o 19:4 Mat 3:1-2,11*Tombe Pol nêêl nambe, “Bôôy Jon lipis hil lak bel ond sil lahilin londpayo le mem lalipis bel, de Jon nêêl vu sil nambe lambiing gaving omaaho ango sen le taamuyin yii-to, ond omaahôô-ju yik Yesu.”

⁵ Lango Pol-ate vakasin-anju tombe lalipis bel lak Omaaho Bop Yesu haale,

⁶ + o 19:6 Sin 8:17; 10:44,46*tonde Pol hambe nama lak sil, tombe Vavi Vaambuung lakala sil-ambe lakaas bayêen bu ti ti lavand osin lanêêl Anutu-te vakasin langaah.

⁷ Hil-anju sil pin lohvu nomaayuuh-ambe laam yuuh.

⁸ Tonde Pol huli-la Yuda-te dumb alo, be nanêêl tanasin niwêêk lohvu kwaav yaal, ond nanêêl

langaah lôôt in nambe sil dakaas ak vakasin sen Anutu nanggin yite hil-ato in nambe lambiing gaving.

⁹ + o 19:9 2Ko 6:14-18*Lemu hil vaalu londpayo niwêêk lôôt om nind bayá nambe me-lambiing gaving e, om lanêêl vakasin anipaya lak Omaaho Bop-ate tanasin hôök hil pin amend, om Pol havuu hil Yuda de supin Yesu-te hil-ambe la nakaas having sil lak busin pin vu omaaho ti haale nambe Tilanas-ate dumb kaapiya.

¹⁰ + o 19:10 2Ti 1:15*Pol wiing nambêênu lohvut yuuuh, tombe hil Yuda osin Glik sen dando lohvut Esia-te taaku pin-ato sil pin lango Omaaho Bop-ate tanasin.

Siva noondin-ate vakasin

¹¹ + o 19:11 Sin 14:3*Anutu kaandu Pol-ambe wiing taahu taahu heey osin niwêêk ti yoow,

¹² + o 19:12 Sin 5:15*om dako Pol-ate tôômb laasêêp-ate yuuuh ame be lala datung lak hil anilakin, tombe nind vasa nalak de mamu nipaya navuu sil-ande hato nala.

¹³ + o 19:13 Mak 9:38*Tonde Yuda-te hil lôômb vaalu mondatup hôök lohvut taaku pin in nambe gatiiy mamu nipaya na, de sil vaalu danêêl Omaaho Bop Yesu haale in nambe gatiiy mamu nipaya na in hil, de lanêêl vu mamu nipaya nambe, “Sa naanêêl niwêêk vu ham jak Yesu haale sen Pol nanêêl yite vakasin-ato naambe ham gato ana.”

¹⁴ Tombe Yuda-te kul vaha sen datung salivangin-ato silate yêêv bop ti haale nambe Siva, ond noow namaavaalu be vindak yuuuh-ato lawiing vaa-ju,

¹⁵ + o 19:15 Mak 1:24,34*tombe mamu nipaya nêêl laah vu sil nambe, “Yesu ond sa lak ni, de Pol ond sa lak ni having, lemu ham-anjo vu tana?”

¹⁶ Tombe omaaho sen mamu nipaya hôôvuu-to pasong-ambe la yiis sil lôôt-ambe laanggôôl sil, tombe nind naavi nihe-hees de kweek silanêênd lolop lôôt, om sil lavuuh bayêên-anju de lapak-ambe lala nind nôôn.

¹⁷ + o 19:17 Sin 5:5,11*Tombe Yuda osin hil Glik pin sen dando Epesas-ato lango banye be layêênin lôôt, om lako Omaaho Bop Yesu haale lak,

¹⁸ de hil sen lawii-having lung laa-to, ond sil ngeeyaata dalaam-ambe dahôôl londpayo osin danêêl va pin sen dawiing-ato langaah.

¹⁹ Tonde hil palaas dangga osin hil lôômb dangga-so de hil sen dako naambôôy ayuuh amêê-to, ond lasupin silate kaapiya lôômb ayuuh ame-têêto be lazi lak kin lak hil pin amend. Kaapiya pin-anju laanggo lak mone bopaata lôôt lohvu 50 taosen siliva.

²⁰ + o 19:20 Sin 12:24*Tombe Omaaho Bop-ate vakasin tu bopaata be niwêêk ak.

Hil Epesas lawiing lavand ak Pol lôôt

²¹ + o 19:21 Sin 23:11; Lom 1:13*Lung atonde Vavi Vaambuung vêêl Pol aka lak, om Pol aka vu nambe na gatup hôök na Makedonia osin Akaia vêêl e mem na Yelusalem, de nêêl nambe, “Sanaa-ju vêêl e mem taamusin atombe sana Lom gaving.”

²² + o 19:22 Lom 16:23; 2Ti 4:20*Om wiing yite omaaho yuuh sen yuuh dahôôvu yii-to, Timoti yuuh Elastas, be yuuh lala Makedonia de Pol yoo nando Esia daka having.

²³ + o 19:23 2Ko 1:8*Tombe hôôk busin-anju hil lakaas ngeeyaata in Omaaho Bop-ate tanasin, om lawiing nindaandun bopaata,

²⁴ + o 19:24 Sin 16:16*in dangga nambe omaaho ti haale nambe Demitlias, yite kul nambe navu samu va lak siliva, om yoo navu samu vêêh anutu tatuhiin vaha Atemis-ate dumb kanu heey lak siliva, tombe hil daanggo vaa-ju om naluh mone bopaata be nahôôvu hil sen dawiing kul-anjuuto.

²⁵ Tonde supin yite hil osin hil vaalu sen sil pin dawiing kul timuu-to, le mem nêêl vu sil nambe, “Ham hil-e, ham alak ni nambe yate kul-anjo ond yiyy naaluh mone bopaata lak.

²⁶ + o 19:26 Sin 17:29*De Pol-anja ond ham ahe osin ham hango nambe navu palapin hil ngeeyaata, lemu me-wiing vu Epesas amu le, malis, wiing-ambe lohvü taaku Esia pin, de nanêêl nambe anutu sen omaahonôôn namand navu samuu-to ond me-Anutu keen e.

²⁷ Tombe Pol-ate vakasin-anju navu biing-ambe yate kul-anjo haale biing paya, de yiyy-ame yoote kul timuu-jo le, malis. Navu biing-ambe hil pin lanji vêêh anutu bop Atemis-ate dumb bop naambe va malis, de navu daanggôôl yite haale bop gaving. Anutu vêêh-anju ond hil Esia pin osin hil vu taaku pin dalohak vuu-to.”

²⁸ Sil lango vakasin-anju tombe ahend kalin bopaata lôôt-ambé lateey nambe, “Yiyy Epesas-ate anutu vêêh Atemis bopaata.”

²⁹ + o 19:29 Sin 20:4; 27:2; Kol 4:10; Plm 24*Tonde hil pin lateey lôôt atombe taakuu-ju nindaandun bopaata, de sil pin latup-ambe lala taaku sen lasupin hôôk-ato, be sil lalôôh hil

Makedonia yuuuh, Gaias ayuuuh Alistakas sen yuuuh davu sapa Pol-ato, be laandiiy yuuuh lala having sil.

³⁰ Tombe Pol wiingin nambe na baale hôôk hil-anju lavuun le Yesu-te hil lanêêlin,

³¹ de yêêv bop heey vu Esia sen Pol-ate nipaapu sil-ato, ond lanêêl banye la vu Pol having, de sil kataangg nambe me-dukana taaku supin-anju le.

³² Tombe hil pin-anjuuto lawiing nindaandun bopaata, om vaalu dateey vakasin ango, de vaalu dateey vakasin ango, tonde hil ngeeyaata doosin va sen lasupin lalaam-anjo danggakook.

³³ Tombe hil Yuda lakôôh silate omaaho ti haale nambe Aleksanda la naale lavuun, tombe hil vaalu lanêêl vu nambe, “Onaanêêl naambêêno.” Om Aleksanda valaah nama in nambe sil lavand nama de naanêêl vakasin vu sil,

³⁴ lemu sil lalak ni nambe yi Yuda, om sil pin lavuh ti be lateey nambe, “Yiy Epesas-ate anutu vêêh Atemis bopaata.” Sil mondateey nambêênu lohvu taaku me yuuuh,

³⁵ tonde silate yêêv sen navu kaavu vakasin ayuuuh amêê-to

naale sil lavand jeen, de nêêl nambe, “Ham Epesas, omaaho lati me-lak ni le, nambe yiy Epesas-anjo yiy nanggin vêêh bop Atemis-ate dumb bop osin tatuuh vaambuung sen tok vu baandonii-to?

³⁶ Omaaho ti me-le mahôôh ham in vakasin-anju le, om ham baale de ham-ame ambiing danjeen e.

³⁷ Tonde ham anggiiy omaaho yuuuh-anja laam, lemu yuuuh-ame lahôôndak vati hôôk dumb alo le,

de yuuh-amē lanēēl yate vēēh anutuu-juuto pale le.

³⁸ De naambe Demitlias having yite kul vaha-so silate vakasin ti neep vu omaaho ti, ond busin sen lambiing vakasin-ato neep, de yēēv-aso dando, om yik sil oo lana lambiing vakasin.

³⁹ De naambe vakasin heey oo naahen neep vu ham, ond ham oo samu dōōk busin sen supin-ato nivalok.

⁴⁰ In gēēn vandiisin-anjo yiyy aawiing nin-danjeen om yiyy navu naatovu vakasin nyeva-haan, de va sen yaawiing nindaandun-anjo dang-gakook keen ti me-neep e, om naambe lanjingin yiyy in danggakook ond yale naanēēl vaati?"

⁴¹ Nēēl lung la tonde luus sil-ambe lala.

20

Pol la Makedonia osin Glik

¹ Nindaandun-anju lung la le mem Pol teey Yesu-te hil lalaam vu yi, be kaandu sil lak tanasin heey vēēl e, mem lōōh sil namand-ande la Makedonia,

² tombe yoo mokaandu hil lak tanasin vu Makedonia be la hato Glik.

³ Pol nando Glik-ambe kwaav yaal lung la, de wiingin nambe jak sip-ambe na Silia, tombe sim hango de hil Yuda lanjōōy vakasin in nambe lanyiis-ambe jimb, om ka vu nambe sapa vaha be naah osin Makedonia.

⁴ + o 20:4 Sin 19:29; 21:29; Ep 6:21*Tombe Pilas noow Sopata vu taaku Belia la having

Pol, tonde omaaho yuuh vu Tesalonika, Alistikas ayuu Sekandas, de Gaias vu taaku Debi, de

Timoti, tonde Tikikas ayuuh Tolopimas vu Esia, hil-anju laving Pol-ambe lala.

⁵ Tombe lamunggin-ambe mondanggin haay Pol vu Toloas.

⁶ Tonde busin bop busin haluusin sen hil akand navu sen Anutu haluuh hil Islel hôôk vu Ijip bôôyatô lung la, le mem haay alak sip vu Pilipai be haay ala. Haay monala be busin namaavaalu lung la, le mem haay aatok ala Toloas vu sil, tombe hey nandôô-ju lohvu busin namaavaalu be vindak yuuh.

Pol wiing-ambe maanggêêm Toloas ti kandi vasa hôôk

⁷ + o 20:7 Sin 2:42,46*Hôôk Sonda tombe hey aasupin in hey angga vanôôn osin paasa, tonde Pol monanêêl vakasin vu hil in ka vu nambe saminaanôôn ond navu na, om monanêêl vakasin-ambe la busin lavuun ak.

⁸ Tombe sil taalungg hôôk lam ngeeyaata be monatum hôôk bayêen alopayo ti baandoni sen hey aasupin nando lak-ato,

⁹ tonde Pol oo monanêêl vakasin ahusaandiin lôôt, tombe maanggêêm ti haale nambe Yutikas ond nando lak bayêen avi vu baandoni. Bayêen-anju lopayo katap yaal tombe maanggêêm-anju me monayip atombe neep la, om lupake vu lopayo ti neep baandonii-to be la voon, tombe lala lalôôh ak osin me yimbin.

¹⁰ + o 20:10 1King 17:21*Tombe Pol luus-ambe la hato pataav-ambe neep ak maanggêêm-anju, tonde kaambi de néêl vu sil nambe, “Ham alom-payo me-nimeen e, kanu nando.”

¹¹ Tonde Pol lak-ambe laah bayêen alo baan-doni tombe kalêeh balet-ambe ya, tonde yoo monakaas lôôt having sil, be langaaah ak e mem la.

¹² De lako maanggêêm-anjuuto be lala, de lond-payo nivasa lak laah in nando moos.

Sil vu Toloas-ambe lalakala Mailitas

¹³ Pol nêîl nambe noh voon-ambe na, de hey vaalu anjak sip-ambe naamunggin in naambe hey naatovu Pol vu taaku Asos ond hey gako jak sip vuu-ju.

¹⁴ Om Pol tovu hey vuu-ju tombe hey hako lak sip-ambe hey ala Mitilini.

¹⁵ Tonde hey vu Mitilini be hey monala be bus hôök, de langaaah ak atombe hey ala ngaaho vu taaku Kaios, tonde hey monala be bus hôök, de langaaah ak atombe hey aatok ala Semos, tonde hey monala be heendiyy e mem hey aatok ala taaku Mailitas.

¹⁶ De Pol aka vu nambe me-mando busin ngeey vu Esia le, ondeey hey haluuuh Epesas hôök-ande hey ala Mailitas, in yoo wiingin nambe na pavis in ji busin Pentikos vu Yelusalem.

Pol vakaas having himbop-aso vu Epesas

¹⁷ + o 20:17 Sin 18:21*Tombe vu Mailitas ond Pol nêîl vakasin la Epesas vu hil bel-ate himbop-aso nambe lanaam vu yi.

¹⁸ + o 20:18 Sin 18:19; 19:10*Om sil lato be Pol nêîl vu sil nambe, “Ham oo alak ni nambe va sen saawiing nyendoos vu Esiaa-to de lohvu busin pin ond sa nando having ham.

¹⁹ + o 20:19 Sin 20:3*De hil Yuda lanjôôy vakasin in nambe daanggôôl sa om nimeen osin sahisin ngeeyaata tovu sa, lemu sa laanggôôl sa haalengg, de sa naawiing Omaaho Bop-ate kul osin sa mengg luk.

²⁰ De vakasin nivasa sen samu ham-ato ond saanêêl pin, de same aavun ti in ham e, sa taahu ham vu talind-ande vu hamate bayêên alo having.

²¹ De lak busin pin ond sa naanêêl tanasin langaaah vu hil Yuda osin Glik in nambe langgilin londpayo na vu Anutu be lambiing gaving Omaaho Bop Yesu.

²² + o 20:22 Sin 19:21*Le gêêñ ond Vavi Vaambuong nêêl niwêêk om sa nala Yelusalem, tonde va sen le naatovu sa vu Yelusalem-ato ond sa doosin.

²³ + o 20:23 Sin 9:16; 21:4,11*Sa lak ni mu nambe lohvu taaku pin ond Vavi Vaambuong nanêêl taato vu sa nambe sale aanduus kalaambus osin nimeen naatovu sa.

²⁴ + o 20:24 Sin 21:13; 2Ti 4:7*Lemu sa kanggame navu sa ningg naavi nambe va nivasa in nambe sa naapuvu tatin e, malis. Soo naawiinggin taamuyin mopaatôôv sen sa naaloh-ato, be saambiing kul sen Omaaho Bop Yesu vu vu saato jung na le. Kul-anju sa naanêêl Anutu-te banye nivasa sen Anutu nawiing samu samu vu yiij-ato langaaah,

²⁵ om ham angge, gêêñ sa lak ni nambe ham sen sa laas-ambe saanêêl tanasin lak Anutu nanggin yite hil-ato langaaah vu ham, ond ham pin-ame le angge sa mengg jesin naah e.

²⁶ + o 20:26 Sin 18:6*“Om gêêñ-anjo sa naanêêl

langaah vu ham naambe, ham ti nambe na menama ond me-neep vu sa le,

²⁷ in Anutu-te tanasin ond soo aanêêl pin vu ham, de same aavun vakasin ti le.

²⁸ + o 20:28 1Ti 4:16; 1Pi 5:2-4*Om ham oo ganggin ham, de ham ganggin bik sipsip pin sen Vavi Vaambuung wiing-ambe ham atu silate yêêv-ato, osin ham ganggin Anutu-te hil sen yoo vaanggo lak Noow-ate nihees-ato.

²⁹ + o 20:29 Mat 7:15; Jon 10:12*In sa lak ni nambe sa gavuuham-ande sana, ond voow bamaan anipaya le dukanaam ham lavuun-ambe biing nindanjeen nipaya vu Omaaho Bop-ate bik sipsip-aso lôôt.

³⁰ + o 20:30 1; Jon 2:19*Tonde hamate hil vaalu yoo le kandi be daanêêl tanasin na paya, in sil daandiiy Yesu-te hil lanaah sapa sil.

³¹ + o 20:31 Mak 13:37; Sin 19:8,10; 1Tes 2:11*Om ham amem oo naatum, de ham akam bu sen sa nando having ham lohvu ta yaal-ato ond langaah-ande busin same sawaah e, soo monaanêêl tanasin vu ham ti osin sa mengg luk.

³² + o 20:32 Sin 26:18*Om peey-anjo saambiing ham andukana Anutu nama osin yite vakasin samu samu in nambe ganggin ham, de lohvu nambe bu niwêek vu ham osin bu va nivasa sen yoo hatung vu yite hil-ato vu ham.

³³ + o 20:33 1Sm 12:3; 1Ko 9:11-12*Same naawingin hil-ate siliva yuuham osin tôômb ayuuham le,

³⁴ + o 20:34 Sin 18:3; 1Tes 2:9*yik ham oo alak ni nambe sa namangg yuuham yoo wiing kul ondeey hôôvu sa in va sen saativak in-ato, de

hôôvu hil vaalu sen dando having saa-to having.

³⁵ + o 20:35 Mat 10:8*Tonde sa taahu ham lôôt in nambe yaambiing kul aniwêêk naambêêñjo in yaandôôvu hil anipaya. De yakangg bu vakasin sen Omaaho Bop Yesu yoo nêêl-ato nambe, ‘Yiy gako va vu hil-ato ond yahengg anivasa jak, nganjo yaambu va vu hil ond le biing-ambe yahengg anivasa jak savok.’ ”

³⁶ + o 20:36 Sin 21:5*Pol nêêl vakasin-anjo lung la, tonde hatung kaatu de lohak having sil pin.

³⁷ Tombe hil pin lasu tonde sil kaambi Pol-ande lamuuuh gaambôôk,

³⁸ + o 20:38 Sin 20:25*de londpayo nimeen lôôt in vakasin sen Pol nêêl nambe, “Ham-ame le angge sa mengg jesin naah e.” Lung atonde langgiyy Pol la sip.

21

Pol lakala sip in na Yelusalem

¹ Hey havuuh sil-ande hey alak sip-ambe hey ala nivalok vu taaku Kos, tonde heendiiy atombe mem hey aatok ala Los, be hey haluuh Los lom-ande hey aatok ala Patala.

² Tonde sim hey aatovu sip ti nala Pinisia om hey alakalaah sip-anju be hey ala.

³ Hey monala be hey aahe taaku Saiplas neep laah osin nama kêênj tombe hey haluuh lom, de hey ala be hey aatok ala Taia sen neep Silia-te taakuu-to, in sip gatung kupak mandôô-ju.

⁴ + o 21:4 Sin 20:23*Tombe hey salo Yesu-te hil vuu-ju be hey nando having sil lohvus busin

namaavaalu be vindak yuuuh, tonde Vavi Vaambuung vêêl sil alund ak om lanêêl vu Pol nambe me-na Yelusalem e.

⁵ + o 21:5 Sin 20:36*Hey nando be busin lung la le mem sil pin vu taakuu-ju osin vanêêndin ayuuuh noondin langgiiy hey ala lôôy nanyendangga, tombe hey hatung kaatu de hey aalohak.

⁶ Tombe hey aalôôh hey namangg lung la le mem hey alakala sip-ande sil lalaah sil ambaand.

Agabas vu kôôvu Pol vu Sisalia

⁷ Hey vu Taia be hey ala lôôt-ambe aatok ala Tolemes, be hey vakaas having Omaaho Bop-ate hil vuu-ju, de hey nando busin ti having sil.

⁸ + o 21:8 Sin 6:5; 8:40*Tonde samiinaanôôn atombe hey kandi vu Tolemes-ambe hey aatok ala Sisalia, tombe hey ala sinaale Pilip-ate bayêênambe hey nando having yi. Pilip-anju laholin yi having hil namaavaalu vindak ti, in dahôôvu sinaale bop-aso munggin-ato,

⁹ + o 21:9 Sin 2:17*de nowaavêêh yumbeeyuuuh dando de me-lalak moow e, ond sil danêêl Anutute vakasin langaaah.

¹⁰ + o 21:10 Sin 11:28*Hey nando Sisalia busin heey, tonde sim omaaho ti nanêêl Anutute vakasin langaaah, haale nambe Agabas, ond vu Yudia be hato vu hey.

¹¹ + o 21:11 Jon 21:18; Sin 20:23; 21:33*Tombe lôôh Pol-ate let-ambe yoo duuh vaha yuuuh nama de nêêl nambe, “Vavi Vaambuung nêêl nambe, ‘Hil Yuda vu Yelusalem le daanduuuh let mangganaan naambêenjo, be lambu yi dukana hil vaalu sen sil-ame Yudaa-to namand.’ ”

¹² + o 21:12 Mat 16:22*Hey hango vakasin-anju tombe hey having hil bayêen-anju be hey aanêel niwêek lôôt vu Pol nambe me-jak-ambe na Yelusalem e.

¹³ + o 21:13 Sin 20:24*Le Pol nêel vu hey nambe, “Nambe vaati sen ham nasu be ham nawiing sa longgpayo nimeen ak? Naambe sil talu sa me lanyiis sa vu Yelusalem-ambe saanggimb ak Omaaho Bop Yesu haale ond yik lung.”

¹⁴ Om me-wii-having hey lavangg e, tombe hey lavangg ma de hey aanêel nambe, “Omaaho Bop oote vakasin nôôn jak.”

Pol la vakaas having himbop-aso vu Yelusalem

¹⁵ Busin heey lung la vêel e mem hey hatongin heyate va yuuu ame be hey ala valup Yelusalem,

¹⁶ tombe Yesu-te hil vaalu vu Sisalia laving hey. Sil langgiiy hey-ambe hey ala nando having Neson. Neson-anju vu Saiplas de yoo wii-having Yesu bôôy.

¹⁷ Tonde hey aatok valup Yelusalem atombe Omaaho Bop-ate hil lako hey ak osin londpayo nivasa,

¹⁸ + o 21:18 Sin 15:2,13; Gal 1:19*de sami-inaanôôn atombe Pol having hey-ambe hey ala vu Jems, in sil o himbop-aso pin lasupin dandôô-ju.

¹⁹ + o 21:19 Sin 15:12*Tombe Pol lôôh sil namand, tonde mem hatulin va pin sen Anutu wiing-ambe kul nôôn ak vu hil vaalu sen sil-ame Yudaa-to vu sil.

²⁰ + o 21:20 Sin 15:1,5*Himbop-aso lango Pol-ate vakasin lung la le mem lako Anutu haale lak-ambe lanêel vu Pol nambe, “Hali-e, gangge Yuda

ngeeyaata lôôt lawii-having Yesu lung la, le yoo dapuvu Mose-te tanasin aniwêek lôôt,

²¹ + o 21:21 Sin 16:3; Gal 2:3*lemu sil lango nambe onanêél tanasin vu hil Yuda vaalu sen dando hôök hil ango-te taakuu-to nambe sil gavuuh Mose-te tanasin, de sil-ame galaah noondin-aso nind naavi le, de sil-ame sapa silate gambum bôôy jesin naah e.

²² Om peey e yaambiing vaati? Keen, sil davu gango banye naambe galaam lung la,

²³ om otaamuyin va sen hey navu naanêél vu hong-anjo. Heyate hil yumbeyuuuh lanjôôy vakasin

ti vu Anutu,

²⁴ + o 21:24 Nam 6:1-21; Sin 18:18*om onggako sil-anju be ham samu ham nohvü Mose-te tanasin nêél-ato, tonde om баanggo va vu sil in nambe sil gatung salivangin jak vêél e, ond mem lohvü nambe sil daakêél lundvalus. Gambiing naam-bêenja ond hil pin e lanjak ni naambe vakasin sen lanêél ak hong-ato nôôn ma, tonde lanjak ni gaving naambe goo navu sapa Mose-te tanasin pin.

²⁵ + o 21:25 Sin 15:28-29*De hil sen sil-ame Yudaa-to lemu lawii-having Omaaho Bop-ato, ond yiii kaavu kaapiya be yaanêél vu sil lung la in vakasin sen yaanjôôy bôôy-ato, nambe sil-ame lanja va sen datung salivangin vu anutu tatuhiin vaha-sôôto le, de me-lanja va pin anihees e, de me-lanja vahivak sen hil danggingg ka be nayimb-ato le, tonde vêêh ayuuh moow-ame gako sil danjeen e.”

²⁶ + o 21:26 1Ko 9:20*Om samiinaanôôn atombe

Pol hako hil yumbeyuuh-anju tombe wiing va pin sen samu ninaavii-to having sil. Wiing nambêenju tonde huli-la Anutu-te dumb bop alo be néêl vu kul vaha sen datung salivangin-ato nambe sil mando be na gato busin ti le mem sil ti ti gatung silate salivangin.

Hil Yuda lalôôh Pol

²⁷ Tombe ngaaho lak in nambe busin na-maavaalu be vindak yuuh-ato jung na in sil gatung salivangin, tombe hil Yuda vu Esia layi de Pol nando hôôk Anutu-te dumb bop alo, om laanjiihin hil pin-ambe lalôôh Pol,

²⁸ + o 21:28 Sin 6:13; Esi 44:7*de lateey nambe, “Ham Islel, ham andôôvu hey. Omaahôô-jo ond yi sen nanêêl tanasin lohvu taaku pin-ambe naanggôôl yate tanasin osin yiyy pin having Anutu-te dumb bop-anjo, de hako Glik heey-ambe lahuli-lalaam dumb bop alo ond yik wiing taaku vaambuung-anjo nipaya lak having.”

²⁹ + o 21:29 Sin 20:4; 2Ti 4:20* Lanêêl nambêenju in sil layi Tolopimas vu Epesas nando talind bop Yelusalem having Pol, tombe kand vu nambe mak Pol giiy-ambe huli-la Anutu-te dumb bop alo having.

³⁰ Tombe hil Yelusalem-anju pin ahend kalin lôôt, om sil latup-ambe lasupin lalaam timu be lalôôh Pol, de laandiyy vu dumb alo be lala voon, tonde laayiiy vinavi sen dumb bop-anjuuto pavis.

Hil Lom-ate ngaamong vaha-so lalôôh Pol

³¹ Yoo mondayiis Pol lôôt in nambe jimb, de vakasin valup vu hil Lom ngaamong vaha-sote

yêêv bop nambe hil Yelusalem pin dawiing nindaandun bopaata.

³² Om pavis atombe hako yite hil ngaamong vaha-so heey laving yêêv ngaamong vaha-so heey, tombe latup-ambe lato vu sil. Tombe mondayiis Pol, le sim layi de hil ngaamong vaha-so laving silate yêêv bop-ambe lato, om latôômin-ambe daale.

³³ + o 21:33 Sin 20:23; 21:11*Tonde yêêv bop ngaamong vaha-te la lôôh Pol, be nêêl nambe daanduuuh Pol jak hees aniwêek yuuh, tonde lingin sil nambe, “Latii-jo? Wiing vaati?”

³⁴ Tombe hil vaalu dateey vakasin ango de vaalu dateey vakasin ango, be dawiing nindaandun bopaata, om hil ngaamong vaha-sote yêêv bop-ame nango vakasin danggakook anivasa le, om nêêl-ambe lako Pol la hil ngaamong vaha-so baand.

³⁵ Lala lalup vinavi tombe hil lawiingin nambe lanyiis Pol, om ngaamong vaha-so lalôôh Pol lak baandoni be lala,

³⁶ + o 21:36 Luk 23:18; Sin 22:22*in hil ngeeyaata davu taamuyin sil-ambe dateey lôôt nambe, “Ham anyiis-ambe jimb.”

Pol nêêl yite dangga tatekin vu hil Yuda

³⁷ Tombe hil ngaamong vaha-so lawiingin nambe gako Pol-ambe landukana silate bayêen alo, le Pol nêêl vu yêêv bop ngaamong vaha-te nambe, “Lohvu nambe sa naanêêl vakasin ti vu hong vêêl e?” Tombe yêêv bop-anju lingin nambe, “In onakaas Glik lavand a?

³⁸ + o 21:38 Sin 5:36-37*Sa kangg vu nambe hong Ijip ti sen bôôy gayiis ngaamong having

gaaman-ato, de ohako hil ngeeyaata lohvu 4 taosen-ambe lako

yipak, de ganggiy sil lala taaku lumbalaamb.”

³⁹ Le Pol nêêl nambe, “Sak sa Yuda, de ataa k hako sa neep Taasas Silisia. Sate taakuu-ju taaku bopaata ti om sa kataangg hong naambe ganjiingga-ande sa naanêêl vakasin vu hil.”

⁴⁰ Tombe yêêv bop-anju lienggis, om Pol naale lak vinavi de valaah nama lak, tombe hil pin lavand ma, le mem nêêl vakasin hôôk Yuda lavand Hiblu vu sil.

22

¹ Nêêl nambe, “Halingg-aso aamangg-aso, ham gango sate vakasin sen sa navu naanêêl vu hamato le.”

² Tombe hil pin lango de Pol vakaas hôôk hil Yuda lavand Hiblu vu sil om lavand ma lôôt, tonde Pol nêêl nambe,

³ + o 22:3 Sin 5:34; Lom 10:2*“Sa Yuda, ataa k hako sa neep Taasas vu Silisia-te taakuu-to, lemu sa bop ak vu Yelusalem-anjo. Tombe saaluus Gamaaliel-ate dumb-ambe yoo taahu sa hôôk yate himbop bôôy-ate tanasin pin lôôt, om soo navu sapa Anutu niwêêk lôôt, yik nambe ham pin gêêñ-anja.

⁴ + o 22:4 Sin 8:3; 22:19*De soo monaawiing nindanjeen lôôt vu Kalisi-te hil in nambe lanjimb, moow ayuuh vêêh ond sa talu sil-ambe sa nako la kalaambus.

⁵ Be kul vaha sen datung salivangin-ato silate yêêv bop having kaansol-aso pin lalak ni om sil oo daanêêl gaving, in sil kaavu kaapiya vu halingg-aso vu Damaskas, de lavu be sa hako be sala

Damaskas in nambe sa naanduuuh sil vuu-ju, be sa gako sil lanom Yelusalem in lambu nivaane vu sil.”

*Pol hatulin vakasin lak sen tu Kalisi-te hil ti
(Sinaale 9:1-19; 26:12-18)*

⁶ “Tombe sa monala be sala hato ngaaho vu Damaskas de taaku me laam naale lavuun, tonde pavis atombe kin bopaata ti tum vu baandoni be têêlang ak sa,

⁷ tombe saalupake be sala naahop voon, tonde sa hango lava ti laam vu sa nambe, ‘Saul, nambe vaati sen onawiing nindanjeen vu saa-jo?’

⁸ Tombe saalingin nambe, ‘Omaaho Bop, olati?’ Le nêêl vu sa nambe, ‘Sa Yesu Nasalet sen goo monawiing nindanjeen vu saa-jo.’

⁹ Tombe hil sen laving saa-to layi kin-anju, lemu me-lango omaaho sen vakaas vu saa-to lava nivasa le.

¹⁰ Tombe saalingin nambe, ‘Omaaho Bop, sale aambiing naambe vaati peey?’ Le Omaaho Bop nêêl vu sa nambe, ‘Okandi be gana Damaskas, le mem sale naanêêl kul pin sen lak ganim lung laa-to vu hong.’

¹¹ Tonde sa mekanu hôôk in kin-anju têêlang hôôk sa mengg lôôt, om hil sen laving saa-to laliv namand hôôk sa de sil laandiyy sa la Damaskas.

¹² “Tombe omaaho ti haale nambe Ananaias ond yoo samu tanasin pin, tombe Yuda pin vu Damaskas layi yi nivasa,

¹³ ond hato naale having sa be nêêl nambe, ‘Hali Saul-e, gamem naatum naah.’ Tombe yik sa mengg tum pavis-ambe saahe yi.

¹⁴ Le mem nêêl nambe, ‘Yate himbop-aso bôôy silate Anutu yoo holin hong in nambe ganjak yite lopayo ni, ondeey gahe Omaaho Nivalok osin ohango lava,

¹⁵ de gale naanêêl yite vakasin jak va

sen ohango osin gahêê-to langaah vu hil pin.

¹⁶ + o 22:16 Sin 2:21; Lom 10:13*Om onando in? Okandi be ganjipis bel de okataangg jak haale in kawiyy gate nipaya na.’

¹⁷ “Tombe saalo-valup Yelusalem-ambe sa monaalohak hôôk Anutu-te dumb bop alo, tombe sim sa kanungg yi

¹⁸ + o 22:18 Sin 9:29-30*de Omaaho Bop nêêl vu sa nambe, ‘Opavis. Onggavuuuh Yelusalem-ande gana pavis, in sil-ame le lambiing gaving vakasin sen onavu naanêêl jak saa-to le.’

¹⁹ + o 22:19 Sin 8:3; Sin 26:9-11*Tombe saanêêl vu nambe, ‘Omaaho Bop, sil oo lalak ni nambe bôôy ond sa naalohvu dumb pin-ambe sa naalôôh hil sen lawii-having hong-ato, be sa natung sil hôôk kalaambus osin sa naveek sil.

²⁰ + o 22:20 Sin 7:58; 8:1*De bôôy layiis Stiven sen nanêêl gate vakasin-ato be yimb, ond sa naale having-ambe saahe nivasa, osin soo monanggin hil sen layiis Stiven-ato silate lolop.’

²¹ + o 22:21 Sin 9:15; 13:2*Le Omaaho Bop nêêl vu sa nambe, ‘Gana, sa navu aambiing-ambe gana dinaandiin lôôt vu hil vaalu sen sil-ame Yudaa-to.’ ”

Pol vakaas having hil Lom-ate yêêv bop ti

²² + o 22:22 Sin 21:36*Hil Yuda lango Pol-ate vakasin-anju tombe lateey bopaata nambe, “Ham

anyiis-ambe jimb. Hil nambêenja me-mando metumin e.”

²³ Mondateey nambêenju de daate silate lolop osin daate kambus la baandoni,

²⁴ om yêêv bop ngaamong vaha-te nêêl-ambe lako Pol lukala ngaamong vaha-so baand, tonde nêêl vu ngaamong vaha-so nambe sil gaveek Pol de sil gango vakasin danggakook sen lawiing nindaandun lak yii-to.

²⁵ + o 22:25 Sin 16:37*Om landuuuh Pol lak hees, le Pol nêêl vu hil ngaamong vaha-sote yêêv ti sen naalêê-juuto nambe, “Ham-ame gango Lom ti-te vakasin e, de ham oo gaveek yi, ond mak lohvu*?”

²⁶ Yêêv hango vakasin-anjo tombe sim la nêêl vu ngaamong vaha-sote yêêv bop nambe, “Onavu gambiing vaati? Omaahôô-ju yi Lom.”

²⁷ Tombe yêêv bop laam-ambe lingin nambe, “Onaanêêl vu sa le, hong Lom keen a?” Tombe Pol liinggaan nambe, “Êê-e, keen.”

²⁸ Tombe yêêv bop-anju nêêl vu nambe, “Sa vaanggo haale Lom-anjo lak mone bopaata le mem saatu Lom.” Tonde Pol nêêl vu nambe, “Lemu sak ataak hako sa be sa Lom.”

²⁹ + o 22:29 Sin 16:38*Om hil sen lawiingin nambe gango Pol-ate vakasin-ato ond sil seelin in yi pavis, tombe yêêv bop lak ni nambe Pol Lom le talu yi, om yik yêênin having.

³⁰ Tonde hil ngaamong vaha-sote yêêv bop

* **22:25:** Yêêv Lom ti nambe nôôh omaaho ti in nambe biing vakasin, le me-nêêl yite vakasin danggakook langaah e, ond sil talu be gaveek in nambe naanêêl langaah. Le naambe nôôh hil Lom ti ond lanêêlin nambe me-gaveek e, de gango yite vakasin amu.

wiingin nambe gango nivasa naambe hil Yuda lanêêl nambe Pol wiing vaati paya, om sami-inaanôôn atombe sil kavaayin hees aniwêêk in Pol, tonde wiing vakasin la vu yêêv sen datung salivangin-ato osin kaansol-aso pin, be sil lasupin lalaam, le mem hako Pol la hato naale hôôk sil amend.

23

Pol la naale kaansol-aso mend

¹ + o 23:1 Sin 24:16*Pol nayi kaansol-aso niwêêk lôôt le mem nêêl nambe, “Halingg-aso, sa kangg vu nambe va sen Anutu nayi nambe nivasaa-to, ond soo monaawiing vu bôôy-âmbe tok laam gêen-ânjo.”

² + o 23:2 Jon 18:22-23*Nêêl nambêênu tombe kul vaha sen datung salivangin-ato silate yêêv bop Ananaias nêêl vu hil sen daale ngaaho vu Pol-ato nambe, “Ham patap avi.”

³ + o 23:3 Mat 23:27*Tombe Pol nêêl vu nambe, “Onavu kaasiyy galompayo lak va nivasa malis amu, lemu Anutu le nyiis hong. Onandôô-ja in sahi sate vakasin nohvu tanasin a? Le okalêêh tanasin de ganêêl nambe lanyiis sa.”

⁴ Tombe hil sen daale ngaaho vu Pol-ato lanêêl vu nambe, “Ganêêl vakasin anipaya lak Anutu-te yêêv bop salivangin-ate in?”

⁵ + o 23:5 Eks 22:28*Le Pol nêêl laah nambe, “Halingg-aso, tanasin neep hôôk kaapiya nambe, ‘Game naanêêl vakasin anipaya jak gate yêêv-aso sen ham timuu-to le,’ lemu saambe mak kul vaha salivangin-ate me-te yêêv bop yi le, ondeey saanêêl nambêênu.”

⁶ + o 23:6 Sin 4:2; 24:15,21; 26:5*Pol lak ni nambe kaansol-asôônju sil vaalu Sadusi de vaalu Palisai, om néêl bopaata vu sil nambe, “Halinggaso, sa Palisai de Palisai noondin sa. Saawii-having nambe Anutu le biing-ambe hil yimbin e kandi jak naah, yik danggakook-anja sen sil lawiing vakasin vu saa-jo.”

⁷ Néêl vakasin-anjo tombe Palisai yuuh Sadusi lanêêl sil vaha-vahaan,

⁸ + o 23:8 Mat 22:23*in hil Sadusi danêêl nambe hil yimbin-ame le kandi jak e, de angela osin mamu me-nando le, lemu Palisai lawii-having va yaal-anjo.

⁹ + o 23:9 Sin 25:25*Tombe lawiing nindaandun bopaata, om hil Palisai-te tanasin danggaso vaalu lateey niwêek lôôt nambe, “Hey-ame aatovu va nipaya ti vu omaahôô-ja le, mak mamu ti me angela ti néêl vakasin vu yili-ja.”

¹⁰ Tombe sil lanêêl sil bopaata lôôt, om yêêv bop ngaamong vaha-te yêênin nambe hil-anju le daandiiy Pol naah-ande nom atombe ninaavi bapuuh, om néêl-âmbe hil ngaamong vaha-so lala lavu vêêl Pol in hil-anju, de lako lukala silate bayêen alo.

¹¹ + o 23:11 Sin 18:9; 19:21; 27:24; 28:16,23*Tonde hôôk busin atombe Omaaho Bop naale having Pol be néêl nambe, “Galompayo niwêek in ganêêl sate vakasin langaah vu Yelusalem-anjo, tonde gale gana naanêêl langaah vu Lom gaving.”

*Yuda landuuh vakasin nambe lanyiis Pol-ambe
jimb*

¹² Samiinaanôôn atombe Yuda lasupin-ambe landuuuh vakasin nambe sil-ame lanja vanôôn osin daanum e, de lanyiis Pol-ambe jimb e mem. De sil lanjôôy vakasin nambe sil tatuhiin ond Anutu le nyiis sil-ambe lanjimb.

¹³ Tombe hil sen lanjôôy vakasin lak Pol-anjôôto sil ngeeyaata savok doo-yuuuh la,

¹⁴ ond sil lala vu kul vaha sen datung salivangin-ato silate yêêv-aso osin himbop-aso be lanêêl vu sil nambe, “Hey aanduuuh vakasin lung la nambe hey-ame angga vanôôn daka le, hey oo mando be hey aanyiis Pol jimb e mem, de hey aanjôôy vakasin nambe hey tatuhiin ond Anutu le nyiis hey-ambe hey aanggimb.

¹⁵ + o 23:15 Sin 25:3*Om ham o kaansol-aso ambiing vakasin na vu yêêv bop ngaamong vahate naambe ham awiingin nambe ham gango Pol-ate vakasin dangakook anivasa jesin naah e, om sil gako Pol naam vu ham. De hey samu hey lung la in nambe gato mop lavuun ond hey aanyiis-ambe jimb.”

¹⁶ Lung laa tonde Pol maha hango nambe hil latung dum in nambe lanyiis Pol-ambe jimb, om la valup hil ngaamong vaha-so baand-ambe lukala be nêêl vu Pol,

¹⁷ tombe Pol teey yêêv ngaamong vaha ti laam-ambe nêêl vu nambe, “Onaanggiyy maanggêêm-anjo na vu hamate yêêv bop in wiingin nambe naanêêl vakasin ti vu yi.”

¹⁸ Om yêêv hako be yuuuh lala vu yêêv bop tombe nêêl nambe, “Pol sen kalaambus-ato teey sa be

kataangg nambe sa gako maanggêêm-anjo

naam vu hong in wiingin nambe naanêél vakasin ti vu hong.”

¹⁹ Tombe yêêv bop ngaamong vaha-têênju lôôh hôök maanggêêm nama, de laandiiy-ambe yuuh lala daale lundoos e mem lingin nambe, “Gawi-ingin naanêél vaati vu sa?”

²⁰ Tombe mem nêél vu nambe, “Hil Yuda landuuh vakasin lung la nambe sil kataangg hong naambe onggako Pol na gato vu kaansol-aso jeey, ond sil davu tatuhin in nambe sil gango Pol-ate vakasin danggakook nivasa jesin naah,

²¹ om gêen mondanggin hong in nambe ganjinggaan in sil lavand. Lemu game gango sil lavand e, in silate hil vaalu ngeeyaaata lôôt savok dooyuuh la datung dum in nambe lanyiis Pol, de sil lanjôôy vakasin nambe me-lanja osin daanum e, de lanyiis Pol-ambe jimb e mem, de sil lanjôôy vakasin having nambe sil tatuhin ond Anutu le nyiis sil-ambe lanjimb.”

²² Tombe yêêv bop vu kôôvu nambe, “Game naanêél vu omaaho ti naambe galaam-ambe ganêél vakasin-anjo langaah vu sa le.” Tonde nêél-ambe la.

Lako Pol la vu yêêv bop Piliks

²³ Tombe hil ngaamong vaha-sote yêêv bop teey yite yêêv yuuhapim lalaam-ambe nêél vu yuuh nambe, “Manggolin hil ngaamong vaha nohvu 200, de manggolin hil 70 gaving in lanjamando hôôs, de hil 200 in sil lanôôh yiij lungg, tombe ham ana Sisalia peey busin dôôk taaku me na-maavaalu be vindak yumbeyuuh.

²⁴ De ham samu hôôs heey vu Pol gaving in jamando be na, tombe ham oo gako yi nivasa be ham ambu dukana yêêv bop Piliks nama.”

²⁵ De yêêv bop-anju kaavu kaapiya having nambe,

²⁶ “Sa Klodias Lisiás kaavu kaapiyaa-jo laas vu hong omaaho osin haalem bop yêêv bop Piliks.

²⁷ + o 23:27 Sin 21:30-33; 22:25-27*Sa naanêêl vu hong naambe Yuda lalôôh omaahôô-ja be lawi-ningin nambe lanyiis-ambe jimb, lemu sa hango nambe yi Lom om sa having hil ngaamong vaha-so be hey ala aavu vêêl yi hôôk sil namand.

²⁸ + o 23:28 Sin 22:30*Tombe saawiingin nambe gango yite vakasin danggakook sen sil lanêêl lak yii-to, om sa hako la hato vu silate kaansol-aso.

²⁹ + o 23:29 Sin 18:14-15*Tombe saahe le sil akand vu vakasin lak sil oote tanasin vaalu, om sil lanêêl vakasin lak yi, de same aatokak vakasin ti neep in nambe yaanyiis-ambe jimb e, me yiyy gatung hôôk kalaambus e.

³⁰ + o 23:30 Sin 24:5-8*Tonde sim vakasin ti valu-vu sa nambe landuuuh vakasin kaatokin nambe lanyiis omaahôô-ja be jimb, om saawiing laas vu hong pavis, de saanêêl vu hil sen sil lanêêl vakasin ak yii-to nambe sil oo lanaas daanêêl vakasin sen lanêêl lak yii-to vu hong. Yik vakasin lung laa-ja.”

³¹ Tombe hil ngaamong vaha-so lango vakasin om lako Pol-ambe lala hôôk busin, tombe latok lala Antipatlis.

³² Tonde samiinaanôôn atombe hil ngaamong vaha-so lalaah sil ambaand, de hil sen dando lak hôôs-ato ond yoo lako Pol-ambe lala.

³³ Tombe latok lala Sisalia be lavu kaapiya vu yêêv bop tonde lako Pol la vu.

³⁴ Tombe yêêv bop sevin kaapiya le mem lingin Pol nambe, “Hong vu tana?” Le Pol nêêl nambe, “Sa vu Silisia.”

³⁵ Tombe yêêv bop nêêl nambe, “Hil sen danêêl vakasin ak hong-ato balup e mem sa gango gate vakasin.” Tonde nêêl-ambe sil oo mondanggin Pol nando hôôk Helot-ate bayêen.

24

Yêêv bop Piliks nangoyin Pol-ate vakasin

¹ Busin namaavaalu lung la vêêl e mem kul vaha sen datung salivangin-ato silate yêêv bop Ananaias having himbop-aso be lato, de sil ti haale nambe Tetaalas ond yoo yite kul nambe naanêêl hil-ate vakasin vu yêêv gaaman-aso, ond lala lato tombe latulin vakasin sen lawiingin nambe daanêêl lak Pol-ato vu yêêv bop.

² Yêêv bop teey Pol-ambe laam e mem Tetaalas nêêl vakasin lak Pol nambe, “O himbop Piliks, goo nahôôvu hey om hey nando nivasa lôôt de ngaamong ayuuh ame ma, de hong omaaho galumkook bop om ohatongin va pin sen bôôy wiing paya lohvu taaku pin-ato.

³ Om hey aahe va sen gawiing-anja be hey alonggpayo nivasa lôôt lak busin pin.

⁴ Le same aanggilin hong lôôt e, yik sa kataangg hong naambe hong omaaho nivasa om onggango heyanêêngg vakasin boow dakaa-jo.

⁵ + o 24:5 Sin 17:6*In hey aahe de omaahôô-ja
nipaya de naanjiihin hil Yuda lohvu taaku pin-
ambe me-dando nivasa le, de tu tanasin vaha
ti sen danêêl sil nambe Nasalet-ato ond silate
lukook bop ti.

⁶ + o 24:6 Sin 21:28-30*Tombe wiingin nambe
biing-ambe Anutu-te dumb bop anipaya jak om
hey aalôôh yi, [de hey aawiingin sahi yite vakasin
jak heyate tanasin,

⁷ lemu yêêv bop ngaamong vaha-te Lisias valu-
handu hey-ande vu vêêl omaahôô-ju pavis in hey,
de hako be la,

⁸ de nêêl nambe hil sen lawiing vakasin ak
yii-to ond lanaam vu hong.] Om goo ganjingin
omaahôô-ja lôôt, le mem yoo le naanêêl va pin
sen hey aawiing vakasin vu yii-jôôto vu hong.”

⁹ Tombe yik hil Yuda lahôôvu Tetaalas om
lanêêl vakasin lak Pol having nambe, “Vakasin
pin-anja keen lôôt.”

Pol hatulin yite vakasin vu Piliks

¹⁰ Om yêêv bop vêêl ka lak vu Pol, tombe Pol
nêêl nambe, “Sa lak ni nambe goo monangoyin
hil-anjote vakasin vu bôôy-ambe tok laam gêen-
anjo, om sa longgpayo nivasa be sa naanêêl sate
vakasin vu hong.

¹¹ + o 24:11 Sin 21:17*De naambe ganjingin
hil ond le daanêêl naambe sa valup Yelusalem
in nambe saanohak ond gêen lohvu busin
nomaayuuuh-ambe laam yuuh lung laa-jo,

¹² de same naanêêl omaaho ti hôôk Anutu-te
dumb bop alo be hil Yuda latokak sa le, de same

naanjiihin hil vu dumb vaalu lopayo me vu talind
in nambe sil ahend kalin e,

¹³ de vakasin sen lawing vu sa gêen-anjo ond
sil-ame lalohvu nambe daanêêl vakasin nôôn
keen ti vu hong e, nôôn ma.

¹⁴ + o 24:14 Sin 24:5* Lemu sa naanêêl vakasin-
anjo danggakook ti langaah vu hong naambe, sa
naalohak vu hey o himbop bôôy-asote Anutu lak
tanasin sen hil-anja lanêêl

nambe tanasin vaha ti yoow-ato, de saawii-
having Mose-te tanasin pin osin Anutu-te vakasin
sen yite hil vaalu kaavu langaah-ambe neep hôôk
kaapiyaa-to having.

¹⁵ + o 24:15 Jon 5:28-29* De saawii-having, yik
nambe sen hil-anja, nambe Anutu le biing-ambe
hil yimbin kandi jak, hil anivalok osin hil anipaya
pin le kandi jak,

¹⁶ + o 24:16 Sin 23:1* ondeey soo monaawiing
niwêêk in nambe sa longgpayo yoo nanjip nivasa
dôôk Anutu osin omaahonôôn amend jak busin
pin.

¹⁷ + o 24:17 Lom 15:25-26; Gal 2:10* Tonde sala
nando ta heey vu bayêen vaalu, de saalo-valup
Yelusalem ond sa hako mone yuu ame having in
dôôvu hil Yuda sen dativak in va yuu amêê-to,
osin sala hatung salivangin vu Anutu.

¹⁸ + o 24:18 Sin 21:26-27* De sa samu sa be sa
nando hôôk Anutu-te dumb bop alo tombe sil
latovu sa, de vaheey-ame dando having sa le, de
vaheey-ame dawiing nindaandun e.

¹⁹ Lemu hil Yuda heey oo vu Esia be lalup
atombe lalôôh sa, om naambe hil-anju silate
vakasin ti neep vu sa ond sil oo lanaam baale

hôôk gamem-ambe daanêêl vu sa ond mem ni-vasa.

²⁰ Le naambe malis ond hil sen daalêê-jo latokak nambe sanêêngg vakasin ti neep sen sa naale hôôk kaansol-aso mend-ato nambe saawing vati paya, ond yoo daanêêl vu hong.

²¹ + o 24:21 Sin 23:6*Mak vakasin timu sen sa naale hôôk sil amend-ambe saateey vu sil bôôyanjuuto, nambe saawii-having nambe Anutu le biing-ambe hil yimbin e kandi jak naah, yik danggakook-anja sen gêen lawiing vakasin vu saa-jo.”

²² + o 24:22 Sin 23:26*Tombe yêêv bop Piliks lak vakasin sen Omaaho Bop-ate hil lawii-having-anju danggakook ani om nêêl vu hil Yuda nambe, “Ham ganggin-ande yêêv bop ngaamong vaha-te Lisisas gato le mem sale gango hamate vakasin-anja be sa naanêêl.”

²³ + o 24:23 Sin 27:3; 28:16,30*Tonde nêêl vu hil ngaamong vaha-sote yêêv nambe, “Ongganggin Pol, lemu game gambu teenin yi lôôt e, de yite hil lawiingin nambe landôôvu yi in va yuu ame, ond game naanêêlin e.”

Piliks vu teenin Pol lohv u ta yuuuh

²⁴ Busin heey lung la vêêl e mem Piliks ayuuuh vane Dalusila lato, vêêh-anju yi Yuda. Tombe Piliks teey Pol laam-ambe hango de Pol tatekin Yesu Kalisi-te danggakook sen lawii-having yii-to vu yi,

²⁵ + o 24:25 Jon 16:8*tonde nêêl vakasin nambe yaambiing va na nivalok, de yiiy ganggin yiiy vu va nipaya, tonde Anutu le gangoyin yate vakasin vu taamusin. Pol nêêl nambêêñjo tombe Piliks

yêénin lôôt, om nêîl nambe, “Gana le, de sa naatovu busin ti le mem sa naateey hong jesin naah.”

²⁶ Tonde Piliks yoo ka monavu nambe Pol e bu mone heey vu in nyiis yite vakasin jimb, om nanêîl-ambe Pol la nakaas having yi.

²⁷ + o 24:27 Sin 25:9*Tonde ta yuuuh la lung la tombe Posias Pestas hako kul lak lukalaah Piliks ahembaan, de Piliks wiingin nambe hil Yuda lanji yi nivasa, om me-teey Pol-ambe hato la le, yoo vu teenin Pol-ambe nando de la.

25

Pol nêîl nambe Sisa gango yite vakasin

¹ Pestas hako yite kul yêîv ak-ambe nando lohvu busin yaal vêîl e mem vu Sisalia be la valup Yelusalem.

² + o 25:2 Sin 24:1; 25:15*Tombe kul vaha sen datung salivangin-ato silate yêîv-aso osin hil Yuda-te himbop-aso lala vu yi,

be sil latulin vakasin sen sil layi Pol payaa-to, de sil kataangg niwêîk lôôt nambe,

³ + o 25:3 Sin 23:15*“Gandôôvu hey-ambe gambiing omaahôô-ju naam Yelusalem vu hey.” Lanêîl nambêénju in kand vu nambe Pol naam atonde langgôôpis-ambe lanyiis vu mop lavuun-ambe jimb.

⁴ Tombe Pestas nêîl laah vu sil nambe, “Sil mondanggin Pol nando Sisalia, de sa mando daka vêîl e mem sa naah-anju,

⁵ om hamate yêîv-aso gaving sa be hey aanduus-ambe hey ana, le mem naambe yinêîn nipaya ti neep ond lambiing vakasin vu yi.”

⁶ Pestas nando busin namaavaalu be vindak yaal me mak busin nomaayuuuh lung la le mem laah hato Sisalia, de samiinaanôôn atombe lakala nando bayêen sen dawiing vakasin hôök-ato, de nêël-ambe lako Pol laam.

⁷ + o 25:7 Sin 24:5-6,13*Tombe Pol la hato le mem hil Yuda sen sil vu Yelusalem-ambe lala latôô-juuto, ond sil lambuuh Pol tatup-ambe lawiing vakasin animeen ngeeyaata lak Pol, lemu me-latokak vakasin danggakook keen ti le,

⁸ om Pol nêël nambe, “Same naanêël vakasin ti paya lak hil Yuda-te tanasin, me lak Anutu-te dumb bop, me lak Lom-ate yêêv bop Sisa having e, malis.”

⁹ + o 25:9 Sin 24:27*Tombe Pestas wiingin nambe hil Yuda lanji yi nivasa om lingin Pol nambe, “De gawiingin nambe gana balup Yelusalem in sa gango gate vakasin vuu-ju?”

¹⁰ Le Pol nêël nambe, “Sa naale hôök Sisa-te yêêv bop hong gamem-anjo, om saambiing vakasin mandôô-jo ond mem lohvu, de goo galak ni lung la nambe same aawiing va nipaya ti vu hil Yuda le.

¹¹ Om naambe sanêêngg nipaya ti neep de saawiing va nipaya ti lohvu lanyiis sa be saang-gimb, ond same aawiingin nambe napak e. Le naambe vakasin sen lawiing vu saa-jo me-nôôn keen e, ond omaaho ti me-lohvu nambe bu sa dukana sil namand e, om saawiingin Sisa gango sate vakasin.”

¹² Tombe Pestas vakaas having yite yêêv-aso vêël e mem nêël vu Pol nambe, “Ganêël nambe Sisa gango gate vakasin, om lung-ande gale gana vu Sisa.”

Pestas nêêl Pol-ate vakasin vu Aglipa

¹³ Busin heey la vêêl e mem Yuda-te omaaho lulemak Aglipa yuuu vanga Benaisi lato Sisalia in nambe lanji Pestas,

¹⁴ + o 25:14 Sin 24:27*tombe yuuu dandôô-ju busin ngeeyaata,

om Pestas nêêl Pol-ate vakasin vu omaaho lulemak Aglipa nambe, “Piliks vu teenin omaaho ti be yoo nando bôôy-ande la,

¹⁵ + o 25:15 Sin 25:1-2*de sala nando Yelusalem bôôy-ato ond kul vaha sen datung salivangin-ato silate yêêv-aso osin hil Yuda-te himbop-aso lawiing vakasin lak yi, de lanêêl vu sa nambe sa naanêêl-ande hil lanyiis-ambe jimb,

¹⁶ lemu saanêêl laah vu sil nambe, ‘Hey Lom-ate gamburg nambe hey-ame aambu omaaho ti dukana hil namand malis e. Omaaho ti sen hil lanêêl nambe wiing vati payaa-to, ond yoo baale hil sen lawiing vakasin vu yii-to mend, le

mem yoo naanêêl yite vakasin gaving.’

¹⁷ Tombe hil-anja laving sa be lalaam, le same hanggin e, yik samiinaanôôn atombe sa lakala nando lak bayêen sen dawiing vakasin hôôk-ato, tonde saanêêl-ambe lako Pol laam.

¹⁸ + o 25:18-19 Sin 18:15*Tombe hil-anja daale be lawiing vakasin vu yi, tombe sa kangg vu nambe davu daanêêl naambe wiing va nipaya heey,

¹⁹ le ma de sil oo lanêêl vakasin lak sil oote tanasin sen davu sapa Anutuu-to, tonde vakasin ango lak omaaho ti yimb, haale nambe Yesu, ond Pol nanêêl nambe omaahôô-ju nando metumin gêen.

²⁰ + o 25:20-21 Sin 25:9-12*Tombe sa hangoyin Pol-ate vakasin, le sa doosin danggakook lôôt om saalingin yi nambe, ‘De gawiingin nambe gana balup Yelusalem e mem sa gango gate vakasin-anjo vuu-ju?’

²¹ Lemu Pol nêêl nambe ahevaavu-so yoo mongganggin yi mandôô-jo in wiingin nambe Sisa gango yite vakasin, om saanêêl nambe sil ganggin yi vêêl e mem sale aambiing na vu Sisa.”

²² Tombe Aglipa nêêl vu Pestas nambe, “Soo aawiingin nambe gango omaahôô-ju naanêêl yite vakasin.” Tombe Pestas nêêl nambe, “Jeey e mem onggango.”

²³ + o 25:23 Mat 10:18; Mak 13:9*Om saminaanôôn atombe Aglipa yuu Benaisi lalaam osin vunakin amengali ngeeyaata lôôt, be yuu lahuli-lala bayêen sen dawiing vakasin hôôk-ato lopayo having yêêv bop ngaamong vaha-so heey, tonde himbop bayêen dangga-so heey laving, le mem Pestas nêêl-ambe lako Pol laam,

²⁴ + o 25:24 Sin 22:22; 25:2,7*tombe Pestas nêêl nambe, “O omaaho lulemak Aglipa, de ham pin sen ham nando having hey-anjo, ham angge omaahôô-ja, ond hil Yuda pin vu Yelusalem, de vuu-jo having, ond lalaam vu sa be lateey niwêek lôôt nambe me-mando metumin e,

²⁵ lemu saahe de me-wiing vati paya lohvu nambe jimb e. Nganjo yoo nêêl nambe Sisa gango yite vakasin ondeey saanêêl lung la nambe saambiing-ambe na vu Sisa,

²⁶ lemu same aatokak yite vakasin ti neep langaah in nambe sa kaavu kaapiya na vu yate himbop Sisa le. Om omaaho lulemak Aglipa,

saanggiiy omaahôô-jo laam vu hong, de ham pin sen-anjo having, in nambe yiyy gango yite vakasin nivasa be yiyy naatokak yite vakasin heey, le mem sa kaavu hôôk kaapiya.

²⁷ In nambe saambiing kalaambus ti na vu Sisa, le same aambiing vakasin sen lawiing ak yii-to na gaving e, ond manyinjo sa sahi le me-lohvu le.”

26

Pol tatekin yite vakasin vu Aglipa

¹ Tombe Aglipa nêêl vu Pol nambe, “Om hong-o, onaanêêl gate vakasin.” Tombe Pol nama lakannde nêêl nambe,

² “O omaaho lulemak Aglipa, sa longgpayo nivasa lôôt in sa navu tatekin sate vakasin vu hong peey jak va pin sen hil Yuda lawiing vakasin lak saa-to,

³ in goo galak Yuda-te gambum ani lung la, osin vakasin pin sen hey naanêêl hey in-ato, om sa kataangg hong naambe onggango sate vakasin lôôt de game ganimtambo jak pavis e.

⁴ “De sa naanêêl vu hong naambe, hil Yuda pin lalak ni nambe vu bôôy sen sa unoopasiv-ato be tok laam gêêñ-anjo, ond sa nando having sate hil osin sa nando Yelusalem,

⁵ + o 26:5 Pil 3:5-6*om naambe hil Yuda lanji nivasa ond sil oo kaandu sate vakasin gaving, in lalak ni nambe soo navu sapa hey Palisai-te gambum aniwêek lôôt savok Yuda-te gambum vaalu la.

⁶ + o 26:6 Sin 23:6; 28:20*De gêêñ lawiing vakasin vu sa be sa laam naalêê-jo, ond dang-gakook nambe saawii-having-ambe sa nanggin

vakasin anivasa sen Anutu jôôy lung la vu yate himbop-aso bôôy-ato nambe nôôn jak.

⁷ De yate himbop-aso bôôy dangga nomaayuuhambe laam yuuuh oo mondalohak vu Anutu niwêêk lôôt hôôk busin-ande langaah, de lawii-having-ambe danggin vakasin timuu-ju in nambe daatovu nôôn, tombe yik sa having. O omaaho lulemak, saawii-having-ambe sa nanggin vakasin-anju, ond danggakook-anju sen hil Yuda lawiing vakasin lak saa-jo.

⁸ Le nambe vaati sen ham vaalu kam vu nambe yame aambiing gaving naambe Anutu me-le biing-ambe hil yimbin kandi jak e?

⁹ + o 26:9 Sin 8:3*“Tonde bôôy sa kangg oo vu nambe sa daanggôôl Yesu Nasaalet haale ond mem nivasa,

¹⁰ om sa laanggôôl haale vu Yelusalem, de kul vaha sen datung salivangin-ato silate yêêv-aso lanêêl nambe saambiing vaa-jo jak sil haalend, om saanduuuh Anutu-te hil ngeeyaata lôôt-ambe sa hatung sil hôôk kalaambus, de lanjôôy silate vakasin in nambe lanyiis Anutu-te hil-anju be lanjimb, ond yik sa having.

¹¹ De lak busin pin saavu nimeen vu sil hôôk dumb pin, tonde sa haanjiihin sil in nambe daanêêl Omaaho Bop pale, de sahengg kalin bopaata lôôt vu sil om sala aawiing nindanjeen vu sil vu taaku vaalu sen neep diin-ato having.”

*Pol hatulin vakasin lak sen tu Kalisi-te hil ti
(Sinaale 9:3-19; 22:6-16)*

¹² “Om sa hako kaapiya be sala Damaskas lak yêêv-aso salivangin-ate haalend.

¹³ O omaaho lulemak, sa monala mopaatôôv tonde taaku me laam naale lavuun, tombe saahe kin ti vu baandoni be laam têêlang lôôt kaluuh taaku me, ond têêlang ak sa osin hil sen laving saa-to,

¹⁴ tombe hey pin aalupake be ala naahop voon. Tonde sa hango vakasin ti hôôk hey Yuda lavangg Hiblu laam vu sa nambe, ‘Saul, nambe vaati sen goo monawiing nindanjeen vu saa-jo? Onawiing nambêênjä lemu me-nahôôvu hong e.’

¹⁵ Tombe saalingin nambe, ‘Omaaho Bop, olati?’ Le Omaaho Bop nêêl nambe, ‘Sa Yesu sen goo monawiing nindanjeen vu saa-jo.

¹⁶ Om okandi baale kasiiy, in sa taato sa vu hong in dangga nambe saaholin hong in nambe onaatu sate kul vaha, be onaanêêl va sen gahe sa lung laa-jo, osin va sen soo le taato sa vu hong vu taamusin-ato.

¹⁷ Om sa navu aambiing-ambe gana vu hil vaalu sen sil-ame Yudaa-to, de sale aanôôh hong vêêl in hil Yuda osin hil vaalu namand in nambe me-lanyiis hong-ambe ganggimb e.

¹⁸ + o 26:18 Ais 35:5; 42:7,16; Ep 2:2; Kol 1:13; Sin 20:32*Om gana gambiing-ambe sil amend naatum in nambe sil galuuh damind vu taaku mekanu, de langgilin sil lanom melangaah, osin sil gavuuh Saalang-ate niwêêk na de lanom vu Anutu, be mem lambiing gaving sa, ond mem sale kawiyy silate nipaya na, de sil mando gaving hil pin sen Anutu yoo holin sil lung laa-to.’

¹⁹ “O omaaho lulemak Aglipa, saahe va baandonii-ju om same kalêêh lava le, malis.

²⁰ + o 26:20 Mat 3:8*Saanêêl tanasin vu hil

Damaskas munggin, tonde mem saanêêl vu hil Yelusalem, de saanêêl lohvu taaku Yudia pin osin vu hil vaalu sen sil-ame Yudaa-to having. Saanêêl vu sil nambe, ‘Ham galuuuh damim vu hamate nipaya, de ham anggilin ham alompayo na vu Anutu, de ham ambiing va nivasa in yanjak ni naambe ham ahilin ham vasa.’

²¹ + o 26:21 Sin 21:30-31*Yik saawiing kul nambêenjo ondeey hil Yuda lalôôh sa hôôk Anutute dumb bop, be lawiingin nambe lanyiis sa be saanggimb,

²² + o 26:22 Luk 24:44-47*le ma de Anutu hôôvu sa be tok laam gêen-anjo, om sen sa naalêê-jo de sa naanêêl vakasin vu hil mali-malis pin osin vu himbop-aso having. De vakasin sen sa naanêêl-ato ond yik vakasin timu sen bôoy Anutu-te hil vaalu laving Mose be lanêêl nambe le nôôn jakato,

²³ + o 26:23 1Ko 15:20*nambe, ‘Omaaho sen Anutu yoo holin yi vulôôt in nambe dôôvu yiyyato, ond le gako nivaane be kandi jak naah vu hil yimbin-ate naamunggin vu hil pin, in naanêêl vakasin melangaah-ate vu hil Yuda osin hil vaalu sen sil-ame Yudaa-to gaving.’ ”

Pol navêêl Aglipa ka lak in nambe biing gaving

²⁴ Pol monanêêl nambêenju tombe Pestas nêêl bopaata lôôt nambe, “Pol-e, vati wiing hong a? Galuuus dumb lôôt om wiing-ambe galumkook nawiing paya.”

²⁵ Le Pol nêêl nambe, “Himbop Pestas, vati me-wiing sa le, malis. Sa lukook neep om sa naanêêl keen,

²⁶ + o 26:26 Jon 18:20*de omaaho lulemak Aglipa lak va pin-anju ni ondeey saanêél langaah vu yi de same aayéénin e, in sa lak ni nambe va pin-anju ond ti me-hôôpis in yi le, malis, in vaa-ju me-hôôk taaku vunin e.

²⁷ De omaaho lulemak Aglipa, gawii-having Anutu-te vakasin sen hil lanêél langaah bôôy-ato? Sa lak ni lung la nambe gawii-having-ato.”

²⁸ Tombe sim Aglipa nêél vu Pol nambe, “On-aanêél daka gaving ond sa navu aanggilin sa longgpayo be sa naatu Kalisi-te omaaho ti.”

²⁹ Tombe Pol nêél nambe, “Daka gaving me taamusin ond yik nivasa having, de sa naalohak vu Anutu in hong having hil pin sen ham nango sate vakasin gêén-anjo nambe ham naambe sa, lemu hees aniwêék sen landuuuh sa lak-anjo me-naanduuuh ham e.”

³⁰ Pol nêél nambêénju tombe omaaho lulemak Aglipa having yêév bop-ambe Benaisi, osin hil pin sen

dando having-ato, ond sil pin kandi daale,

³¹ + o 26:31 Sin 23:29; 25:25*tombe sil lato lala voon le mem yoo lanêél vu sil nambe, “Omaahôôju me-wiing nipaya in nambe jimb me duus kalaambus e.”

³² + o 26:32 Sin 25:11*Tonde Aglipa nêél vu Pestas nambe, “Mu nêél nambe Sisa gango yite vakasin ondeey, nganjo nama ond lohvü nambe yaambiing-ambe gato na.”

27

Pol lak sip-ambe la in na Lom

¹ + o 27:1 Sin 25:12*Lanêél lung la nambe hey o Pol-aso be hey anjak sip-ambe hey ana Itaali sen Lom neep-ato, om lavu Pol having kalaambus vaalu lalukala yêêv ti haale nambe Julias nama in nambe ganggin sil, yêêv-anju nanggin Sisa-te ngaamong vaha-so doo-namaavaalu.

² + o 27:2 Sin 19:29*Tombe hey alak hil Adlamitiam-ate sip ti, in sip-anju navu na hil Esia-te taaku nalu ti ti, om hey ala, tombe hil Makedonia ti Alistakas vu taaku Tesalonika la having hey.

³ + o 27:3 Sin 24:23*De samiinaanôôn atombe hey aatok ala Saidon, de Julias wiing nivasa vu Pol om lienggis-ambe Pol la yi yite hil-ambe ya vanôôn ayuuh ame vu sil.

⁴ Tonde hey kandi vu Saidon-ambe hey ala, le vavi luus hey om sip loh neep Saiplas vaalu in nambe nalu lavuun-anju gilin vavi,

⁵ tombe hey valu-aaloh ngaaho vu Silisia yuuuh Pampilia, be hey aatok ala Maila sen neep Lisia-te taakuu-to.

⁶ Tombe vu taakuu-ju hil ngaamong vaha-sote yêêv-anjôoto yi de hil Aleksandlia-te sip ti navu na Itaali, om nêêl-ambe hey alakala sip-anju.

⁷ Tombe hey ala lemu sip oo monala melaas lo-hvu busin ngeeyaata, tombe lawiing kul bopaata lôôt, le mem hey ala ngaaho vu taaku Naidas, le vavi bopaata lôôt om hey-ame aalohvu in nambe ana nivalok e, om hey valu-aaloh Klit vaalu ngaaho vu taaku Salmoni neep-ato in nambe nalu lavuun-anju gilin vavi.

⁸ Tombe lawiing kul bopaata lôôt in vavi luus hey-ambe hey ala monaahulis taaku Klit

nanyendangga, be hey aatok ala taaku ti danêêl haale nambe Nanyelasu Nivasa. Taakuu-ju neep ngaaho vu bayêen bop Lasia.

⁹ Busin ngeeyaata lung la, de busin bop sen Yuda dalakin sil in vanôôn-ande me-dayaa-to ond lung la, tonde vavi bopaata wiing-ambe lôôy anipaya lak om me-lohvü nambe hey ana nivasa le, om Pol néêl vakasin vu

sil nambe,

¹⁰ + o 27:10 Sin 27:22*“Ham hil-e, sa lak ni nambe nimeen bopaata le naatovu yiyy, de va ngeeyaata le na menama gaving. Me-kupak osin sip amu na menama le, malis, yiyy omaahonôôn having, om yame ana le, yiyy mando.”

¹¹ Lemu hil ngaamong vaha-sote yêêv wii-having omaaho sen nako sip-ato osin sip mang-ganaan lavand, de me-wii-having Pol lava le,

¹² de lôôy nanyendangga nanyelasuu-ju me-nivasa in nambe sip mando kwaav yumbeyuu hôôk sen vavi bopaata-te busin-anjuuto le, om hil ngeeyaata lanêêl nambe hey gavuuh taakuu-ju de hey ana, in kand vu nambe mak hey e naatok ana hil Klit-ate taaku

ango vu Piniks in nanyelasu nivasa, om hey aandôôpis-ambe mem hey mando nivasa in vavi jamba.

Vavi wiing-ambe lôôy anipaya lak lôôt

¹³ Vavi noow valup atombe kand vu nambe hey e aanggulis lôôy nanyendangga be hey ana nivasa nohvü sen lanêêl-ato, om sil laandiiy angka lak-ande hey oo monaahulis hil Klit-ate lôôy nanyendangga.

¹⁴ Yik hey ala daka tonde sim vavi jamba ti laam vu lonak,

¹⁵ tombe vavi luus sip lôôt, om sil-ame lalohvu nambe langgilin sip na nivalok vu vavi le, tombe sil lawiing e ma, om lôôy oo monako hey amu.

¹⁶ Tombe hey valu-aaloh ngaaho vu nalu lavuun daka sen hilin vavii-to danêêl nambe Koda, om hey aawiing kul bopaata lôôt, be hey laandiyy dinggi laam ngaaho,

¹⁷ le mem sil laandiyy lakalaam sip baandoni, tonde sil laanggin sip lak hees aniwêêk tatin in nambe

sip-ame gapok e. De sil layêênin nambe vavi le juus hey-ambe hey ana andahôôk laahel anipaya ti ngaaho vu Aplika, om sil lalôôh sel vêêl-ande lôôy oo monako hey amu.

¹⁸ Vavi osin lôôy oo mopakepin hey lôôt, om samiinaanôôn atombe sil laate kupak heey lukala lôôy,

¹⁹ de heendiiy atombe sil oo laate va yuuuh ame sen nando lak sip anivalok-ato lukala lôôy having.

²⁰ Tonde busin ngeeyaata ond hey-ame aahe taaku mekaalus osin matam daka le, yik vavi nipaya yoo mopakepin hey lôôt, tombe mem hey akangg vu nambe hey navu ana mengg nama, de hey-ame le mando nivasa le.

²¹ De busin ngeeyaata me-laya vanôôn e, tombe Pol la naale hôôk sil lavuun-ambe néêl vu sil nambe, “Ham hil-e, nambe böôy-ato ham gango sa lavangg-ambe yiiy mando Klit, ond yame le naatovu nimeen bopaata naambêêndo le, de va yuuuh ame me-na menama le.

²² + o 27:22 Sin 27:10,31*Om gêen sa naanêél vu ham naambe ham alompayo niwêék jak in ham ti me-le na menama le, yik sip timu yoo le na menama.

²³ In Anutu sen yite omaaho ti saa-jo, de sa naalohak vu yii-to, ond yite angela ti hato vu sa gêen busin-ambe nêél nambe,

²⁴ + o 27:24 Sin 23:11*‘Pol, game ganjêénin e, gale gana baale dôök Sisa me. De gangge hil sen ham nando lak sip-anjo, ond Anutu ka pasiv om le biing-ambe ham pin e mando metumin.’

²⁵ Om ham hil-e, ham alompayo niwêék jak in saawii-having Anutu nambe vaa-ju le nôôn jak nohvu sen nêél vu saa-jo,

²⁶ + o 27:26 Sin 28:1*om yale ana andahôök nalu lavuun ti le.”

²⁷ Hey oo monaayêês lôôy Edlia be la busin nomaayuuuh-ambe laam yumbeyuuuh, de hôök busin lavuun atombe kul vaha-so sen dako sip-ato, ond sil sahi nambe sip valup ngaaho lak vu lonak,

²⁸ om sil talu tatuuh ak hees-ande laate lukala lôôy, de sil taahu vu laahel kambini be laam, be layi le waak lohvu 37 mita. Tonde hey valu-ala daka, tombe yik sil laate tatuuh-ambe sil taahu laah, le lohvu 27 mita.

²⁹ Tombe sil layêénin nambe sip e jakana tatuuh, om lawiing angka yumbeyuuuh vu sip ahus lukala lôôy, de sil laanjiihin taaku me nambe langaah jak pavis.

³⁰ Tonde hil kul vaha-so sen dako sip-ato ond davu salo mop in nambe gavuuh sip-ande lana, om sil taaluuhin dinggi luus de sil tatuhin nambe

davu baate angka sen sip naluu-to dukana lôôy,

³¹ + o 27:31 Sin 27:22*lemu Pol nêêl vu ngaa-mong vaha-sote yêêv osin hil ngaamong vaha-so nambe, “Naambe hil-anju me-mando jak sip e, ond ham e ana mem nama.”

³² Om ngaamong vaha-so katôôv hees in dinggi de lôôy hako la.

³³ Tonde heendiisin atombe Pol kataangg sil pin nambe lanja vanôôn, om Pol nêêl nambe, “Busin nomaayuuuh-ambe laam yumbeyuuuh lung la ond ham naham oo monalak-ambe ham nando malis amu, ham ame aha vanôôn daka le,

³⁴ + o 27:34 Mat 10:30*om sa kataangg ham naambe ham angga vanôôn daka be ham sakem dukanaah, in ham ti me-le na menama le.”

³⁵ + o 27:35 Mat 15:36; 1Ti 4:4-5*Nêêl nambêênu tonde hako balet-ambe naale hôôk sil amend, le mem lohak osin pêêlis la vu Anutu tonde kalêêh-ambe ya,

³⁶ tombe hil pin alondpayo ahelavis ak-ambe laya vanôôn having.

³⁷ De hey pin sen hey nando lak sip-anjôôto hey ngeeyaata lohvu 276.

³⁸ Sil laya vanôôn-ambe sakend lukalaah, tonde laate vanôôn wit lukala lôôy in nambe sip ahelavis jak.

Sip wiing paya

³⁹ Langaah ak atombe sil layi taaku, le me-lalak taakuu-ju ni le, lemu layi lôôy nanyendangga nanyelasu ti ond lonak anivasa, om sil lanêêl nambe sil sahi naambe lohvu ond mem sil gako sip guli-na lonak-anju.

40 Tonde mem

sil kavaayin hees in angka pin de lukala lôôy,
tonde sil kavaayin hees in haah yuuuh sen dahilin
sip nalu lak-ato in nambe biing kul naah, de sil
lasi sel ti lakalaah in nambe vavi dôôk. Tonde hey
ala in nambe ana lonak,

41 le ma de sip lakala laahel ti nando hôôk lôôy
lavuun-ato be hahôôk hôôk, de sip nalu niwêêk ak
tonde lôôy yiis sip ahus lôôt-ambe hapok.

42 Tombe ngaamong vaha-so kand vu nambe
lanyiis kalaambus-aso be lanjimb, in sil e lanjêês
lôôy-ambe lanjak ana lonak de dapak-ambe lana,

43 lemu ngaamong vaha-sote yêêv wiingin
nambe Pol mando metumin om nêêlin sil, de
nêêl nambe hil vaalu sen dayêês bel-ato ond sil
pasong landukana lôôy naamunggin-ambe lanjak
ana lonak,

***44 + o 27:44 Sin 27:22-25*tonde hil vaalu ond
sil danjip ak haah paak osin sip anye paak-ambe
lana. Om hey aawiing nambêênu tombe hey pin
oo alakala lonak.***

28***Pol nando Molta***

1 Tombe hey alakala lonak lung la, le mem
hey hango lanêêl nalu lavuun-anju haale nambe
Molta.

***2 + o 28:2 2Ko 11:27*Tombe hil taakuu-ju sil
samu hey nivasa lôôt, de luk osin vavi vaaku hey
om sil lavaav kin-ande lanêêl-ambe hey pin ala
vanyuuuh kin.***

³ Tonde Pol supin kin kaalok bun ti be vaav, tombe kin hapang nyêêy ti om loolak-ambe hato, tombe ya Pol nama.

⁴ Tombe hil taakuu-ju layi de nyêêy siyak hôôk Pol nama, om sil oo lanêêl vu sil nambe, “Omaahôô-ju mak yiis omaahonôôn ti yimb, om vu lôôy-ambe lakalaam atombe tovu nyevahaan-ambe navu jimb.”

⁵ + o 28:5 Mak 16:18*Tonde Pol tandinin nama tombe nyêêy la yêês kin, lemu Pol-ame hango nivaane le.

⁶ + o 28:6 Sin 14:11*Tombe sil mondanggin in nambe navu buuk me dupake be jimb meta, om mondanggin lôôt, le ma de vati me-tovu Pol e, om lanêêl vakasin ango lak nambe, “Yi anutu ti.”

⁷ De yêêv bop vu nalu lavuun-anju haale nambe Pablitas, yite ngaanggis neep ngaaho vu taakuu-ju, ond hako hey ala baan-ambe hanggin hey nivasa lôôt lohvus busin yaal.

⁸ Tonde sim Pablitas mangganaan anivaane be ahe nalup osin nihees-ambe neep, om Pol la vu be lohak, de hambe nama lak yi tombe nivasa hôôk.

⁹ Pol wiing nambêênu om hil anilakin vaalu vu taaku nalu lavuun-anju lalaam-ambe Pol wiing sil anind vasa hôôk having.

¹⁰ Tombe hil-anju samu hey nivasa lôôt, de busin sen hey ala lak-ato, ond lako vanôôn ayuuh ame laam-ambe latung lakala sip vu hey.

Pol tok la Lom

¹¹ Hey nandôô-ju kwaav yaal lung la, tonde mem hey alak hil Aleksandlia-te sip in valunando nalu lavuun-anju hôôk busin sen vavi bop-ambe lôôy wiing payaa-to, ond hako hey-ambe

hey ala, de sip-anju ond anutu Sus noow ayuuuh
kanund daale lak sip nalu.

¹² Tombe hey aatok ala taaku Sailakus, be hey
nandôô-ju busin yaal.

¹³ Tonde hey vuu-ju be hey vanju hôôk-ambe
hey aatok ala Lisiam, de samiinaanôôn atombe
vavi noow valup om hako hey-ambe hey ala lôôt,
de heendiiy atombe hey aatok ala Putiolai.

¹⁴ Tombe vu taakuu-ju hey aatovu Omaaho
Bop-ate hil vaalu, om lanêêl-ambe hey nando
having sil busin namaavaalu be vindak yuuuh,
tonde mem hey kandi vuu-ju be hey ala Lom.

¹⁵ Tonde Omaaho Bop-ate hil vu Lom lango
banye nambe hey valup, tombe sil lato latovu
hey vu taaku Apias osin taaku sen danêêl nambe
Tatuva Yaal-ato. Pol yi sil atombe pêêlis vu Anutu
de lopayo niwêêk ak.

¹⁶ + o 28:16 Sin 24:23*Hey aatok alaam Lom
atombe laliingga om Pol oo nando lak bayêen ti
be ngaamong vaha ti yoo monanggin yi vuu-ju.

Pol nêêl banye nivasa vu Lom

¹⁷ + o 28:17 Sin 25:8*Pol nando busin yaal lung
la le mem teey hil Yuda sen dando Lom-anjuuto
silate himbop-aso be lasupin lalaam, le mem nêêl
vu sil nambe, “Halingg-aso, same aawiing vati in
nambe daanggôôl yate hil osin yate himbop-aso
bôôy silate gamburg e, lemu hil landuuh sa vu
Yelusalem, tombe lavu sa lukala hil Lom namand.

¹⁸ + o 28:18 Sin 26:31*Tombe hil Lom lango
sate vakasin lôôt, le me-latokak nipaya ti lohv
nambe lanyiis sa be saanggimb e, om lawiingin
nambe lambiing-ambe sana mu,

¹⁹ + o 28:19 Sin 25:11*lemu hil Yuda nind baya om sanêêngg mopaatôôv ti me-neep e, ondeey sa kataangg Sisa nambe gango sate vakasin gaving, le same aawiingin nambe aambiing vakasin vu sate hil e.

²⁰ + o 28:20 Sin 24:15; 26:6-7*Yik danggakook-anja sen saateey ham in nambe saangge ham-ambe sa bakaas gaving ham, de saawii-having va sen yiyy Islel pin nanggin-ato, yik manyinja sen landuuuh sa lak hees aniwêek-anjo.”

²¹ Tombe lanêêl vu nambe, “Hil Yudia me-kaavu kaapiya be lanêêl ombanyem vu hey e, de Yuda ti me-laam-ambe hatulin vakasin osin néêl vakasin anipaya ti lak hong e,

²² + o 28:22 Sin 24:14*lemu hey aawiingin on-aanêêl gate vakasin-ambe hey gango le, in hey alak ni nambe hil vu taaku pin danêêl vakasin anipaya lak ham tanasin vaha ti sen ham navu sapa Yesuu-to.”

²³ Tombe sil latung busin ti le mem hôôk busin tii-ju hil ngeeyaata lalaam vu Pol vu bayêen sen nando lak-ato, om Pol oo motatekin tanasin danggakook lak Anutu nanggin yite hil-ato hôôk samiinaanôôn-ambe la busin hôôk having vu sil, de nanêêl Mose-te tanasin osin Anutu-te vakasin sen yite hil vaalu lanêêl langaah bôôy-ato vu sil in nambe lambiing gaving Yesu.

²⁴ Tombe hil vaalu lawii-having yite vakasin de hil vaalu me-lawii-having e,

²⁵ om sil-ame londpayo lavuh ti le, tombe lawiingin nambe lana le Pol néêl vu sil nambe, “Vavi Vaambuung néêl vu Anutu-te omaaho Yesaia be néêl vu yate himbop-aso bôôy, keen lôôt nambe,

²⁶ + o 28:26-27 Ais 6:9-10; Mat 13:14-15*‘Gana vu hil-anju be onaanêél vu sil naambe, “Ham e gango lôôt lemu ham-ame le naatokak dangga le, de ham e angge lôôt le ham-ame le anjak ni le.”

²⁷ In hil-anju londpayo niwêék ak osin nanyend doos ak, de sil amend yip in nind baya nambe me-lanji va lak mend e, de me-gango vakasin e, osin kand-ame bu vakasin danggakook e, de sil-ame langgilin londpayo nom vu sa in nambe saambiing-ambe nind vasa jak e.’

²⁸ + o 28:28 Saam 67:2; Luk 3:6; Sin 13:46; 18:6*“Om sa naanêél langaah vu ham naambe Anutu-te samu samu la vu hil vaalu sen sil-ame Yudaa-to lung la, in sil e gango vakasin.”

²⁹ [Pol nêél vakasin-anju lung la, tonde hil Yuda lalaah atombe yoo lanêél sil bopaata lôôt.]

³⁰ + o 28:30 Sin 28:16*Tonde Pol oo vaanggo bayêen ti be nando hôök lohvu ta yuuuh, tombe yite vaatêêvak sen dalaam vu yii-to ond yoo nako sil pin lak nivasa,

³¹ + o 28:31 Sin 28:23*de yoo monanêél vakasin lak Anutu nanggin yite hil-ato, osin navu taahu Omaaho Bop Yesu Kalisi-te vakasin vu hil, ond yoo nêél neep langaah lôôt de omaaho ti menêelin e.

**Mangga Buang New Testament
The New Testament in the Buang, Mangga Language
of Papua New Guinea
Nupela Testamen long tokples Mangga Buang long
Niugini**

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 18 Apr 2025 from source files dated 31 Aug 2023

8d739032-2a4b-567d-abd1-cb7e24ed2cd6